

(4

MAGNI COSMI  
MEDICEI  
VITA



MAGNI COSMI  
MEDICEI  
VITA

AUCTORE  
ANGELO FABRONIO  
ACADEMIAE PISANAE  
CURATORE



---

P I S I S MDCCLXXXIX.

---

EXCUDERAT ALEXANDER LANDI  
IN AEDIBUS AUCTORIS.



PETRO LEOPOLDO  
*ARCHIDUCI AUSTRIAE*  
MAGNO ETRURIAE DUCI &c. &c.

ANGELUS FABRONIUS

Quoniam a Te, Celsissime  
Princeps Regie, singula-  
ribus beneficiis auctus nil aliud  
possum munificentiae Tuae red-


dere quam studia, ut sic dixerim, in umbra educata, etiam atque etiam peto, ut quae de Cosmo Mediceo P. P. litteris mandavi aequo animo accipias. Hoc quoque in gloriam tuam cadet eos & patrocínio Tuo fovisse, qui nequeunt nisi mediocria munera offerre. Cum vero in hoc ipso opere saepe incidarit locus, ut de moribus, legibus, institutis, quae vigeant in Republica Florentina, esset dicendum, quid majoribus nostris defuerit de illa scientia, cui

proposita est rectio civitatum & populorum felicitas, & quae ex multis & magnis rebus constat, facile quilibet intelligere poterit, cum tot ac tanta a Te sapientissime iussa ac scita cum veteribus conferet. Ac mihi quidem videtur saeculum hoc nostrum hac re maxime ceteris praestare, quod philosophia supeditaverit Imperantibus certissima ac tutissima praesidia ad bene & praeclare Rempublicam administrandam, quibus qui prudenter uti sciverit, is

non modo inter homines excellere, sed ad Deum, cujus imaginem & vicem in terris gerit, propius accedere judicetur.







*Fontana per.*


*Enca. fo.*

---

---

# MAGNI COSMI MEDICEI

## V I T A



Uī de nostrorum temporum conditione queri solent, si memoria vetera repeterent, profecto aut nos beatos, aut saltem non omnino miseros esse judicarent. Scribentibus nobis de vita Cosmi Me-

dicei, qui publico decreto PATER PATRIAE appellatus fuit, occurrunt statim pestilentiae, fames, domi civiles discordiae atque odia potentiorum, quae non tam in malorum, quam in optimi cuiusque fortunas ac vitam erumpebant, foris bella, in Catholica Ecclesia schismata, direptiones civitatum, vastationes agrorum, incendia, caedes, quae mala universam Italiam, sed praesertim Rempublicam Florentinam quasi fatali aliqua necessitate vexabant. In tanta rerum perturbatione & hominum perfidia atque iniquitate si quis exortus est ae-

A

qui et boni & omnis praeclarae famae amans, qui fortunae motus ratione semper gubernavit, & sapientissimis consiliis, amplissimisque bonis sua & majorum industria partis incolumitati & decori patriae prospexit, is profecto non laudem modo, sed & admirationem posteritatis habere debet, & dignus est, ejus gesta historiae monumentis commendentur. Multa de Cosmo Florentinarum rerum scriptores, Machiavellius & Ammiratus, separatim etiam Silvanus Razzius tradiderunt; quod nullus tamen horum plane satisfecisse ejus studiosis videatur, nos postquam in ipsius nepotis Laurentii Medicei vita declaranda ingenii periculum fecimus, quid in hujusmodi descriptione possemus iterum periclitandum putavimus. Utinam Etruriae commodo & gloria! Magnarum enim virtutum exempla in illustri posita monumento vel ignavissimos ad illa imitanda excitant; & quod praeclara ac fortia suaviter jucundeque reminisci solemus, & ad omnes gentes facile pervadunt, aeternitatem, immortalitatemque non modo iis, qui illa ediderunt, sed etiam civitatibus, in quibus perpetrata fuere, peperisse videntur.

Tantus vir patriam habuit Florentiam, parentes vero Joannem Averardi cognomento Biccii Medicei F. & Piccardam Averardi Buerii F. Quod in lucem editus est an. MCCCXXXVIII. die SS. Martyrum Cosmi & Damiani festo, Cosmi nomen obtinuit. Familiae paternae, quae ex Mucellano agro Florentiam venit, an-

tiquitatem nobilitatemque plura monumenta declarant, illud in primis quod vel a XII. saeculo Medicei Ecclesiae S. Thomae, prope quam aedes satis amplas habebant, patroni & custodes fuisse videntur (1). Praestitit & nobilitate inter Florentinas Bueria familia, quae vel ab saeculo XIII. tenuerat summos in libera civitate honorum gradus. Joannes, quamvis ea, quae faciebat, quaeque dicebat, multitudini praesertim jucunda esse volebat (populo enim nunquam non favit Mediceorum familia, cujus studiis ac suffragiis ipsa crevit) sequebatur tamen semper honesta et iusta consilia, & cum ei ante oculos obversaretur exemplum Veri Medicei, qui paullo ante, seditione plebis facta, imperium in suos tenere potuisset, nisi Reipublicae dignitatem suae antetulisset, moderate sua auctoritate utebatur, & quantum poterat efficiebat, ut conspiratio & concordia omnium ordinum esset ad conservandam libertatem. Sed non semper ex Republica, ut decebat, fructus laetos & uberes, sed interdum magna acerbitate permixtos tulit. Quo illum moerore afflicto & profligatum esse oportuit cum plures suae gentis a. MCCCXVII. aut in exilium pulsos, aut morte affectos vidit, sic ut ad nihilum Mediceorum omnium auctoritas atque potentia venisse videretur! Nihil ille non egit, ut amissa recuperaret, & cum divitiis abundaret, natura beneficus & liberalis esset, atque ex bonis factis magnam famam collegisset, postquam legationes obivit ad Vene-

tos, ad Ladislaum Apuliae Regem, & ad Pontificem Max. Martinum v. quem Florentia Romam redeuntem etiam comitatus est, summum honoris gradum (Vexilliferum Justitiae appellabant) an. mccccxxi. obtinuit. Fortasse citius ad illum pervenisset, nisi obstitisset Thomas Albitius Mediceis omnibus infensissimus, cujus summa erat in Republica auctoritas, quo mortuo, ejus odii & potentiae heres fuisse videbatur Nicolaus, qui a loco, a quo oriundus erat, Uzzanius cognominabatur. Hic quidem nihil non molitus est ut Joannem ab illa dignitate excluderet, pluribusque verbis exposuit quanta a Mediceis timenda essent si pristinam auctoritatem recuperarent, omnibusque jam exploratum esse debere, non conquieturam plebem & omnia permixturam, si quisquam eorum fortunae & honorum muneribus ornatus extitisset, in quo spes suas collocare posset. Non divitias modo, sed & vel ipsas virtutes Joannis, quae tamen omnibus manifestae erant, homo nobiliorum fautor eximius, invidiose criminatus est: verum ei nihil ex sententia successit, quod ejusdem magis, quam Joannis nimia timebatur potentia. Hic quidem in obeundo magistratu summa prudentia se gessit, & aperte civium commodis, & occulte suorum utilitati consuluit. Gaudebat quod duos suscepisset liberos Cosmum & Laurentium, in quibus magnam spem existimationis, privatarumque rerum ponere se

posse intelligebat. Excellentis enim ingenii & singularis bonitatis signa vel ab ineunte aetate dederant. In Cosmi praefertim animo nihil agreste, nihil inhumanum apparebat. Per summos viros illum instituendum curaverat (2), & cum ab eo exigeret, ut multa legeret & ediceret, id studebat maxime, ut penitus inhaerescerent in ejus mente magnorum virorum & optimorum civium facta atque exempla. Quod ineuntis aetatis incitia senum prudentia regenda est, domum suam saepe invitabat, qui magnum in Republica usum habebant, & sapientia valere putabantur: omnino nihil negligebat, tanquam bonus agricola, quod ad colendos teneros liberorum animos praeparandosque ad virtutem conducere posse videbatur. Laudes, quas de illis haberi audiebat ab Ambrosio Traversario Camaldulensi homine, cujus tum omnes suspiciebant ingenium, judicium atque virtutes, & ad quem, cum degeret in monasterio Angelorum, tanquam ad academiam quamdam flos nobilitatis et juventutis concurrebat, spem maxime in Joanne augebant, fore ut per illos non Mediceorum modo, sed & Florentinae Reipublicae gloria illustrior fieret. Ratio vero cum adolevit atque perfecta est in Cosmo, omnia cum illo, quae se cura aliqua afficiebant, & omnia de Republica consilia libentissime communicabat, neque periculum ab invidis extimefcebat, modo factorum suorum gloriam cum illo partiri posset.

Accidit per illa tempora, ut Florentini pecunia, vi omnique arte Pisas occupare studuerint. Postquam urbem crudeli obsidione diu clausissent, haud recusandum putarunt, quominus illam quibusdam conditionibus a Joanne Gambacurta (3) acciperent. Obsides propterea dandi erant nobilissimi civitatis, fuitque in illorum numero Cosinus, qui ab incunte aetate nihil tam concupivit, quam ut operam et studium navare posset Reipublicae. Neque minus laborabat ut paternam rem augeret, & facultates ad largiendum magnas compararet, quanquam id erat periculofum, quia non deerant, qui seditiosa atque improba oratione spargerent in vulgus, timendam Joannis potentiam, quod cum domi non solum, sed etiam apud finitimas civitates multos aere obstrictos haberet, plus privatus posset quam ipsi Magistratus. Inter eos, qui ejus fidei & arcae confidere videbantur, erat Balthasar Cossa Neapolitanus, qui Joannis xxiii. nomine de Pontificatu maximo decertabat cum Gregorio xii. & Benedicto xiii. Postquam Respublica Christiana diro schismate, quo nullum diuturnius extitit, vexata fuit, qui de ejus concordia laborabant, rem ad Costantienſe Concilium detulerunt. Venit ad illud ipse Joannes, & secum habere voluit cum Leonardo Bruno Aretino aliisque multis itiuersis socium Cosmum, quod perutile rationibus suis fore speraverat. Aegre illum a complexu suo dimisit Lesta Contessina Alexandri Soz-



zi de Comitibus Bardi, & Millae de Comitibus de Ilcio Filia, quae paullo ante ei nupta fuerat. Sed facile erat Florentinis a suis laribus familiaribus vel in remotissimas regiones proficisci, quando aut publica, aut privata suadebat utilitas. Homini jam collum in laqueum inferenti quantum potuit subvenit Cosmus. Vidit enim hic statim quanta timenda essent pericula Joanni Pontifici a Costantiensi Concilio, in quo dominabantur homines eidem infensissimi, quae pericula non minus suum quam illius animum sollicitum habebant. Post multas concertationes eo deducta res fuit, ut Joannes omni dignitate privaretur, cum Pontifex maximus an. MCCCCXVII. creatus fuisset Cardinalis Oddo Columna, qui Martini v. nomen sibi adscivit. Ex quo Joannes intellexit desperandum esse de rebus suis, fuga salutem quaesivit, & cum eo mutatis vestibus fugisse dicuntur Cosmus omnesque, qui illius partium atque itineris comites fuerant. Venit tamen Joannes in potestatem Ludovici Bavariae Ducis, & non nisi magna auri vi, quae soluta fuit Venetiis a Joanne Mediceo ejusque nummulariis sociis, libertatem suam redemit (4). Studia Mediceorum curaeque de salute Joannis minime a Florentinis alienarunt Martini animum, quin immo significavit per Leonardum Datum, qui universae Dominicanae familiae praeerat, & quem ob singularem in rebus agendis prudentiam suum legatum ad eos miserat (5), ut omnia a se benevolentissimi

hominis beneficia expectarent, seque jam deliberasse ad eos venire, apud eos commorari (nam tum Roma, Ladislai Apuliae regis armis antea capta, in potestate erat ejus sororis Reginae Joannae hujus nominis II.) eorumque consiliis & opera res suas privatas & publicas administrare. Exceptus ea pompa iisque laetitiae signis fuit, quae decebant summum Pontificem amplissima familia natum, & de cujus virtutibus magna percrebuerat fama. Sed nihil ei tam gloriosum & jucundum fuit, quam videre jacentem ad pedes suos & praetitorum veniam efflagitantem in ipsa urbe Florentia illum Balthasarrem Cossam (6), qui adeo superbierat fortuna, ut nunquam conquieturus videretur, nisi amplissimum, ad quem malis artibus ascenderat, dignitatis gradum, dejectis aemulis, retinisset. Id se fecisse auctoribus Joanne & Cosino Mediceis dicebat, quorum consilii neminem potuisset poenitere. Non fuit hoc sine multorum lacrimis & dolore. Nihil enim tam miserabile quam ex beato miser, & ex fortunato calamitosus. Haec miseratio & cohortatio Florentinorum facile obtinuit a Martino, ut Joannem Cardinalem crearet, eique primum in amplissimo Collegio locum concederet. Sed haec tanti non erant ut solarentur hominem, cujus mores ad nimiam semper ambitionem incubuerant. Itaque sive doloris morfu, sive morbi vi oppressus paullo post mortem obivit, & quod composuit testamentum satis declaravit quanti Medici-

diceos faceret. His enim praefertim mandavit, ut quae jussu per eos ad exitum perducerentur. Quod tam praeclarum ille sibi dederat judicii & amoris sui testimonium, novendialibus exequiis, pompa & magnificentissimo monumento, quod magna ex parte a Donatello sculptore eximio elaboratum in Aede S. Joannis positum fuit, tanti viri non tam prospera quam adversa fortuna clarissimi memoriam honorandam curarunt. Non est tacendum propter celebritatem hominis, Franciscum Philelphum pro odio, quod habuit in Mediceos ac praefertim in Joannem & Cosmum, quem exilii sui ab urbe Florentia causam fuisse putabat, improbum & furiosum adeo calumniatorem horum extitisse, ut quos origine cauponarios, carbonarios, aleatores, foeneratores, omnique labe foedatos dixit, veneno Joanni Pontifici mortem intulisse affirmaverit, quo illius bona atque pecunias occuparent (7). Quid inverosimilius & monstrosius excogitari & somniari unquam potuit? Ex annalium monumentis & ex Joannis ipsius testamento (8) cognoscitur falso etiam a quibusdam aliis propter civilia studia & obtrectiones domesticas Mediceorum familiae inimicis memoriae proditum fuisse magnas divitias ex hereditate Joannis illis obvenisse. Nihil sane sperare poterant ab homine adeo fortunae fluctibus jactato, ut dubitaverit, num quod in bonis habebat satis esset ad solvenda, quae scripserat, legata. Sed haec ut & alia hujusmodi (9) pluribus verbis confutare non

est necesse, quamvis tum eae essent artes Florentinorum, ut omnes vias pecuniae & noscere & quaerere viderentur. Profecto Cosinus, ut erat frugi & integer vir, nil nisi rectum honestumque expetebat, & dum laborem pecuniamque suam hominum aut periculis calamitatibusque sublevandis, aut tuendis augendisque fortunis impertiebatur, munire sibi viam ad gloriam volebat, & propugnacula praeparare, quibus contra invidorum impetus se usurum arbitrabatur. Ut vero facultatem exercendae liberalitatis haberet efficiebat industria, diligentia, ordo & parsimonia, quae maxime apta est naturae, rei familiari atque Reipublicae. *Quod si omnia mihi (ajebat ipse) quae ad vitam cultumque pertinent, quasi virgula divina suppeditarentur, non propterea de augendo patrimonio minus laborarem, quia ex omnibus officiis illud praesertim colendum est, quod ad conjunctionem hominum, & ad patriam conservandam ornandamque valet.* Tum vero se beatum putabat quando pietatis suae fructus a populo Florentino ferebat, cum non sibi modo, sed & liberis prospiciendum esse diceret. Binos enim susceperat, alterum nomine Petrum, qui lucem adspexit an. mccccxvi. Kal. Quint. alterum nomine Joannem, qui in vitam quinquennio post Kal. Novemb. venit.

Cum majoribus rebus, gestis jam minoribus quibusdam magistratibus, praecessit coepisset, an. mccccxx. post. non. Maii una cum Laurentio Ridolfio legatus

Mediolanum mittitur ad Philippum Mariam Vicecomitem Ducem, ut ei de pace per Nicolaum Atestinum Ferrariae Marchionem confecta gratularetur (10). Appetierat ille amicitiam Florentinorum, quod hanc utilem sibi fore speraverat ad recuperandas nonnullas Cisalpinæ Galliae urbes, quæ in potestatem Venetorum pervenerant, & ad Genuam occupandam, quæ tum, Duce Thoma a Campo Fregosio, suis regebatur legibus. Quamquam nonnulli essent, & in his Ginus Capponius magnæ auctoritatis homo, qui multis rationibus suaderent non esse e Republica favere præcipiti & effrenatæ dominandi cupiditati, quæ satis clare in Philippo apparebat, quin immo illam diu incensam comprimendam atque restringendam, pax tamen ea præsertim conditione facta est, ne ille se immisceret bellis & negotiis, quæ citra flumina Panarum & Macram, & juga Apennini gererentur. Sed hæc pax minus fuit diuturna propter subdolum, inquietum & novarum rerum appetens Philippi ingenium. Cum ipse in ditionem suam redegisset Genuam & multa vicina oppida Florentinis commendata, de Sergiano aliisque oppidis, quæ citra Macram sunt, sibi & Genuensibus pactus fuisset, Forum Livii, mortuo ejus Regulo Georgio Ordelfaffio, ad suam potentiam dominatumque convertisset, licet is filium impuberem Thebaldum reliquisset, & alia hujusmodi moliri videretur, plerique Florentinorum censuerunt esse e Reipublicæ dignitate

amicorum injurias ulcisci, opem ferre Fregosio, cui recenti beneficio erant obstricti, quod per eum a Genuensibus C. florenorum millibus Liburnum emerant, & motus conatusque Philippi Ducis prohibere, ab eoque violatae pacis poenas repetere. Joannes & Cosmus Medicei in ea fuerunt sententia, proque ea vehementer pugnarunt, non arma capienda adversus Insubrium Ducem, nisi ille aperte bellum Florentinis intulisset, neque id facturum videri propter Reipublicae opes & foederatorum potentiam. Addebant etiam non conducere ad statum Reipublicae hujusmodi suscipere bellum, ex quo pericula metui, nullae sperari potuissent utilitates. Vicit tamen sententia eorum, qui ad arma vocabant, atque legati ad Pontificem, ad Caesarem, ad Neapolitanorum Regem & ad Venetos mittuntur, qui voluntatem Reipublicae proponant, & auxilia postulent. Delectus etiam tota Etruria habentur, magnaque pecunia plures conducuntur, qui praeclari armatorum duces putabantur. Pugnatum est in Aemilia ad Zagonaram, & quamvis per totam Italiam concelebrata fuerit Mediolanensium victoria, quorum impetum nostri fessi itinere & imbris (erat enim tempus anni difficillimum) sustinere non potuerunt, tres tantummodo, quod mireris, vitam amiserunt. Nullus enim tum erat ordo, nullum imperium certum, & cum quisque Ducum suo consilio uteretur, ubi adduci rem in periculum videbant, sibi suisque militibus, quos ma-

gno vendeabant, seu potius mutuabantur, fuga confulebant. Iis rebus Florentiam nuntiatis, magnus terror populum occupavit, ac si ipsi urbi hostis appropinquaret, jaciebatque ille licenter injurias in magnates, qui infeliciissimi belli auctores fuerant. Ad illum placandum verba fecit Rainaldus Albitius, et postquam florentem Reipublicae statum cum adversariorum fortuna contulit, hortatus est omnes, ne animo deficerent, quaeque usui essent ad persequendum bellum pararent. Ipse etiam arcano cum familiaribus suis colloquitur de frenanda populi licentia, mutandoque propterea civitatis statu, quod cum fieri non posse intellexerent, obsistentibus Mediceis, quorum voluntate ac nutu ille regi videbatur, in partes suas illos trahere magnopere laborarunt. Joannes quidem multa graviter & sapienter dixit, quae idonea esse putavit ad illos de proposito deducendos; eam esse Reipublicae conditionem, eos Florentinorum mores ostendit, si plebs excluderetur a Senatu publicisque muneribus, perpetuis fluctibus agitatam iri civitatem, reminiscerenturque illum quasi Deum philosophorum Platonem, Titanum e genere statuere eos, qui ut illi caelestibus, sic hi adversarentur magistratibus, & iis, quae scita sunt in populorum institutis & legibus. Cetera inter Reipublicae iussa erat, ut stato tempore magistratus eorum nomina in urnam conjiceret, qui civium suffragiis adlecti rem publicam essent ad certum nume-

rum annorum administraturi. Horum cum bimestre munus esset, ita forte ducebantur, ut semel singuli honore et magistratu functi, spatium illud temporis universi implerent. Ne cui autem facultas esset, ubi eorum nomina, qui essent in magistratu futuri, apud populum manarent, ipsos donis & pecunia tentandi, & lege & jurisjurandi religione vetitum erat aperire cui fors ducenda esset. Tum erat e scribis unus Martinus Lucae Martini filius Joanni Mediceo multis nominibus amicissimus, qui illi prodidisse accusatur, qui minime ex sententia illius Rempublicam essent administraturi. Haec causa iustissima visa est removendi ipsum ex munere, & quemdam Paullum in ejusdem locum substituendi. Tum Joannes neque amicum, neque se ipsum deferuit, & qua pollebat auctoritate effecit, ut suus illi locus redderetur, quae res quidem magnas turbas et rixas excitasset, nisi vis & timor belli Mediceorum adversarios continuisset. His artibus suam rem bene gerebant et publicam, & cum recusarent nihil quod ad tuendam patriae libertatem confirmandamque salutem pertineret, consilia sua aquis iudiciis ab obtretatione invidorum defendenda commendabant. Cum vero in eum casum fortuna Rempublicam demisisset, ut quam maxime egeret pecunia, novaque propterea imponenda essent tributa ad sumptus belli faciendos, consiliariis Mediceis, edictum fuit, ut quae antea ex capite recensione, ex censu in posterum conficeren-



tur (11). Sic homines liberales & bonitate affluentes levare populum onere voluerunt, quod sibi praesertim ceterisque, qui bona & divitias habebant, imposuerunt. Verum haec res causa fuit multarum querelarum: nam nobiles a se exigui intolerabilia querebantur, plebs vero magnis clamoribus contendebat vitium praeteritorum tributorum corrigendum, quod divites pro fortunis, quas possidebant, non satis solvissent. Tantam licentiam repressit Joannes, nihilque praetermisit, conservans rationem institutionemque suam, ut esset concordia animorum ad civitatis decus sustinendum & pericula removenda. Varia fuit fortuna belli, quod tot in Republica motus genuit, & pro quo a Florentinis expensa fuisse dicuntur tricies usque centena & quingena florenorum millia. Hujus causa Cosmus plures legationes obivit, primum anno MCCCCXIII. ad Lucenses, anno post ad Bononienfes, ac demum exeunte an. MCCCCXVI. ad Summum Pontificem, ut ei nuntiaret captam fuisse Brixiam a Venetis Florentinorum foederatis, ut ejus iratum Florentinis ipsis animum placaret (nam an. MCCCCXX. ab iis disceserat cum imprecatione malorum propter carmina quaedam quae tota civitate ad illum irridendum canebantur) (12) utque ei gratias ageret de studiis pacis, ipsumque in voluntate hujus conciliandae confirmaret. Ad plures menses Cosmus Romae commoratus est, & qua erat in tractandis negotiis dexteritate plura a Pontifice patriae suae utilia & decora aut obtinuit,

aut extorsit (13). Erant & caussae privatae, ut quam gratissimus erga Pontificem cognosceretur. Nam hic paullo ante Joannem eiusque filios & nepotes Comites Montis Viridis (hoc nomen oppido, quod est in Dioecesi Firmana) creaverat (14). De pace tamen agi minime coeptum est nisi Aprili an. mccccxxviii. quo tempore Cosmus erat e Decemviris Reipublicae unus. At quae confecta esse videbatur Ferrariae per Cardinalem S. Crucis Pontificis legatum, brevi turbata est perfidia Mediolanensium Ducis. Tandem ab hoc, armis aut defatigatione abjectis, aut victoria detractis, Florentini quae amiserant oppida in Aemilia recuperarunt, et Veneti non Brixiam modo, sed & Bergomum, harumque urbium agros latos & fertiles obtinuerunt.

Tranquillatis rebus externis, vehementiores domestici motus fuerunt causa tributorum, aderatque semper Joannis Medicei prudentia ad illos compescendos, revocandosque ad officium, qui illorum auctores esse putabantur. Sed dum ille lumen animi, ingenii, consiliique sui cunctis civibus porrigebat, suo magis quam Reipublicae tempore extinctus est an. mccccxxix. x. Kal. Martias; & hunc diem fuisse civitati luctuosum declaravit pompa funeris, qua ejus cadaver, comitantibus Magistratibus, Caesaris, Venetorum, aliorumque Principum Legatis, & tota Mediceorum familia, ad S. Laurentii deportatum est (15). Hae exequiae sumptui fuisse dicuntur publico aerario tribus flore-

no-

norum millibus; & sane sumptus nunquam melius poni potest quam in celebranda praestantium virorum memoria non solum ad factorum praemium, sed etiam ad exemplum. Quod semper tetigit Joannem cura familiae non minus quam Reipublicae, cum esset mortis proximus haec liberis suis dixisse fertur. *Nolo quis vestrum existimet me dolere, quod non diutius in hac vita maneam, in qua nihil inest nisi propagatio miserrimum. Gaudendum potius quod mortem naturae debitam non vitia maturaverint, & quam vixi vita fuerit probata civibus, multis salutaris, nemini molesta, vobisque utilis, quos amplissimis fortune locupletavi. Divitiae quidem opportunaesunt ut utamini, opes ut colamini, boniores ut laudemini, verum nisi temperantia, modestia atque iustitia illas comiteantur, in libera praesertim civitate, in invidiam atque in discrimen facile possidentes adducunt. Ne vos igitur aut fortuna, aut popularis aura, aut dignitates e virtutis semita unquam dimoveant, beneficia & munera patriae non ambitiose quaerite, delata sic accipite, ut iis, a quibus accepistis, cumulate redatis. Obversetur vobis ante oculos semper multorum exemplum, qui in summa mala praecipitati triste rerum humanarum spectaculum idcirco praebuerunt, quod nimia & extraordinaria concupiscentes, fines aequabilitatis & legis transire minime dubitarunt. Utinam emori fortuneis meis honestus exitus sit, ne si maiora, Deo & homini-*

*bus volentibus, obtinuissem, potiore curam familiae, quam Reipublicae habuisse iudicaret.*

Et si ab ineunte aetate eam vitae rationem inierit Cosmus, ut nullum detrimentum existimationis unquam fecerit, semperque virtutum laude creverit, non parum tamen oratione patris arrectus fuit ad magna & praeclara gerenda, praesertim cum intelligeret omnium ora in se esse conversa, aequos bonosque favere, nobilitatis principes locum invadendi quaerere. Non sane facilis negotii erat dignitatem & famam servare, cum illi essent Florentinorum mores, isque Reipublicae status, ut magnae divitiae, gratia & studium populi suspensiones & invidiam crearent, jurgia, discordiae, simultates, exilia, proscriptionesque bonorum omnia miscerent, honorum cupido non tam nobiles quam vilissimos quosque servilibus artibus addictos vexaret, audacia, largitio atque avaritia saepe pro pudore, pro abstinentia & pro virtute vigerent. Accedebat, quod eodem tempore, quo pax non solum utilis, sed etiam necessaria esse iudicabatur mercaturis faciendis, quibus non modo creverat, sed pene sustentabatur Reipublica (nam cuncta fere maria terraeque patebant Florentinorum industriae) bellum & facile susciperetur, & obstinate gereretur, & saepe amicitiae atque inimicitiae non ex commodo publico, sed ex re privata potentiorum aestimarentur. Neque mediocris erat cupiditas ac studium dilatandi imperii, quod omnibus

Principibus insitum atque innatum esse videtur. Ad haec tempora munivit se Cosmus, & quod ei maxime curae erat Reipublicae incrementum, mente, consilio ac etiam pecunia ejus commodis utilitatique serviebat. His subsidiis captum per ea tempora Marradium fuit (16), quod Aemiliae oppidum tum erat in ditione Manfrediorum, qui dominabantur non Faventiae modo, sed & in omni Amonis valle. Horum opera & militibus saepe usi sunt Florentini propter locorum vicinitatem & hominum fortitudinem, sed incidebant saepe causae querelarum, & justam adeo querendi se causam habere judicarunt de Ludovico Manfredio, ut non solum oppido vicinaque arce, quam possidebat, ipsum spoliaverint, sed etiam publica in vincula conjecerint. Egit ille saepe cum Cosmo aliisque Mediceis, ut tanta calamitate liberaretur (17), sed horum aures ejusdem questibus & luctui obscuruisse videbantur. Neque multo post Tredotium, alterum Aemiliae oppidum, quod habuerat Guelfus Guidius Comes perduellionis accusatus, in potestatem Reipublicae venit. In tantis motibus, quibus agitabatur Italia, & in tanta multitudine imperantium, cum pleraeque civitates ac etiam oppida suos haberent dominos, suscipiebant Florentini vicinorum praefertim patrocinium, sicque sibi viam muniebant, ut quos tutati fuerant, levissimam vel ob causam vi oppressos imperio coercerent. In iis ipsis fluctibus, quibus jactata est Ge-

nuenſium Reſpublica per Fregoſios, Adornios & Flicheſios mira fuit Coſmi dexteritas, ut nonnulli eorum ſuarum fortunarum & jurium ſibi Florentinos defenſores adoptarent, & tanquam patronos implorarent (18).

Sed his nihil erat potius, quam ut Lucenſes in ditionem ſuam redigerent, ſpecie dimovendi a Republica focdum & inimicum ſibi hominem Paullum Guinigium, qui tyrannidem occupaverat. Qui Lucenſis belli auctores erant (erantque ceteros inter Rainaldus Albitius atque Cosmus, qui hac una in re conſenſiſſe videntur) etſi cum multis multa ſaepe egerant, tamen in rem fore credentes populum appellare & cohortari, talem habuerunt orationem, qualem convenire praefentibus Reipublicae temporibus ſunt arbitrati. Nicolaus Uzzanius magna conſtantia, pluribuſque verbis redarguit huiuſmodi conſilium, ut vel odium concitare velle videretur in eos, qui illius duces erant. Sed vicit ſententia illorum, qui Lucenſibus, nulla aequitatis & fidei, qua ſemper fuerant illi in Florentinos, habita ratione, bellum indici & inferri debere contendebant (19). Itaque creatis Decemviris Baliae (ſic enim illos vocabant, quibus omnis cura rerum, quae ad bellum pertinebant, mandabatur) quam maximas poſſunt copias comparant, & magna ſpe praemiorum Nicolaum Fortebraccium inſignis hominem audaciae & rei militaris gloria clarum, qui per eos dies, excuſſione facta in Lucenſium agrum, plura il-

lorum caſtella improvifo occupaverat, in partes ſuas trahunt. Exercitus poſteaquam in plura oppida irrupit, Lucam obſedit, quam non armis modo, ſed & aquis Auxeris, quod flumen propter urbem fluit, conſiliario & auctore magni nominis architecto Philippo Brunelleſchio, expugnari poſſe Florentini ſperabant. Sed res longe aliter, quam rati fuerant, evenit. Lucenſes ira et metu anxii legatos Mediolanum miſerunt, qui Philippum Ducem edocerent quanto in periculo res eorum eſſent, rogarentque ne cunctaretur ſibi opem & auxilium ferre ob eam maxime cauſſam, quod ipſe facile civitatis imperium, deſeſſo Tyranno, obtenturus eſſet. Quanquam is paullo ante nunciantes Florentiam legiſſet (20), velle ſe Reipublicae amicitiam, ne quid ab ſe hoſtile timeret, nihilo tamen minus, vel quia id ſimulaverat, quo improvifus gravior accederet, vel mobilitate & perfidia ingenii pacem atque bellum mutare ſolitus, plenos bonae ſpei ab ſe Lucenſes dimiſit. Interea mandat Nicolao Picininio (21), & Francisco Sfortiae, qui ejus ſtipendia merebant, quique ſummam bellicae virtutis opinionem habebant, ut in Etruriam, ſed diverſis itineribus, proficiſcerentur. Hos non ab ſe miſſos, ſed dimiſſos fuiſſe juravit, quod alere eorum milites diutius non poterat. Florentini repentino eorum adventu commoti ſuis rebus timere coeperunt, quas ut tutarentur, exercitum ab obſidione revocarunt. Tum facta conjuratio fuit

adversus Guinigium, traditusque cum liberis in custodiam Sfortiae mittitur Mediolanum ad Philippum Ducem, & cui inimici propter dignitatem pepercerunt, inventus est amicus, qui ei mortem afferret. Profecto si Picininius et Sfortia, ceterique, qui Lucensibus favabant, conjunctis viribus & concordi animo dimicassent, magna clades et calamitas Florentinorum Republicam oppresisset. Sed horum artes et pecunia valuerunt ad removendum periculum Sfortianorum, quorum discessu ii, qui Deum hominesque testabantur, se arma non cepisse contra Lucensium libertatem, neque ut iis periculum facerent, sed uti res suae ab injuriis inimicissimi Tyranni tutae forent, spem & voluntatem incepta perficiendi recuperarunt. Et causa justissima Florentinis visa est ad persequendum bellum, quia Genuenses Petram Sanctam et Motronum ceperant, quod ipsis consentientibus Lucensibus, quibus illa oppida parebant, fecisse arbitrabantur. Potiti sunt etiam aliorum locorum, quae sunt in ora maritima, quaeque Florentinis erant commendata. Quod videbant igitur nomine pacis, quam petebant Lucenses (22), bellum involutum esse, nihilque non timendum esse ab Insubrium Duce, qui dominatum, quem occupaverat Genuae, ad Etruriam usque dilatare cupiebat, sibi providere, novos conscribere milites, Venetos aliosque socios ad subveniendum sollicitare, pecuniam mutuari, & omnia ea parare, quae bello essent aut



opportuna, aut necessaria. Eluviones, pestilentia, qua Florentia afflictabatur, & propter quam, praeter illam dissensionum civilium causam, Cosmus cum sua familia autumnò an. MCCCCXXX. Veronae fuit (23), & annonae caritas pericula portendere putabantur. Porro in eo bello nulla ferme res prospere cessit, & quae domi alebantur a Mediceorum adversariis civiles discordiae, & ii qui foris aut militiae imperium, aut summum rerum iudicium habebant (Commissarii vocabantur) quibus gloria et dignitate Reipublicae privata utilitas potior erat, omni praeclaro facinori moram atque impedimentum afferebant. Dimicatum etiam infelicissime fuit cum Picininio ad Auxeris ripas, victique Florentini ex praelio Pisas aufugerunt.

Jam multa oppida Pisanorum natura & viribus parum munita in hostium potestatem venerant, & novo foedere juncti Lucensibus, ipso instigante Philippo Duce, Senenses & Jacobus Appianus Plumbini Regulus, ferro ignique ipsi Florentiae urbi minitari videbantur. Inter timorem, dubitationem ac moras Cosmus hortabatur populum ad vindicandos eorum perditos conatus, monebat ne Rempublicam seque deferret, multa superba, crudelia Mediolanensium Ducis exaggerabat, levitatem mobilitatemque Senensium carpebat, Appianum ut hominem ingratisimum, quippe altus educatusque is fuerat in sinu Reipublicae, cui moriens pater illum commendaverat, accusabat, pror-

sus intentus omni modo plebis animum accendebat. In his rerum angustiiis magnum & sapientem virum illum fuisse judico, cum inter abjectionem animi constantiam magnitudinemque, inter ambitionem temperantiam, & inter sacvitiam moderationem prae se tulisset. Dum Picininius multitudinem, quam secum duxerat, crebris excursionibus & oppidorum vastatione locupletabat, & Aretinis, quorum in agrum venerat, terrorem inferebat, iussus est a Mediolani Duce in Cisalpinam Galliam redire, ut ditionem suam a Venetorum armis defenderet. Facile enim fuit Florentinis his suadere, pro veteri odio quod habebant in Genuenses & in Philippum Ducem, ut terra marique bellum pararent, dum ipsi interea, indignante licet For-tebraccio, magna mercede ad se se vocatis Nicolao Tolentinate, & Michaelotto Attendolo Cutiniolensi, quorum nobile erat nomen, et laus rei militaris maxima, ad exercitus vires augendas omnem curam intendebant. Vario Marte pugnatum est tum in Cisalpina Gallia, tum in Etruria (24), tum in Tyrrheno mari; & insignis fuit virtus, quod fortasse miraberis (nam Florentini magis ingenii acumine solertiaque, quam militari virtute celebrabantur) Ramundi Mannellii in pugna navali, quam prope Portum Delphini conferuerunt Florentinorum & Venetorum naves cum Genuensium classe. Profecto si victoria ii uti scivissent (25), magna rerum facta fuisset conversio in universa ditione

ne

ne Genuensium . Sed hoc decebat magis Florentinos , & conveniebat magnis sumptibus , quos fecerant , & motibus , quos excitaverant , ut quoniam ab Etruria discesserat victrix illa manus Picinina , inceptum conatumque Lucae subjiaciendae ad exitum perducerent . Verum dum tempus teritur excursionibus & latrociniiis , & discessu Fortebraccii (26) exercitus vires infirmantur , de pace agi coeptum est per Summum Pontificem Eugenium IV. qui Martino V. an. MCCCCXXI. successerat . Hac eadem de causa Martinus ipse , paullo ante quam moreretur , illum prudentissimum pacificatorem Nicolaum Albergatum Cardinalem , legatum ad Florentinos miserat ; sed quia non ignorabant hi non amico in se esse animo Pontificem , & quia ad gloriam Reipublicae pertinere arbitrabantur vindicare hostium conatus , ea responderunt , quae non magnam spem concordiae afferebant (27) . Submissius se se gesserunt cum Eugenio , quem multis nominibus sibi amicum & benevolum fore confidebant . Itaque & legatos ad eum misere , & quae ipse hortabatur pronis auribus ausculta-  
runt .

Sed non mediocriter studium , quod Pontifex aperte significabat erga Mediceos , Florentinos et Veneros suos ( nam ipse familia Condulmeriorum , non illa patricia , sed tamen honestissima Venetiis natus erat ) magis ab his avertit Senenses ceterosque , quibus prohibere Lucentes a periculo cura erat . Remoratus est etiam spes

Florentinorum Sigismundi Caesaris in Italiam adven-  
tus, qui idcirco se venisse dicebat, ut Romae coronam  
a Summo Pontifice acciperet, utque pacem Italiae red-  
deret. At suspicioni maleficii materiem dabant legati  
ad eum missi ab Mediolanensium Duce, atque odium,  
quod habere videbatur in omnes eos, qui illi inimici  
inensique essent. Acriter ab eo reprehensi Florentini  
per litteras Lucae id. Junii an. mccccxxxii. datas, quod  
injustum bellum suscepissent, neque ad se legatos mi-  
sissent, usi sunt excusatione temporis & necessitatis (28)  
exaceruntque stilum ad exagitandum infidum Medio-  
lani Ducis ingenium, quod per eum nihil earum rerum  
raturum fuisset, quae constitutae fuerant, quando pax  
Ferrariae convenit, quodque hostiliter semper se ges-  
serit in Rempublicam, usque eo, ut hujus ad Sabau-  
diae Ducem Legatum (erat hic Pallas Stroctius) quod  
nomen apud omnes vel barbaras nationes sanctum in-  
violatumque semper fuisset, retinere & in vincula co-  
njicere non dubitaverit. Litteras etiam dederunt ad Ro-  
mani Imperii Electores (29), ut se excusarent in eo, in  
quo accusabantur a Caesare, non quod hunc pecuniae  
omnisque rei egentem admodum timerent, sed quia ve-  
rebantur, ne injuria fieret Florentinis, qui mercaturam  
faciebant in Pannonia aliisque Germaniae regnis. Eodem  
tempore hortati sunt Pontificem, videret ne quid Cae-  
sar Romae turbaret suo & Basileensis Concilii nomine,  
cujus artes & machinationes cum ipsi Pontifici in pri-

mis, tum bonis omnibus suspectae esse debebant (30). Ceterum Florentinis facile fuit Caesari, Pontifici ceterisque ad pacem hortantibus probare, se ab hac minime abhorrere, cum hujus rei causa Ferrariam, quae urbs veluti quoddam pacis templum facta esse videbatur, incunte vere anni MCCCXXXII. Cosmum atque Pallantem Stroctium misissent (31). Pax tamen non convenit nisi exeunte Aprili insequentis anni, ea inter ceteras conditione, ut Florentini et Lucenses ea omnia recuperarent, quae tempore belli amiserant. Haec res maxima laetitia affectit populum Florentinum, quod tandem a continuis bellis conquieverit, per quae multum infirmata ac diminuta esse videbatur Mediolanensium Ducis potentia.

Reconciliata pace, quod plurimum in civitate poterat Cosmus, auctor fuit ut leges ferrentur salutares ad coercendam voluptatem, & seminarum luxum, ne quid a faciendis nuptiis cives abduceret, & ad continendam Hebraeorum avaritiam (statutum enim est quantum foenoris capere possent) qui saepe Florentia expulsi, postremo an. MCCCXXX. propter pestilentiam revocati fuerant. Cautum etiam ne serperet superstitio, quae religionem imitatur (32). Quanquam praeteriti belli sumptibus, propter quos, querente licet Romano Pontifice (33), ne immunia quidem fuerunt clericorum bona, magnis in angustiis esset publicum aerarium, ea tamen erat fortuna Reipublicae, ut faci-

le pristinum robur recuperaret. Florebat ipsa mercatura (34), & illa praesertim quaestuosissima permutandi pecunias, cum Florentini mensas haberent in praecipuis Europae urbibus, & incredibili essent solertia ad omnem mercedem & lucrum; mercabantur ab exteris quod statim venderent; tota Europa spargebant operatum lanca tum serica, quae singulari artificio texebant, ornabantque argento & auro, quorum venditorum artem non multo ante aut per se repererant, aut ab aliis didicerant eorum cives Georgius Nicolai Dantis, & Thomas Dominici Borghinii FF.; ex vinis, quae vetustatem & navigationem ferebant, aliisque terrae fructibus non parum lucri faciebant; devehabant ad nundinas & praesertim ad illas Belgicas tum suas tum aliorum merces, & ex ultimis terris, & ex omnibus provinciis exportabant ea, quae essent aut ad usum meliora, aut ad speciem pulchriora, aut ad luxum ornatiores; quae dum faciebant nullo neque periculo, neque incommodo deterreri videbantur, quo se et patriam ditarent. Luxuria & ignavia, pessumae artes iis, qui eas colere, quaeque plurimis imperiis ruinam attulerunt, minime officiebant Reipublicae: ii enim erant mores Florentinorum vel ditissimorum, quod me de Cosmo praesertim praedicare iudicabis, ut in re domestica continentiae & moderationis, in publica dignitatis laudem quaererent. Illi ipsi sumptus, qui in administratione Reipublicae fiebant, erant moderati,

ut cernerent omnes civitatis dignitatem et decus feruari, pompae & vanitati nihil tribui (35). Merito etiam hac ipsa de causa celebrabantur Florentini, quod adeo florent apud eos artes illae, quae ad graphicen pertinent, & praesertim pictura, sculptura atque architectura, ut has tanquam a magistris ceteri ab illis discerent. Cui enim incognita sunt nomina Dellii, Robbiae, Ghiberti, Masolinii, Masaccii, Donati seu Donatellii, Brunelleschii, Michelotii, Joannis Faesulani, &, ut de multis aliis sileam, Albertii, qui non praecleari artifices modo, sed & nobilissimarum artium aut inventores, aut restitutores, aut perfectores putantur? Nec minus studia & artes illae colebantur, in quibus non tam libera quaedam animi delectatio, quam utilitas quaeritur necessaria. Itaque magna mercede Florentini ad se vocabant eos, qui in medicina & juris prudentia excellere putabantur, nec facile illos ab se se discedere patiebantur, cui rei argumento esse possunt, quae de Panormita Venetis et Bononiensibus (36), de Sermoneta Senensibus (37) responderunt; & si ex urbe egredi & in exilium proficisci iusserunt Franciscum Philclphum Tolentinatem, cui publice Dantem interpretanti maximos honores atque beneficia contulerant, fuit haec iustissima poena illius turbulentis, iracundis & ad omnem sermonem liberi ingenii (38). Praeunte omnibus exemplo suo Cosmo, comparabantur, exscribebantur rari et pretiosi codices, hu-

jusque rei causa longae suscipiebantur peregrinationes, multi excitabantur ad scribendam historiam, ad collendas poësin, eloquentiam ceterasque humaniores litteras, neque Italicas modo, sed & Latinas ac Graecas; & cum ante alios omnes florent Leonardus Brunius, Carolus Marfuppinus Aretini, Ambrosius Traversarius Camaldulensis monachus in Aemilia natus, Poggius Bracciolinius e Terranova, Nicolaus Nicolaus Florentinus, hi omnes nullo non honore, qui solus alit artes (omnes enim gloria incenduntur ad studia, jacentque ea semper, quae apud quosque improbantur) afficiebantur, praedicatore maxime ac teste Cosmo, in ejus amore ac studio conquiescebant. His de causis multi Florentiam (tum enim fielebat Gymnasium Pisianum, cum crudeliter nimis de florentissimae urbis exitio atque interitu cogitassent Florentini) tanquam ad mercaturam bonarum artium confluebant; in qua tot ornamenta in ingenio & industria posita lucebant adeo, ut nulla Italicarum urbium cum illa aequari posset. Si quid improbandum erat in tot viris ingenio & doctrina praestantibus, illud erat unum, quod non effugiebant crimen invidiae & obrectationis, quibus vitii cumulatæ esse videbatur illa eruditissima & florentissima natio.

Sensit id Cosmus, qui, etsi universa Respublica pluris illi semper fuerit quam Vexilliferatus ceteraque liberae civitatis munia, & majore semper cura illam



administraverit, quam haec petierit, & virtute, liberalitate atque innocentia infinitas suas tutari divitias studuerit, & benefacta sua pluribus processerint, non effugit tamen suorum malevolentiam, cujus acriores morsus ipsa pax, qua civitas fruebatur, efficiebat. Tempore etiam belli Nicolaus Barbadorius egerat cum Nicolao Uzzanio de pellendo ex urbe Cosmo, quod unum ad libertatem tuendam, ad concordiam civitatis, jugendosque Patribus plebis animos maxime conducere ajebat. Multis precibus rogavit eum, ut consensu bonorum, qui libertatem civium in suam hominem ambitiosum convertisse servitutem conquerebantur, vinci se pateretur, remque auctoritate sua, qua certe maxime pollebat, ut nemo ei par poneretur, aut perficeret, aut saltem adjuvaret. Quamquam Uzzanius esset mirificus nobilitatis fautor, ac propterea Mediceis insensus, quia tamen valebat sapientia ac prudentia, ea attulit, quae dehortabantur Barbadorium a suscepto consilio, quod non solum periculosum, sed etiam stultum propter civitatis mores, Reipublicae statum, & copiam eorum, qui Mediceis favebant, esse dicebat. Contulit etiam inter se mores & facta Cosmi & Rainaldi Albitii, a quo minime dubitabat tantam invidiae flammam praesertim accendi, ut probaret multo majora ab hoc mala timenda, cujus audacia, atque ambitio non solum argumentis, sed etiam certis testibus tenebatur, quam ab illo, qui ad summam

amplitudinem pervenerat beneficentia atque liberalitate; tanta vis est probitatis & virtutis, ut eam etiam in inimico diligamus. Haec atque alia hujusmodi valuerunt ad frenandum Barbadorii furorem, neque multo post Uzzanius, vir sane plenus fidei & consilii & caritatis in patriam, ex hac vita migravit. Sed compressum odium, & vis improborum in Cosmum magis erupit, cum, sublato e vita Uzzanio, Albitius Reipublicae administrandae principatum obtinere se posse speravit, & cum creati ii magistratus fuerunt, qui Mediceis inimici esse putabantur. Praerat omnibus dignitate Bernardus Guadagnius, cum quo, vel antequam Vexillifer declararetur, saepe questus fuerat Albitius de injuriis, quae per Cosmum, ejusque amicissimos consiliarios Averardum Mediceum & Puccium Puccium, viros, ut ipse aiebat, versutos, fallaces, depeculatores, & ad omne facinus paratissimos, primariis civibus inferebantur. Hic igitur & sua sponte motus, & lingua Albitii, quasi flabello seditionis, ventilatus, ubi summum honoris gradum adeptus est, non dubitavit publicam causam suscipere, & cunctantibus collegis, adversus Cosmi aliorumque Mediceorum potentiam de summa Reipublicae referre. Cum autem aliis criminibus, tum maxime Lucensi bello, cujus fuerat suavor, & propter quod Respublica Florentina insignes calamitates & clades perpeffa fuerat, in odium offensionemque vocabatur. Is itaque eo tempore, quo  
de-

declinandae, aut saltem levandae invidiae causa rus concesserat, in iudicium venire jubetur. Quanquam suaderent amici & propinqui ne pareret, ipse tamen recte factorum conscientia fretus, iudicium subire minime recusavit. Cum igitur in Curiam venisset, secum nihil asserens nisi animi constantiam et fortitudinem, in carcerem arctissimum contruditur. Quod ubi auditum est, plebs atque necessarii Cosmi aestuare, plures ex vicino apennino ad vim faciendam parati in urbem introire, & ille praestantissimus belli dux Nicolaus Tolentinas, qui stativa in Etruria habebat, appropinquare cum sua manu Florentiam, ut opem amico ferret, & tantam invidiae flammam ab ipso averteret. Qui Cosmi vitae nullum constare periculum volebant, vi minime rem gerendam putarunt, confidentes haud passuros Patres, quem virtutis gloria ad caelum extulerat, eundem inimicorum perfidia oppressum ad supplicium rapi. Porro Novemviri sibi maxime invidiosum fore censescentes, si tantus civis, paucorum solum suspicione reus factus, nec publico iudicio damnatus interiret, mandant Friderico Malavolto homini fide & nobilitate spectatissimo, ut ejus corpus & carcerem custodiat. Tentatus hic quidem fuit, ut ipse aut mortem pararet Cosmo, aut ab aliis parari sineret, sed nihil unquam generoso & fideli homine indignum se facturum constanter respondit. Quod illam Cosmus sibi, tanquam Tantalo saxum, impende-

E

re arbitrabatur, suum malum gemebat, & innocentiam suam superis commendabat. Ab omni etiam ferme cibo totum quatrimum abstinuit, timens ne in eo lateret venenum. Tum Malavoltus cohortatus est eum, ut bono animo esse vellet, cum & in Curia, & in urbe amicissimi cives, quibus illius salus cordi foret, minime deessent. Ut vero omnem veneni suspicionem tolleretur, cum eo se coenare velle dixit, quod & fecit, delibatis singulis dapibus, & convivium hilarante homine faceto & dicaci cognomento Farganaccio, qui se ipsum ad coenam invitaverat. Quod hic erat Vexillifero familiaris, cum eo colloqui secreto concupivit Cosmus, idque facile a Malavolto impetravit. Vehementer etiam atque etiam ipsum rogavit, ut salutem suam Guadagnio commendaret, addiditque precibus promissa & dona, cum ei syngraphum dedisset, quo jubebatur Praefectus Xenodochii S. Mariae Novae centum supra mille florenos eidem de sua pecunia solvere. Postridie scurra Guadagnio mille florenos detulit, reservavitque sibi, ut jussu Cosmi, centum, quod munus sane plus valuit ad placandum Vexilliferi animum, qui saepe pecunia egebat, quaque corruptus ab inimicis Cosmi antea se se & dignitatem suam venalem habuerat, quam ipsa bonitas acquitasque causae (39).

Interea Albitius multitudinem hominum cogit atque secreto armat, & liberae jam voces multorum in foro audiebantur, qui severe vindicandum in homi-

nem contendebant, quo superstite tyrannidem existere necesse erat. Facile fuit hos comperere, propositumque per Novemviros, uti nova, sicuti loquebantur, crearetur *Balia* ad anni usque exitum duratura, quae ducentis & amplius civibus constaret, cujusque eadem potestas esset in administratione Reipublicae, ac universi populi Florentini. Hac creata, dictae a nonnullis gravissimae de Cosmo fuerunt sententiae, sed Vexillifer vota caput illius deposcentium, magnamque iudicii expectationem ad suum arbitrium elusit, decretumque ut ille in exilium Patavium proficisceretur (40). Eductus e custodia Cosmus, in qua septem & viginti dies fuit, quia non ignorabat tumultuari adversae factionis principes, & graviter de lata sententia queri, ad conciliandos sibi Patrum animos hanc orationem habuisse dicitur. *Si spes ulla ostenderetur fore ut calamitate mea juugetur plebis & optimatum animi, non exilium solum, sed & ipsa mors gratissima & optatissima mihi esset, quod haec naturae debita, si reddatur pro patria, laudem pariat immortalem. Verum, proh dolor! adeo degeneravimus a majoribus nostris, qui parvo contenti liberae civitatis munia locupletibus cum plebe communia esse voluerunt, ut in quibusdam neque potentiae modus sit, neque reliquarum cupiditatum, quas nullus honor, nulla fortuna vel improbe parta minuit, sed augeat potius atque inflammat. Quod his obviam iverim, & populi jura defenderim, non crimini, sed laudi*

daudum mihi esse arbitror. Verum quia voluntate vestra, Patres amplissimi, cogor exulare a patria, quae mihi vita semper carior extitit, & cui me totum tradideram, uolo quis vestrum mei misereatur sed temporis: vel si intra barbaras nationes, omni spe reditus adempta, amandarer, ibi & patriam mihi esse iudicaret, quod nunquam deponerem pristinum studium vobis gratificandi, & bene de meis civibus merendi. At quia non magis pietas, quam bona existimatio mihi cordi esse debet, nolite, quaeso, pati ut mihi vis inferatur ab iis, qui forum couplent, & obsident Curiam armati, quique nisi meo sanguine placari non posse videntur. Si per eos mortem occumberem, multi sane existimare possent, me vitam nefario aliquo scelere foedasse, etsi mihi nullius culpae conscius sim. Vos etiam omnium meorum in Rempublicam studiorum & officiorum testes esse potestis, nec vos modo, sed & ipsum Deum Optimum Maximum testem appello, quod neminem bene de Republica sentientem laeserim, quod nihil unquam oneris recusaverim ( si onus est id appellandum, quod cum laetitia feras ac voluptate ) ut commodis utilitatique patriae seruirem, quod neminem ab illius studio & caritate abduxerim, multos illi e contrario conciliauerim, & vel oppida in publici aerarii angustia mea pecunia illius ditioni adjunxerim. Si igitur nullum factum dictumque meum contra utilitatem communem ( etsi quaedam contra voluntatem nonnullorum fuerint, nec semper bene coeptis fauerit fortuna ) vere re-

*ferri potest, cur in simulabor majora me concupivisse, quam privatum civem deceat? Quis vestrum ignorat me nunquam in Curiam nisi accitum venisse, nunquam petiisse honores, ac sponte delatos sic accepisse, ut non inutilis esse judicaret, studuerimque semper civium animos sociare non divellere, atque omnes aequitate eadem continere? Quid multis? Omnia mihi laeta fuerunt, quae a vobis in me profecta sunt beneficia, & quantum meae vires tulerunt, iis ut responderem laboravi; ipsumque exilium, quod multis calamitosum videbitur, in benefactorum numero reponam, quod per illud pejora mala ab hominibus teterrimis mihi parata vitaverim, & quod sperem illud mihi, ut & aliis multis praeclaris civibus, gloriae fore. Reliquum est, ut Deum immortalē precer, ut vos incolumes, Rempublicam florentem servet, meque, qui communem causam, populi jus, vitam meam omneque meas fortunas in vestra fide ac religione depono, fortem & constantem in optima ratione vitae semper esse velit. Dum haec diceret Cosmus, eminebat in eo patrius amor, seque ipsum solabatur, cum conscientia bonae mentis, tum lacrimis ejus vicem dolentium: Noctu exeunti e Curia stipatores ex praetoria cohorte dati sunt, qui cum adversus inimicorum gladios protegerent, inviolatumque ad Etruriae usque fines deducerent. Exilii poena una cum Cosmo inulcrati fuerunt ejus frater Laurentius, Averardus Mediceus, Puccius & Joannes Puccil, qui, si postremum excipias,*

omnium ejus consiliorum participes esse solebant, alique plures e Mediceorum praesertim familia. Non idem tamen exilii locus, neque idem exulandi tempus omnibus praescriptum, neque una de Cosmo lata sententia fuit; qui quidem primo per annum, mox per quinquennium, postremo per decennium Patavii exulare jussus est. Decretum etiam ut Medicei omnes, filiis tantummodo Veri exceptis, inter magnates perpetuo haberentur, quo decreto ab omnibus publicis officiis & muneribus excluderentur: nam ad haec tantummodo admittebantur cives, qui in artium collegia essent relati, quae viginti & unius numerum explebant, ex quibus septem, quod liberaliores erant, majores artes placuit appellari.

Discessu Cosmi, qui accidit v. non. Octobris an. mccccxxiii. & qui victi fuerant, & qui vicisse putabantur, magno in timore esse coeperunt. Illi tangebant dolorem, quem & necquicquam, & non sine periculo ostendissent; hi irati increpabant Patres, quod siverint se ad lenitatem & misericordiam adduci, quando res ipsa severitatem flagitabat. Albitius praeter ceteros denunciabat populo Florentino servitatem, sibi suisque pericula & mala, quod e vivis minime sublatum fuisset Cosmus: ajebat satius fuisse rem non inchoare, quam inchoatam ad exitum minime perducere, cum in judiciis de majestate quidquid remissum est, id omne in Reipublicae perniciem verti ne-



cesse sit , nec videri eos damnari , qui cum capite plectendi sint , exilio mulcentur , sed provocari potius , cum in iis injuriæ memoria animi vin atque iracundiam , & domesticæ copiae vires ad injuriam persequendam , consilium magnitudo ingenii suppeditare videatur : hoc unum se his periculis remedium arbitrari , mutationem status civitatis , sic ut nemo amplius studio & suffragio plebis , quæ omnia venalia habere solet , viam sibi ad obtinendum principatum munire posset . Tum quo quisque asperius in Cosmum locutus esset , eo spes gratiæ major erat , & donati præmiis omnes ii fuerunt , qui illius pellendi e patria suafores auctoresque fuerant . Ceteros inter Vexillifer Præfectura Pisarum auctus fuit , & quod ipse aliquando , ejus fratrumque filii , quia debitam propter tributa Reipublicæ pecuniam ad diem non solvissent , inter aerarios relati , privatiq; propterea fuerant jure ferendi suffragia , gerendique magistratus , quod cerni in speculo dicebatur , ut hac nota liberarentur decretum fuit . Visum est etiam ad præsentem rem pertinere , ut augeretur potestas illius magistratus , quem vindicem criminum majores nostri esse voluerant . Sic enim facilius ii contineri posse putabantur , qui Cosino favebant .

Hic , qui maximo semper animo fuerat in prospera fortuna , non minori fuit , quod difficilius est , in adversa . Suadentibus ut ex itinere in patriam rediret ,

hoc boni civis respuere fidem respondit, cui Magistratum iussa aequae sacra ac Dei esse debebant, vimque armorum ad ulciscendos externos hostes reservandam. Ipso in itinere vidit multorum in se studia atque officia, ut haec calamitatem suam non modo levarent, sed etiam honestarent. Ferrariae Marchio Nicolaus Atestinus, qui ut in custodiam Cosmum traditum fuisse audiverat, deprecatores ejus salutis Florentiam miserat, transcunti per Mutinam urbem aliaque ditionis suae loca singulares haberi honores jussit. Veneti vero, qui eadem de causa, tribus primariis civibus ad Florentinos legatis, mirifici fuerant ejus dignitatis defensores, non secus ac si ejusdem calamitas ad decus Reipublicae pertineret, tanto studio, amore, animo ingredientem eorum urbem profecuti sunt, ut is non exul, sed de inimicis nobilem triumphum agens ad eos venisse videretur. Cum Senatoribus, qui obviam illi processere, erat Laurentius Mediceus, qui paullo ante Venetias exulatum venerat. Postridie Cosmus Duce[m], ceterosque, qui primi erant in administratione Reipublicae, adiit, omnibusque gratias egit, quod eorum studio atque auctoritate, dum vi, ferro, metu, minis obsessus tenebatur, ex capitis periculo ereptus fuerit. Quod vero hoc beneficium singularibus honoribus cumulaverint, tanti id se putare affirmavit, ut nihil gloriosius haberet, quod posteris relinqueret, omnisque aetas sibi futura esset ad eorum erga

ga se divina merita praedicanda atque recolenda. Biduum Venetiis fuit, quod venerat tempus, quo esse Patavii jubebatur (41). Comitum itineris habuit primaria nobilitate hominem Jacobum Donatum, a quo magnificentissimo hospitio acceptus fuit. Decreverant enim Veneti, ut in illa urbe non tanquam peregrinus & exul, sed tanquam civis, & patriae suae legatus amplissimus haberetur. Nec minori voluntate ac studio ii se se gesserunt in Laurentium, ut patroni ac tutores vitae, fortunae, memoriae, nominis Mediceorum constituti esse viderentur. Ipsorum etiam auctoritate, cum hac de causa legatum Florentiam misissent Andream Donatum, obtentum est, ut Cosmus ubi vellet commoraretur, dum non egrederetur e Venetae ditionis sinibus, & ab urbe Florentia centum & septuaginta millibus passuum abesset. Itaque, exeunte an. mccccxxxiii. sedem suam Venetiis collocavit, qua in urbe ita se vivere aiebat, ut patriam minime requireret. Venit ad eum aliquando, dum familiae suae praefecturam gerebat, vir ille summus & singularis Ambrosius Camaldulensis, qui obstupuit adeo ob beneficia & honores, qui impertiebantur Mediceis Fratribus, ut quas de iis ad communes amicos dedit litterae, plenae essent laetitia, gratulatione et praeconiis Venetorum, qui dum malum eorum gemebant, & iratorum hominum, non constantis Senatus iudicium aperte detestabantur, ad dignitatem suam pertinere judicarunt, ut iidem

a se se non modo perliberaliter, sed etiam ornate cumulateque tractarentur (42).

Et si cavebat Cosmus, ne extra modum lautus & sumptuosus appareret, quia tamen illum quidquid excelsum & magnificum erat delectabat, ut Venetiis monumentum aliquod existeret grati animi sui, liberalitatis & amoris in litteras, suis sumptibus bibliothecam Benedictinorum, qui incolunt monasterium ad S. Georgii, usus Michelottio architecto, aedificandam curavit (43). Excipiebat fatis splendide qui domum suam ventitabant, & multi sane fuerunt, qui ex vicinis urbibus Venetias profecti sunt, ut magnum virum fluctibus Reipublicae exclusum in alienis terris jacentem videre & solari possent. Et si vir amplissimus, cui nihil erat quod roganti concedi non debere videretur, pro aliquo supplicavit, fuit semper ejus rogatio gratiosa; sed videbat ad vitandum vitium arrogantiae, ne tam gratia, quam eaussa rogandi valeret, quapropter, dum multi ejus officiis & misericordia laetati sunt, nemo injuria doluit. Hae artes, & frequens commemoratio beneficiorum, ac declaratio amoris erga parentes & custodes suos, & sensus illius de Republica, de qua saepe consultus fuit propter conjunctionem, quae jamdiu erat Venetis cum Florentinis, mirifice omnium ordinum animos in ipsam confirmarunt. Sed tanta honoris aura minime quidpiam imminuit de caritate patriae (44). Extant enim litterae eorum, qui gubernacula Reipublicae tra-

ctabant, ex quibus conjici potest illos doctos fuisse a Cosmo de iis rebus, quas scire maxime intererat (45) & gratissima iisdem fuisse amantissimi civis officia. Quamobrem vel ii, qui existimabant illum vel debilitata virtute, vel fracto animo esse propter calamitatis magnitudinem, se vehementer errare intellexerunt. Tum Cosmus sperare coepit fore, ut in se mutarentur nonnullorum voluntates, nec deerant sane amici, qui allicere alienas, retinere partas, placare turbatas magnopere laborabant. Fuit & in illorum numero magnus ille jurisconsultus Antonius Minuccius e Prato Veteri, qui quod multa audacter fecerit, ut Cosmus redderetur patriae & suis, ampla domo, pecunia, aliisque praemiis ab ipso donatus fuit. Jam populus minime obscure Cosmi desiderium ostendebat, ac palam multi dictitabant actum fore de Republica, si ii, qui in illa versati erant utiliter, & quorum existimatio gravis habebatur, improborum irae atque libidini devoverentur. At qui illi ex animo erant amici ad utilitatem ipsius pertinere arbitrabantur, in tanto impetu studiorum & motu temeritatis modum, consilium & rationem adhibere, ne qui aliena peccata se punituros profitebantur, facile ipsis peccare liceret. His de rebus omnibus diligentissime Cosmum certiore faciebat Angelus Acciajolius, qui veteres cum Mediceis fratribus inimicitias, multis, ac praesertim Francisco Barbaro & Minuccio instigantibus, plane donaverat Reipublicae (46); cum

qua illorum rem & caussam conjunctam esse intelligebat. Is, ut quod nuntiabat amicis laetius esset, affirmabat illos brevi ad suos redituros, si Nereum Capponium sibi conciliassent, & bellum aliquod commoveretur, unde ipsis patriae et consilio & pecunia, sicuti antea fecerant, juvandae facultas daretur. Interceptis litteris, non defuit causa severi exercendi iudicii, quo decem annorum exilio Acciajolius summa in familia natus, & animi satis magni & consilii damnatus est. Saevitum etiam est eadem de causa in ignobilem quemdam artificem, nomine Silvestrum, qui, quod periculo suo juvisset Cosmum, elatus postea ad nobilitatem & gloriam fuit.

Interea tempus ab studiosis Cosmi expectabatur, dum Reipublicae clavum tenerent homines aequi & in ejus partem propensi. Id evenit kal. Septembris an. MCCCCXXXIV., quo die renunciatus fuit Vexillifer Justitiae Nicolaus Cocchius, Priores vero (sic enim vocabantur, qui secundum post illum locum tenebant) Joannes Capponius, Lucas Pittius, Petrus Dinius, Fabianus Martinus, Simeon Guicciardinius, Thomas Redditus, Balthasar Chiaruccius, ac Nereus Bartolinius. Hi, quorum plerique de turbato per optimates civitatis statu antea aperte questi fuerant, ut magistratum inire, tantum animi addidere Cosmianis, ut hi non solum libere, sed etiam ferociter de adversariis loquerentur. Tum Albinius diffidere rebus suis coepit, neque erat dubium quin

is, qui superbum se prae buerat in fortuna, huic ipsi tandem cedere ac succumbere deberet. Sed quia illum nunquam deseruit audacia, ad extrema descendere minime dubitavit. Cogit armatos, laudat promptos, dubios confirmat, segniores castigat atque incitat. Completur forum S. Apollinaris tumultuantibus, qui non solum Albitium amentiae ducem habebant, sed etiam Rodulphum Peruzzium atque Nicolaum Barbadorium. Multum confidebat Albitius Joanni Guicciardinio & Pallanti Stroctio, sed ille domi se continuit, hic cum duobus tantummodo famulis, nec equo vectus, nec armis tectus in forum venit. Eorum vocibus & concursu perterriti Novemviri vocant ad se se primarios quosdam viros, qui quo minus cupiditatis & studii habere videbantur, eo plus auctoritatis habebant. Hi quidem nihil non egerunt, ut rem ad otium deducerent; hortantur Albitium ceterosque illius factionis, ut ab armis discedant, de revocando ab exilio Cosmo nihil actum affirmant, seque Reipublicae non defuturos pollicentur. Superbe ad illa respondit Albitius; si qui Cosmum respicerent, & ejus gratiam sequerentur, ut superioribus fecerant temporibus, neque omnis iis, qui tum Rempublicam administrabant, abrogaretur potestas, se profecto sibi fuisset consulturum. Quando hac tempestate jactabatur civitas, commorabatur in ea summus Pontifex Eugenius IV. qui praesidio Florentinorum tectus, atque ab iis

liberalissime invitatus, paullo ante in Etruriam fugerat, ut pericula, quae ei a Romanis ipsis, a Nicolao For-  
tebraccio aliisque adversariis impendebant, vitaret (47).  
Suae hic dignitatis & paterni in Cosmum animi esse  
putavit, si se in istam pacificationem interponeret. Vo-  
catis igitur ad se se Albitio aliisque factionis principi-  
bus, per Joannem Vitelleschium Recanati Episcopum,  
cui non tam Pontifex, quam Cosmus ipse plurimum  
tribuebat, eos amantissime adhortatus est, ne sinerent  
patriam crudelibus lacerari discordiis & nullum pu-  
blicum consilium esse, sponditque perpetuam suam  
in libertate Reipublicae & illorum salute tuenda cu-  
ram. Si qua fides esset Philelpho (& nullam cer-  
te meretur in iis, quae de Cosmo affirmavit) tum  
Albitius eam orationem habuit apud Pontificem, qua  
nihil eloquentius, nihil accommodatius ad tempore,  
nihil opportunius ad patefacienda exagitandaque  
Mediceorum vitia ac crimina, & ex qua totum ferme  
secundum librum operis *de exilio*, de quo supra  
mentionem fecimus, ille composuit. Albitius quidem  
studuit ab se se remove suspicionem criminis, de quo  
haud injuria a Pontifice ipso aliisque multis accusaba-  
tur, egisse se cum Insubrium Duce, qui semper infi-  
dus & adversus Florentinis fuerat, de prodenda illi  
patria; & dum vim, potentiam, factiones, divitias,  
clientelas, affinitates Cosmianorum proferebat, adesse  
diem affirmabat, quo funditus universa Respublica ef-



set evertenda. Quod multi ex Mucellano agro, ex al-  
pibus, & ex Aemilia Florentiam convenerant armati,  
civitatem & Mediceos defendendi causa, ut ii nume-  
rum fere trium millium explerent, minime ausi sunt  
Albitius, ejus Filius Ormannus & Rodolphus Peruz-  
zius egredi e coenobio Dominicanorum, quod S. Ma-  
riae Novellae dicitur, in quo habitabat Pontifex. Ce-  
teri, qui illos comitati fuerant, nocte intempesta, mu-  
tatisque vestibus, huc illuc aufugerunt, atque arma po-  
fuerunt.

Haec priusquam acciderent, Cosmus Venetiis Flo-  
rentiam miserat Antonium Martellium, qui non mo-  
do privatorum negotiorum, sed etiam consiliorum de  
Republica fidelissimus socius illi erat, ut exploraret  
Novemvirum animos, quos sane in amicum propen-  
sissimos invenit, quare illi significavit, ut maturaret  
ab urbe proficisci. Ita discessit a Venetiis suis iii. kal.  
Octobris an. mccccxxxiv. una cum fratre Laurentio  
(non venit cum iis Averardus Mediceus, quia febris  
laborabat) ut omnes dicerent, illum unum esse dignum  
principatus in patria sua, significarentque se illi ami-  
cissimos fore. Postridie cum venisset Ferrariam, ita ac-  
ceptus fuit, ut nemo honoratius, nemo prolixius. Nam  
Nicolaus Atestinus Marchio non modo omnem suam  
operam, sed & milites ultro illi obtulit. Cum magno  
horum comitatu, sumptus faciente itineris ipso Nico-  
lao, per Mutinenses montes ingressus est in Etruriam co-

dem post annum die, quo ab illa discedere coactus fuerat. Subsedit in Careggiano, ita iubentibus vel potius suadentibus Novemviris. Nam quamvis factum fuisset decretum, cœli ferine civibus suffragia ferentibus, & præsentibus Episcopis, qui in aula erant Pontificis, de illo in patriam & in pristinam dignitatem restituendo, illudque honorificentissimis sane verbis perscriptum (48), non convenire tamen putabatur præsentibus Reipublicae temporibus, ut magnus populi motus fieret, quod sane evenisset, si quem tantopere desideraverat ingredientem urbem vidisset. Quia tamen expectabatur, magna hominum multitudo compleverat vias, cujus declinandae gratia noctu & per devia in Curiam venit (49). Omnino illum sic patria accepit, ut lucem salutemque redditam sibi ac restitutam arbitraretur; & dum Cosmus gravi & eloquenti oratione magnitudinem beneficiorum, quae cives sui in se, fratrem atque liberos suos contulerant, persequeretur, seque ad Rempublicam bene gerendam incensum ostendebat, tanta eluxit significatio laetitiae & voluntatum omnium, ut non solum ei calamitatem detraxisset, sed etiam dignitatem auxisset viderentur. Etsi homini nihil est magis optandum, quam prospera, acquabilis, perpetuaeque fortuna, secundo vitae sine ulla offensione cursu, tamen si Cosmo tranquilla omnia & pacata procesissent, nunquam ad tantam amplitudinem pervenisset, ut non solum ipse perpetuo esset

set moderator & rector omnium de Republica confiliorum, quasi omnia unius viri arbitrio gererentur, sed etiam ut posteris suis viam sterneret, qua ad civitatis imperium pervenire possent. Est quidem magnus in hoc hominum consensus, qui de rebus horum temporum scripserunt, nulla unquam in civitate, quae amissa jura libertatis uni homini permisisset, quemquam vi & armis, sicuti Cosmum in ea, quae libera esset, & quae de libertate retinenda maxime laborabat, auctoritate gratiaque praestitisse. At ne quis eum insimulare posset nimiam potentiam appetere, obstabant summa hominis gravitas ac prudentia, & praesertim ars moderate & scienter utendi fortunae bonis, potentium gratia, & amicorum studiis, ut pari ac aequo jure cum ceteris frui, & communi consensu & conjuncta cura cum omnibus civibus incolumitati & incremento Reipublicae consulere videretur.

Profecto magni interfuit ad ejus auctoritatem augendam confirmandamque poena, quae sumpta est de iis, qui ad illius perniciem conspiraverant. Vel antequam ipse redderetur patriae, pulsus in exilium fuere Rainaldus Albitius, ejusque filius Ormannus, quem consuetudo & disciplina a paternis vitiis degenerare non siverat, Rodolphus Puccius cum liberis ejus & Donato fratre, Rainaldus Janfiliazzius, Rodolphus Peruzzius, Andreas Rondinellius, Petrus Ardinghellus, Zenobius Belfredellius, Matthaeus Benitius, Attavianus Pe-

pius, Guido Balduinettus, Nicolaus Barbadorius & ille Pallas Stroetius, qui inter suos excelebat ingenio & doctrina, & in litteratos homines studio, quorum nonnullos ita alebat domi, ut non secus ac liberos diligere videretur. Ad illius calamitatem levandam (hominis dignitas & virtus facit, ut de eo pauca separatim dicamus) non mediocriter conduxit bonitas & beneficentia Thomae Calandrinii Sergianensis, qui ex institutore filiorum ejusdem Cardinalis, neque multo post Pontifex Maximus Nicolai V. nomine creatus, tanta liberalitate se se gessit in eos, quos erudiverat, ut plura a parente proficisci minime potuerint. Omnino bonus vir & mitis ingenii erat Pallas, & quamvis nunquam in patriam, quam maximis ornamentis affecerat (50), redierit, per quinque & viginti annos (tot enim postea vixit) ejus commodis, quantum potuit, suaeque gloriae servivit (51). Eminuit & ejus patientia cum exilii nuntium accepit, dissimilis hac quidem in re, ut & in aliis multis, Albitio, qui dira in Cosmum ejusque fautores evomuit, cum quibus sibi vel absenti perpetuum bellum fore palam ferebat. Jecit & voces stomachi & querelarum plenas in Pontificem, se ipsum aeriter reprehendens, quod ejus promissis fidem habuisset. Post reditum in patriam Cosmi, exilii poena mulctati fuerunt alii cives, qui suspicionibus novarum molitionum materiem dederant, unde propagatio multarum nobilium familiarum, quae longe lateque di-

spersae sunt, quaeque ortu Florentinae dicuntur. Saevitum etiam tum esset in cervicis nonnullorum, nisi pro iis intercessisset Pontifex; & Cosmus ipse gloriatur se se egisse, ne morte afficerentur Franciscus Guadagnius alique plures, qui tamen multorum malefactorum iudicio convicti, aeternis tenebris vinculisque mandati fuerunt. Sed non propterea omnem a se se culpam amovit. Dediti enim postea ad supplicium fuerunt Antonius Guadagnius Filius Bernardi illius, cuius officia, quamvis pretio redempta, salutaria fuerant Cosmo, Antonius Pierozzius, Michael Joannis, Cosinus Barbadorius, & Zenobius Belfredellius, atque hi quatuor capti Venetiis ab illius civitatis Senatu, ad quem tanquam ad aram confugere se posse speraverant, irae Cosmi se se donatos fuisse haud injuria questi sunt. Horrere soleo dum reminiscor tot aut nobilitate, aut gestis magistratibus claros viros (non libuit omnes, quod longum & ingratum fuisset, nominare) unius hominis causa, aut praesenti morte, aut turpi exilio, aut foedo carcere, aut gravissima multa, omnique privatione honorum & civilium jurium poenas dependisse Reipublicae, & istud tenebrososum tempus vitae Cosmi latere vellem. Is quidem aliquid habuit excusationis, non omnino justae, sed quae probari posse videtur. Aiebat enim se nihil crudeliter commisisse, dum summum dignitatis gradum tenuit, & quae ante & post id tempus censuerunt Ma-

giſtratus ſclerum vindices, praefentibus Reipublicae temporibus & concordiae conveniſſe. Profecto moderatio tuendae libertatis, dum aequari velle ſimulando ita ſe quiſque extollit, ut deprimat alium, in difficili eſt; cavendoque ne metuant, homines metuendos ultro ſe efficiunt, & injuriam a nobis repulſam, tanquam aut facere, aut pati neceſſe ſit, injungimus aliis. Verum ſive Cosmus ipſe, ſive ejus ſtudioſi exercuerint iracundiam in viſtos, quorum turbulenta & temeraria conſilia factaque patebant, nihil tyrannice actum ab homine arbitrabimur, qui nec poteſtate, quam ſummam habuit, neque legibus, neque divitiis, neque gratia, neque gloria unquam abusus eſt, ut imperium exerceret in liberos cives. Si quis illa, quae ipſe ſecutus eſt, conabitur carpere, dicat eundem nihil fortasse tale cogitantem, patriae ſuae ſervile jugum parasse, dum nimium familiae ſuae utilitati dignitatisque, conſulens publicae, proſpexit; quanquam eo tempore, quo Medicei dominatum occuparunt Florentinorum, ii eſſent horum mores, iſque Reipublicae ſtatus, ut nec vitiis, nec remedia pati amplius poſſe viderentur.

Hic publici conſilii dominus, quo reſtituto, ipſa civitas reſtituta eſſe videbatur, cum ineunte an. MCCCXXXV. renuntiatus fuiſſet Vexillifer Juſtitiae, facile obtinuit, ut novum decem annorum foedus Venetos inter & Florentinos Summumque Pontificem

iniretur. Id quidem maxime conducere Reipublicae rationibus putavit, quae mala timebat a Mediolanensium Duce, cum quo nisi infida pax esse poterat. Hic aegre ferens defecisse ab imperio suo Genuenses, qui illius atrocitatem indignitatemque pati haud potuerant, cumque urbis recuperandae facultatem & spem amisisset, statuit omni vi vexare non populos modo, qui erant in ditione Genuensium, sed & eos, qui iisdem finitimi erant, eorumque libertati favebant. Inflammabant etiam superbum & ambitiosum animum voces Rainaldi Albitii, qui cum illum convenisset, non destitit instare, suadere, orare, ut bellum inferret Florentinis, cum quibus agebat nullam sanctam esse posse societatem, Cosmo, viro omnium teterrimo, Rempubicam administrante. Addebat etiam, si nulla essent civium odia in hunc, quae tamen maxima erant, facile opprimi civitatem posse, aut saltem cogi, ne opem & auxilium ferret Genuensibus. Tum glorians ipsi Cosmo significavit *gallinam incubare*: cui ille: *male id posse extra vidum*, quod falsum responsum omnium sermone vulgatum laudatumque fuit. Huic vigilantibus & multa in posterum providenti opportunissimum visum est, si Franciscum Sfortiam rationibus Reipublicae magis atque magis adjunxisset. Hic non solum in Etruria natus ex concubina, quando ejus pater Mutius Attendolus, qui Sfortiae cognomen ex corporis vi, & animi audacia traxit, stipen-

dia Reipublicae merebatur, sed etiam Florentiae altus atque educatus amabat Florentinos, charosque habebat, eisque saepe utilem operam praebuit. Nam fortis animus & magnus, & summa rei militaris scientia erat in eo. Tanti hominis virtus tum maxime necessaria esse putabatur, quia mortem non multo ante obierat perfidia Mediolanensium Ducis, cujus in potestatem venerat, Nicolaus Tolentinus, qui quantus imperator, & quam firmus & fidelis amicus fuisset Florentinorum, declaratum est pompa funeris & monumento, quod in principe Aede faciendum ipsi curarunt (52). Pretio igitur & spe sollicitarunt Sfortiam, ut & copias, quas secum habebat, & quae sub Reipublicae signis militabant, duceret ad repellendos hostes (53). Ex his quidem nullus magis formidandus erat quam Nicolaus Picininius, cujus semper fuerat infidiosa amicitia, & periculosa iracundia. Hic ex Parmensi agro cum magna manu in Etruriam descendere iussus ab Insubrium Duce, non modo Sergiano, quae tum civitas in dominatu erat Thomae Fregolii, sed & aliis Florentinae ditionis oppidis, quae non longe a Macera erant, potitus est. Vim quoque ejus aut timuerunt, aut experta sunt multa Pisani agri oppida, & universa fere Apuana Provincia, in qua Malaspinæ praesertim dominabantur. Profecto singularis fuit virtus Sfortiae in ejus motibus conatibusque prohibendis, quodque his favere videbantur Lucenses, inde Cosmus oc-



caſionem arripuit eorum infidelitatem increpandi(54) novumque adverſus eoſdem bellum ſuadendi, in quo non de dignitate modo, ſed etiam de ſalute Reipublicae decerni aſſirmabat. Verum quia verebatur, ne cui obreſtatorum nimis pertinaciter Lucenſibus inſenſus videretur, utebatur excuſatione periculorum, quae & Florentinis & univerſae Italiae a Picininio imminabant, ſic ut illi qui ſaveret, communis hoſtis eſſet habendus. Hac de cauſſa miſſi legati fuerunt ad Summum Pontificem, qui a Florentinis xiv. kal. Majas an. mccccxxvi. diſceſſerat, ad Venetos, alioſque Italiae Principes, quibus etſi curae erat, ne in Etruriae viſceribus peſtis illa Picininia diutius moraretur, reprehendendum tamen videbatur Lucenſe bellum, quod aut ab ira & odio, aut ab dilataudi domini cupiditate fuſceptum eſſe apparebat.

Inter haec Coſmus, cui & patriae libertatis, & dignitatis ſuae, & poenarum ex inimicis ſatis erat, quia nihil admiſſum iri arbitrabatur, quod domeſticam tranquillitatem turbaret, milites eoſ dimiſit, qui cuſtodiebant Curiam & Forum, quique conſcripti fuerant, ut civium licentiae reſiſterent. Sed quamvis conſideret iis, qui in civitate erant, vigilabat tamen ne ſibi inſidiae ſicerent ab abſentibus; & ſane miraberis Franciſcum Philelphum, qui quondam ampliſſimis honoribus & praemiis, ut ipſius litterae teſtantur, a Florentinis et Mediccis omnibus decoratus fuerat, de

illo, Carolo. Marfuppinio, et Hieronymo Matthaei filio Forocorneliensi, qui Florentiae operam dabat medicinae, per Graecum sicarium occidendis cum exulibus, qui Senis erant, consensisse. Comprehenfus Florentiae scelestissimus homo cum fuisset, et omnium consiliorum fontes aperuisset, abscissae ei manus fuerunt, decretumque ut lingua abscinderetur Philelpho ipsi, si unquam in potestatem Reipublicae devenisset (55). Dum vero Cosmus spondebat perpetuam suam in libertate tuenda curam, et vigilantiam et fidem in bellicis et civilibus officiis, facile consequabatur, ut quae ipse expetebat, omnium suffragiis comprobarentur. Neque tum adeo fors dominabatur in mandandis Magistratibus, ut ad regendam administrandamque Rempublicam ii vocarentur, in quibus aliqua maleficii resideret suspicio; nam cum in hac re modum quendam et ordinem adhibendum censuisset Cosmus, patriae, suique rationibus mirum in modum prospexit. Sane tum is erat Italiae status, eaque temporum conditio, ut si Florentina Respublica intestinis discordiis lacerari perrexisset, neque unus vir plus quam ceteri omnes consilio et auctoritate valuisset, aut ad interitum occasumque ipsa ruere, aut magnam partem pristinae dignitatis et virium amittere coacta fuisset. Haud dubie aspirabant ad Italiae imperium Veneti et Insulubrium Dux; Neapolitanum regnum morte Joannae Reginae, quae sine liberis decesserat, vacuum fra-

Alphonfus Aragoniae Rex & Renatus Andegaviae Dux armis petebant, horumque factiones omnia miscere velle videbantur (56); Romanus Pontifex fortunis pene omnibus spoliatus, coactusque vagari in alienis terris, nullum ferme locum habebat ubi tutus ab inimicis consisteret; non modo eminebant, sed etiam dominabantur in illius ditione Braccianorum & Sfortianorum factiones, quarum Duces Nicolaus Fortebraccius, et Franciscus Sfortia civitates & provincias armis subegerant & in potestatem suam redegerant; Genuenses & Bononienses omnia implebant sanguine, dum de ruenda libertate laborabant; quanta demum infidelitates in amicis, quanta facilitas ferendi bella ex bellicis, ac foedera pacisque conditiones negligendi, violandi, rumpendi! In his fluctibus egebat sane Respublica Florentina scientissimo gubernatore, qui obviam iret temeritati & audaciae ambitiosorum, parta conservaret, & agris & urbibus patrium imperium augeret. Omnino talis vir erat Cosmus, ut non dubitem, quin, si illius vita in diversa tempora incidisset, eas exhibiturus fuisset virtutes, quae omnibus, vel dissimilibus, temporibus convenissent.

Vigilans hic moderator, mala aliena suam putans esse occasionem, non lenivit, sed inflammavit odium, quod habebat Pontifex in Puppii Comitem, & quia ipse rem ad arma vocaverat, quorum dux erat vir ad omne facinus audacissimus Joannes Vitelles-

H

chius , qui paullo ante Archiepiscopus Florentinus creatus fuerat, non diffidebat Cosmus, si huic res bene procederet, fore ut victoriae fructus in bonum Reipublicae converteretur. Haec quidem tum in possessionem venit Prati Veteris, qua in re Cosmus humaniter se gessisse aiebat, ne oppidum Casentini nobilissimum ferro ignique vastaretur. Causa hujus Pontificii belli fuit Burgus S. Sepulcri, quod oppidum in Etruriae finibus situm quia possederat Nicolaus Fortebraccius, illo sine liberis mortuo, sibi Puppii Comes dotis nomine (eidem enim nuptum dederat filiam) deberi contendebat. Dum jure & armis disceptabatur, Cosmus obtinuit, ut oppidum, tanquam si depositum esset apud Rempublicam, ab illa gubernaretur; quod vero non multo post illud Pontifici reddere coactus fuit, ejusdem acquirendi neque spem neque voluntatem dimisit. Interea nactus occasionem adjungendi ad Florentinorum imperium oppidum, quod S. Cassiani (57) arx dicitur, in Aemilia situm, hanc minime dimisit, & quo occultior atque tectior esset ista cupiditas in aliena bona invadendi, jura & monumenta proferebantur, & vel illa, quae propter vetustatem obsolevisse videbantur. Movit & utilitas Florentinos, ut Petram Sanctam, quae tum a Genuensibus possidebatur, obfidebaturque a Mediolanensibus, a vastatione defenderent, & dum negotium publicum sedens in puppi agebat Cosmus aut in propulsandis periculis, aut in augenda

patriae fortuna, interim neque suum, neque amicorum negligebat. Certabat interdum utilitas cum honestate; hanc in rebus privatis semper servavit, illam in publicis maxime spectavit; & sane ii tum erant mores imperantium, ut nihil tam commune esset quam aliena jactura suam rem amplificare. Quod non eo dico, ut judicem, quae non sunt aequa & honesta natura, ea fieri aequa & honesta temporibus, sed ut aut necessitatis, aut gloriae, aut patriae caritatis excusatione Cosmum a posterorum reprehensione, atque iniuriis defendam.

Quod hunc tangebatur maxime cura Lucensis belli, de qua omnes civitatis ordines una & mente & voce consenserant sive Lucensium odio, cujus tamen nulla satis iusta causa reperitur, sive studio ignominiae delendae, quae superiore bello videbatur iniusta Reipublicae, nulla non arte sollicitabat Franciscum Sfortiam ad incepta perficienda. Nihil opportunius potuit accidere discessu Picininii, qui in Cisalpinam Galliam vere an. MCCCXXXVII. rediit, diminutum exercitum, quem collegerat ex hominibus desperatis, ex agresti luxuria, ex rusticis mediastinis suppleturus. Tum captus fuit Mons Caroli, Viaregium cum aliis castellis, quae sunt in ora maritima, Carraria, Moneta, Aventia, & recuperatum quoque fuit Sergianum, & nonnulla Apuanae Provinciae oppida, eaque Dominis, ad quos pertinebant, restituta. Lucensis vero ager, ma-

turis jam frugibus, non modo vastatus sed pene exinanitus fuit; sed quantam licentiam habebant hostes ad depopulandum atque rapiendum, tantum habebant animi, qui in civitate erant, ad defendendam libertatem. Manus illa Sfortiana semper fuit victrix in capiendis oppidis, ut nulla pene superessent Reipublicae, sed quas adhibuit vires, & quas comparavit machinae ad expugnandam civitatem aut ferro aut fame, in irritum cedere. Rediit interea in Etruriam per montes asperos, qui sunt in finibus Lucensium, Picininiis, verum quia omnem ferme ad urbem aditum tum fossis, tum vallis, tum castellis praecluserant Florentini, ad oppidum Bargam divertit, non tam loci natura, quam defensoribus munitum. Id positis castris cum obsideret, militesque nil hostile timentes (xxx enim passuum millia Franciscus aberat) custodias obirent negligentius, eos impeditos & inopinantes aggressus est Petrus Brunorius, quem Sfortia praefecerat levis armaturae peditatui, magnum eorum numerum concidit, reliqui se se fugae mandarunt. Eo in praelio, accepto vulnere, captus est Ludovicus Gonzaga Mantuanorum Ducis Filius, qui, adversante patre, multis sane Cosmo nominibus & ob acceptam etiam ab eo pecuniam obstricto, arma adversus Florentinos sumpserat. Tum instare apud Florentinos coeperunt Veneti, ut quoniam multa bene processerant, & non solum sperare, sed etiam confidere possent se tandem Luca potituros, Franciscum ad

se mitterent, quo conjunctis viribus Mediolanensem agrum depopularentur, cogerentque Ducem domestico fatigatum bello curam servandae Lucae abjicere (58). Quod erat fama id quaeri, ut obsidione Luca liberaretur, neque Florentinorum rationibus conduceret talem dimitti belli ducem, hujus & suorum nomine ea respondit Cosmus, quae magnam voluntati Venetorum difficultatem afferebant. Haud negari tamen iis potuit, quin Franciscus saltem Regium Lepidi peteret (59) ac Parmensem popularetur agrum, quo illius defendendi causa Picininius ab oppugnatione Bergomi, quam instituerat, evocaretur. Neque sane res aliter evenit. Sed cum ipse magnum collegisset exercitum, seque magna copia earum rerum, quae sunt ad bellum necessariae, instruxisset, palamque jactaret se ad solvendam obsidionem Lucensem iter suscepturum, ejus minis & terrore plurimum commoti sunt Florentini. Vehementer itaque egerunt cum Venetis, ut Franciscum Lucam reverti sinerent, quod concessere, satis sibi factum existimantes, quoties belli moles a se se in Etruriam transferretur. Franciscus igitur, superato per Mutinenses montes Apennino, Lucam rediit. Secutus diversis itineribus Nicolaus montium, qui interjacebant, jugis appropinquavit. Quanquam autem perditu plurimum posset Franciscus, tamen veritus tum hostis omnium versutissimi insidias, tum belli fortunam, intercidebat obsepiebatque interim loca singula,

per quae Nicotao transitus daretur: quo tamen tutius obstitere hosti, augeri copias suas a Florentinis enixe postulavit. Sed cum in promptu nulli essent equites, a Venetis petunt, ut Guidonem Antonium Manfredum cum equitibus quingentis auxilio mittant. Facile id impetratum est, quod offensiones ab injuria, & a zelotypia natae coegerant & Manfredum ipsum, & alios mercenarios Duces missionem a Venetis poscere. Tum Sfortia a Florentinis atque a Venetis sibi ex aequo promissa stipendia efflagitare. Nulla mora a Florentinis, adnitente Cosmo, fatis ei factum est: deneabant Veneti nullam aliam ob causam, nisi quod ad eos, ut primum vocatus fuerat, non venerat, atque recusaverat Padum transire, ut propius Mediolani Ducem premeret atque urgeret.

Non una erat causa, quare is nimium opprimi Philippi potentiam nollet, illa in primis, quod magna in spe erat fore, ut ille sibi in matrimonium daret unicam filiam nomine Blancam, per quam licet ex concubina genitam jus in Insubrium imperium succedendi obtineret. Hoc significasse Philippus visus est, cum ad ipsum oratores in Etruriam misisset, qui praeter omnium opinionem benigne accepti & comiter dimissi fuerunt (60). Id cum aegre paterentur Florentini, intelligerentque, si Veneti perseveranter promissa stipendia solvere recusarent, illum se sibi consulturum, ne amitterent virum, in quo spes omnis erat Reipublicae,



ineunte vere an. mccccxxxviii. deliberarunt Venetias legare Cosmum, cujus laudes memoria omnium civium inclusas, & auctoritate etiam publica testatas aditum ad id, quod quaerebatur, patefacturas confidebant. Venetus homo (sic enim a suis Cosmus appellabatur) honorificentissime acceptus fuit, ductusque in Curiam in hanc sententiam disseruisse dicitur. *Si ad vos, Patres amplissimi, seriendi foederis causa venirem, multa fortasse mihi facienda verba essent, ut id ad communem utilitatem spectare probarem: sed quoniam jamdiu amicitia juncti sumus, & mirifice semper nostri sensus cum in pace, tum in bello congruerunt, nunc id sperare & moliri debemus, ut vincula, quae multi nequequam solvere conati sunt, arctius astringantur. Quae inde ad vos pervenerint emolumenta nos non solum aequo animo, immo vero etiam gaudenti ac libenti reminiscimur, & tum Deo immortalis gratias agimus, tum nobis ipsis gratulamur, quod & nostris auxiliis florentissimi imperii vestri fortunam non modo defendere, sed etiam amplificare potuissis. Si adeo nos movit vestra utilitas, ut pro ea maximas inimicitias suscipere & summa pericula adire minime dubitaverimus, nulla ne vos cura tanget urbis nostrae, quae hujusmodi nunc implicatur bello, quod geri pro dignitate populi Florentini, & perfici quam primum oportet? Si hercle nulla alia causa, saltem perfidia & iniquitas Lucensium vestros animos excitare & inflammare deberet. In pace nunquam fidi fuerunt; saepe*

agros nostros depopulati sunt; Etruriam omnem adversus nos concitare voluerunt, bodieque id moluntur; & ne ullus sceleribus modus esset, opem & auxilium ferre Picininio minime dubitarunt, cujus effrenatus & praiceps furor universae Etruriae servitutem minitabatur. Quid aliud fuit resistere tam capitali hosti, nisi a vobis amovere pericula, quae semper procreata sunt ab eo, quem Mediolanensium Dux arinasset? Fuit igitur causa communis belli inferendi, & multo labore multisque impensis eo jam deducta res esse videtur, ut brevi illud confici posse confidamus, si constans & stabilis erit amicus Franciscus Sfortia, ac firmani invictamque manum ob negata a foederatis stipendia abducere ab Etruria minime cogetur. An mediocre discrimen opinionis atque detrimentum secuturum ex hac re putatis? Fundamentum enim & gloria imperiorum est fides atque constantia promissorum, quae si exsolvere vel iis denegabimus, ex quibus maximos fructus tulimus, frustra implorabimus hominum auxilium, & amicitiae in graves inimicitias convertentur. Adest Deus testis foederis, quod inter nos & Sfortiam vestrum non modo sapientissimum iudicium, & utriusque Reipublicae utilitas, sed & temporum vincula conjunxerant, & ipse ultor erit violati. Nostra profecto mens est a nobis avertere infamiam & poenam, cum non iustitiae modo, quam praesentibus Reipublicae temporibus convenire arbitremur, minime adigere hominem, quem fortuna & virtus in amplissimo statu collocavit, ad aliena subsidia

dia quaerenda. Iudiget ille pecunia, & nisi illi promissa solvatur, sane confugiet ad opem Mediolauensis Ducis, cujus hoc futurum esse videtur, ut in vestram perniciem maxime incumbat. Ille ne continebit impetus suos, cum omnium strenuissimos & potentissimos Duces Picininium & Sfortiam in sua potestate habebit? Quae tum opes ac vires ejus odiis obistere poterunt? Nostis quae separatim egerunt, & quanta in conversione rerum ac perturbatione eorum causa universa Italia versata fuerit. Non ne latet Sfortiam atque Florentinos culpam a vobis, quod ille toties requisitus Padum cum sua manu trajicere recusaverit. Justas quidem & magnas se habere causas asfirmabat, sed nulla justior, quam quod verebatur ne, si longius absuisset, Piceni possessionem sua virtute partam retinere minime posset. Nos quidem adeo comuoviti vestra postulatio, ut etiamsi ejus discessu non debilitaretur modo, sed et pene evanesceret spes Lucensis belli conficiendi, prece & obsecratione vehementi obtinuerimus ab eo, Regnum Lepidi saltem concederet, & cum Legatis vestris de communi salute consentiret. Gaudemus sane illum in Etruriam redeuntem vidimus, postquam vos illius virtutis fructum baud mediocre cepistis, nec minus vos laetari decet pro magna & veteri & utili necessitudine, quod per eum de finitimis nostris, qui semper infidi fuerunt, triumphare possimus. Satis multa haec essent non iniquis, nimis etiam multa vobis, quos aequissimos esse confido. Restat, si vestri imperii ulla vos cura tan-

git, ut circumspiciatis omnes procellas, quae impendent, nisi provideatis, ne nimium angeatur intoleranda Insubrium Ducis potentia. Si secus consulitis, nos quidem rationibus nostris prospiciemus, & qui fide & officiis erga vos clari fuimus, fortasse non minus celebrabimur virtute, prudentia ac vigilantia, qua dignitatem Reipublicae adversus hostes & foedigrasos sumus defensuri. Excepit ejus orationem, ita jubente Senatu, Foscarus Princeps, vir (ut multi semper sunt apud Venetos) facundus & promptus. Is postquam honorificentissime Cosmum appellavit, ut quam gratissima ejus legatio esse cognosceretur, & multa de praesenti rerum publicarum statu disseruit, ut summam Senatus sapientiam non modo in praevidendis, sed etiam in repellendis periculis probaret, conclusit, huic nunquam in animo fuisse aut retardare, aut impedire de Lucensibus victoriam; credere se eo consilio mercenarius militibus stipendium a majoribus constitutum, ut illorum opera, qui aurum impenderent, uterentur; verum Sfortiam, cui Florentini tautopere consultum vellent, non modo Venetis militasse, sed suam etiam operam, tunc cum maxime opus fuit, obstinate denegasse; quare illum sibi haberent, illi pecuniam solverent, qui ex ipso fructus aut percipiebant, aut sperabant: si vero Florentini Venetos desererent, ut Sfortiam sequerentur, fore ut tam infidi consilii eos poeniteret, daturosque & superis & hominibus, per quos olim serenti essent, meritis violati foederis poenas. Prorsus

ex his dictis non videbatur esse dubium, quin Venetorum consilia longe alio spectarent, quam optabant Florentini. His tamen alterum post Cosmum legatum mittere Venetias placuit (fuit hic Julianus Davanzatius) cum quo minus comiter, quin etiam superbe actum est. Cosmus, postquam aliquot dies Venetiis fuit, Ferrariam ad Pontificem profectus est.

Desperato Venetorum auxilio, id consilii animique habituri Florentini videbantur, quod iis Sfortia effecisset: meminisse illum rogabant quos sumptus impendissent, quot labores sustinuisent, quot adiissent pericula Lucensis belli causa, ut ad illud mature perficiendum inflammarent. Cum ipso quoque, quod miraberis, Infubrium Duce egit privatim Cosmus, ut eundem a ferendo auxilio Lucensibus revocaret; sed quocumque se verteret, quoscumque imploraret, doluit aut imminutam gratiam suam, aut auctum studium erga eos, qui quidquid se pati malle, quam Florentinis fervire liberis dictis & fortibus factis ostendebant. Quoniam igitur tempori cedendum erat, nec sperari poterat unquam desertum iri Lucenses a Mediolanensium Duce (61) & vires Reipublicae opponendae erant Picininio, qui, capto Aureolo Florentinorum in Aemilia oppido, universam Provinciam terrore compleverat, facile ad conditionem pacis Sfortia Florentinorum animos adduxit. Haec prima lex sancita fuit, ut Lucensibus decem annorum induciae a Florentinis daren-

tur, hique sex millibus passuum ab urbe retinerent omnia, quae ipsis tempore belli ademerant. Hujus pacis arbiter Sfortia se ultorem fore promisit injuriarum, quae ab his vel illis inferrentur. Percussum inde foedus inter Sfortiam ipsum & Philippum, quod inter ceteras illam habuit conditionem, ut neque Picininius (62), neque alius, qui Philippo militaret, Florentinos armis laceraret, quippe quorum Sfortia, ut antea, stipendia merebatur. Multa praeterea alia Francisci nomine ita adjecta fuerunt, ut nulla Venetis iusta de Florentinis querendi causa daretur. Cautum enim antea fuerat, ne unquam hi de pace agerent, illis inconsultis, quibus & pacis & belli arbitrium permisisse videbantur. Tulit eam pacem Venetus iniquo animo, & Picininius etiam iniquiore ob eam maxime causam, quod Sfortia & foederis & propinquitatis vinculis cum Philippo conjunctus (hic enim ei filiam desponderat) tutam ad Insubrium imperium obtinendum sibi munivisse viam videbatur. Nec sibi admodum laetandum esse judicarunt Florentini, quod erepta sibi fuerit spes & potestas subjiciendae Lucae, quo cupiditatem infinitam cum immani crudelitate jampridem intenderant.

Dum haec agerentur, Cosmus commorabatur Ferrariae apud Pontificem, neque a suis modo civibus & a Fratre Laurentio (63) diligentissime de omnibus rebus certior fiebat, sed etiam a Sfortia, quocum

quasi societatem quamdam omnium consiliorum inie-  
rat, & de cuius fortuna vehementissime laborabat. At-  
que ille quidem, etsi suae praesertim utilitati consu-  
luit in iis, quae egit cum Mediolanensium Duce, mi-  
nime tamen ab officio atque a fide, quam Florentinis  
debebat, discessisse videtur, quod eos a proposito op-  
pugnandae Lucae, atque a periculo convertendi propte-  
rea in se ejusdem Ducis arma removerit, postquam  
Venti contra foederis religionem omnem de socio-  
rum rebus curam abjecerant. Nullum enim tum con-  
silium magis salutare erat, cum Florentini sine illis  
& sine Sfortia pares hostibus esse non possent. Id qui-  
dem cavendum semper omnibus iis erit, qui armorum  
fortunam tentandam putant, & exempla haec vere  
pro documentis habenda, ne ita externis fidant auxi-  
liis, ut non plus sui roboris suarumque proprie vi-  
rium in castris habeant. Post haec turbator ille Italiae  
Picininius, cum Ravennam, quae in Venetorum fide  
erat, Forum Cornelii & Bononiam, quae tum urbes  
parebant Pontifici, armorum vi obtinisset, omnem  
imperum belli in Cisalpinam Galliam transtulit, ut  
expoliaret Venetos Bergomensi, Cremonensi & Bri-  
xiensi agris, & in hoc potro bello multa ille animo-  
se & fortiter gessit. Alterum vero illud fulmen belli  
Franciscus Sfortia in Apuliam transiit, tum ut revi-  
leret confirmaretque eorum oppidorum atque urbium  
populos, quos pater illius suam in ditionem redege-

rat, tum ut Renato Regi auxilio esset, cujus partes ipse cum suis omnibus adversus Alphonsum Aragonensem defendendas susceperant. Tali modo Florentina Respublica a metu bellorum respirare coepit, & in hac tranquillitate studuit aut pecuniae, aut opibus, aut gloriae, omnem urbanarum rerum motum gubernante Cosmo.

Approbantibus cunctis, negotium ei datum fuerat, ut alliceret Pontificem ad transferendum Ferraria Florentiam oecumenicum Concilium. Suadendo, monendo pollicendoque gratum id singulis privatim, gratum universo Senatui fore, moverat jam Eugenii animum, atque optima spe ad suos redierat. Hanc confirmavit pestilentia, qua conflictari Ferrarienses coeperunt. Itaque Florentini suorum negotiorum semper bene gerentes Ferrariam legatum miserunt Laurentium Medicum (64) (rediisset & Cosmus, nisi sortitione facta, iterum exeunte an. MCCCCXXVIII. renuntiatus fuisset Vexillifer Justitiae) ut desiderium & voluntatem Reipublicae proponeret, & pactiones quasdam cum Pontifice ipso conficeret. Vel quando Basilicae Concilium convocatum erat, egerant vehementissime, ut suam urbem Patres tanquam sedem deligerent, qua nulla opportuniorem esse dicebant vel propter salubritatem aeris, vel propter abundantiam & copiam omnium rerum, quibus vitam sustentamus, vel propter loci commoditatem, quoties ex Graecia,



aliisque remotis regionibus vocandi Patres essent (65). Sed alia spectabant, qui Basileam convenerant, qui cum prope bellum indixissent Eugenio Pontifici, hunc amplissimi sacerdotii usurpatorem appellabant. Non fuit tamen sine Florentinorum & praefertim Cosmi utilitate ipsum Basileense Concilium. Foenerabantur per mensarios, permutabant, & Concilii etiam nomine exigebant pecunias, & quod non mediocris erat apud omnes opinio Cosmi fidei, auctoritatis & gratiae, saepe ab illo conventu de magnis rebus mandata habuit, in quibus exequendis etiam atque etiam videbat, ne ab se Pontificis animum abalienaret (66). Quoniam vero hujus esse putabatur Concilia vel instituta dimittere, vel habita rescindere, vel nova convocare, non sine causa Eugenius Basileenses Patres temeritatis (67) damnavit, et Graecos, qui se ad Concilium venturos promiserant, Ferrariam propter opportunitatem loci accedere iussit. Vel dum Martinus v. Pontificatum maximum gerebat, actum fuerat de conjungendis Graecis cum Latinis, qui plurimis in rebus jamdiu inter se dissidebant. Quod tum perfici non potuit, studiose diligenterque curavit illius successor Eugenius, & postquam diu disceptatum est de loco, quo haberi Concilium debebat, qui primum vocati fuerant Bononiam, mox Ferrariam convenerant, demum se se ad Florentinos, ineunte an. MCCCXXXIX. & vocibus Ambrosii Traversarii, & pestilentiae metu commoti

transfulerunt. Hi domos fatis amplas Patribus assignarunt; ut esset copia omnium rerum, quae sunt ad vitae usus necessariae, studuerunt; & pecuniam, quantum ad alendos Graecos, qui supra quingentos erant, & illorum itineris expensas solvendas Cosmus Eugenio pollicitus fuerat, tantam dari placuit. In illo apparatissimo spectaculo, quo summum Pontificem primum, deinde Josephum Patriarcham Constantinopolitanum, ac triduum post ipsum Graecorum Imperatorem Joannem Paleologum ejusque fratrem Demetrium cum magno eorum comitatu civitas exceperit, primae semper partes fuerunt Cosmi, qui se non elegantem modo, sed & magnificum (nam ut oderat privatam luxuriam, sic publicam magnificentiam diligebat) videri voluit. Nostrium non est referre quae egerint, quae in disputationem vocaverint Patres, quid sit illud de quo inter se convenerint, & quae fecerint decreta, quasque tulerint leges. Rerum & verborum discrepantiae, quae jamdiu inter Graecos & Latinos magno cum Ecclesiae detrimento fuerant, illo oecumenico Concilio sublatae omnino fuisse visae sunt; de qua animorum concordia cum scriberet Cosmus ad Franciscum Barbarum veterem amicum suum, agebat in illa procuranda fuisse viros disertissimos, & prope divinos Bessarionem, & Isidosum Thessalonicensem, & cum a Cardinali Caesario & a Bessarione ipso recitata fuissent capita, de quibus omnes convenerant, non solum, ipsis dicentibus, amicum

cum quiddam & dulce resonasse, verum etiam spectantes audientesque laetissima voluptate perfusos fuisset. Armeni etiam, Rutheni alique, qui ad Concilium venerant, formulam Catholicae fidei consentaneam ab Eugenio Pontifice habuerunt; sed quae sancte & communi omnium, si unum excipias Marcum Ephesium, voluntate praescripta fuerant, Graecorum ipsorum aliorumque levitate & malitia postea magna ex parte violata fuit (68). Octo & amplius menses fuit Florentiae Graecorum Imperator, qui saepe declaravit quanti faceret Cosmum, & quam grata sibi ejusdem & omnium Florentinorum fuissent officia (69). Ea propter dimidia ex parte minuit vectigalia, quae Florentini mercatores, qui negotiabantur Bizantii reliquisque in urbibus, quae erant in ditione sua, solvere consueverant, iisque donavit amplam domum, quam in ipsa urbe Byzantii obtinuerant Pisani, dum florebant libertate & commercio. Quem omni honore vivum profecuti fuerant Florentini Patriarcham Constantinopolitanum, mortuum prid. id. Junii, quatuor & viginti dies ante quam Concilii acta publicarentur (erat enim senectute confectus) (70) magnificentissimis exequiis & sepulcri monumento decorarant. Quae dum agebantur Florentiae, non continuerunt temeritatem atque insolentiam suam Basilcenfes Patres. Usque eo lapsi sunt, ut postquam compositas atrocissime diras imprecati fuerunt Eugenio, Pontificem Maxi-

K

mun creaverint Amadeum Sabaudum, quem ex eremo ad amplissimae dignitatis onus Felicis v. nomine suscipiendum vocarunt. Haud miraberis vel illi cum Cosmo aliquid commercii fuisse (71), quod hujus auctoritas multum apud omnes valebat, conjectique in ipsum erant omnis pene Europae oculi.

Inter haec minime quievit Insubrium Dux, qui quoties ponebat arma, non pacem facere, sed bellum differre videbatur. Angebat ingentis spiritus virum cura recuperandae Brixiae, omnique ratione vexandi Venetos, cum quibus sibi perpetuum bellum fore ostendebat. In magna rerum perturbatione, maximisque periculis, quae impendebant Reipublicae a Philippi & Picininii manibus, quae, cum prospere multa gessissent, ad omne facinus paratae esse videbantur, Veneti Sfortiam & Florentinos, quos paullo antea superbe nimis despexerant, respicere coeperunt. Ea de causa missi ad utrosque legati fuerunt, omnibusque precibus exortatus est Cosinus ab Andrea Donato (hic enim, ut pote Florentinis acceptissimus, a quibus paucos ante annos in civitatem receptus Florentiam venerat) ne officia sua veteribus amicis, qui nunquam non ejus virtutem honorarunt, denegaret. Ancipiti contentione distrahebatur Sfortiae animus. Apud illum poterat plurimum spes obtinendae Philippi filiae, quae sibi per foedus pacta fuerat. Sed quia ille trahebat nuptias, & alias deinde alias morae causas ascrebat, quasi verbis elu-

dere generum vellet, huic jam ardebat animus, & cumulatam ejus cor ira fuit, cum a Troilo, cui omnia credere solebat, quemque ad sollicitandas nuptias Mediolanum miserat, audivit sibi non nisi verba ab homine sine dubio versuto & callido data fuisse. Accedebat ad id angustia pecuniae, quam promissam a Philippo minime retulerat, nec tantam a Florentinis exigebat, quanta satis esset ad sustentandos retinendosque in fide milites, praeteritarum rerum recordatio, & recens suspicio. Nam ejus aemulus Picininius, dum magnopere suos ad Brixiam oppugnandam hortabatur, ac quidam interim diceret, quid esset quod vitam suam telis hostium objiceret, cum urbem ipsam & cetera non sibi, sed Sfortiae, qui futurus esset Philippi haeres, parari non ignoraret, respondisse fertur: *Pergeret ipse, pergerent & alii Brixiam expugnare, qua capta, prius in Piceno futuri essent, quam calamistratus ille sponsus se affuturos suspicaretur. Tum ibi ego, inquit, sponsus, & vos ephebi saltatores eritis.* Haec ut rescivit Sfortia, consuluit Cosmum quid sibi agendum esse censeret, communique consilio Venetis adesse, & quae ab iis proponebantur, condiciones minime respuere deliberarunt. Renovatum itaque, Eugenio quoque Pontifice hortatore, quinquennale foedus fuit Florentinos inter, Sfortiam & Venetos ea inter ceteras lege, ut Sfortia ipse summum copiarum imperium haberet (72), ut ei quotannis penderentur ccxx nummum aureo-

rum millia, quorum tertiam partem solverent Florentini, ut quae ipse a communi hoste armis abstulisset praeter Cremonam, quam Veneti sibi destinaſſe videbantur, retineret, utque foederatae Respublicae Picenum, quod tum erat in ejus ditione, ab inimicis defenderent. Vocati alii in foederis societatem fuere, quo superbiens Sfortia a timore Philippi, quod desperabat ab amore ac fide, facile obtinere se posse confidebat. Quia non satis constabat qua ratione gerendum esset bellum, quamque viam tenere debuisset Sfortia, Veneti significarunt Florentinis legatum opus esse ad se mitti virum prudentem, cum quo quae velent de Republica loquerentur. Haec legatio data est Nereo Capponio, amplissimo civi, qui in Senatum admissus, eloquenti sane oratione studia & beneficia Florentinorum in Venetos commemoravit, affirmavitque licet paria & mutua non semper fuerint officia, suos tamen praeteritorum memoriam oblitterasse, mandavisseque jam Sfortiae, ut Padum transiret, & ubi hostium arma validiora essent, eo quanta maxima posset celeritate contenderet, quamvis timendum esset, ne si ille longius ab Etruria discederet, in hanc impetus armorum converteretur. Extremum orationis fuit: *moriamur milites, dum morte nostra illa furia & pestis Italiae Philippus aut in perpetuum extinguatur, aut saltem reprimatur*. Nullus unquam legatus tam libenti Senatu exauditus est, ac Capponius & propter

summam hominis dignitatem, & propter spem, quam secum afferebat fore, ut ex maximo, in quo versabatur Respublica, discrimine eriperetur. Tota hac in re haec duo maxime spectavit Cosmus, ut Philippus ac Veneti haberent quod timere, & quod sperare possent, ille a Sfortia, hi a Florentinis, qui dum non solum fidis, sed etiam infidis amicis beneficia impertiebantur, magnitudine quadam animi celebrari volebant. Plurimum etiam intererat & ad sua conservanda, & ad aliena obtinenda augeri potentiam Sfortiae, in cujus fortuna totius hujus belli discrimen positum esse videbatur. Multae prosperae res, quaedam adversae laetitiam & luctum miscuere. Recuperata Verona, periculo deditionis Brixia liberata, in Ladronia valle victus ac susus exercitus Picininii, qui culeo inclusus, ac tanquam vilis sarcina ad fallendos hostes a milite deportatus mortem vitavit; quae priusquam acciderent ad Benacum lacum magnum sane detrimentum Veneti accepere, eorumque classis ferme deleta fuit. Mediolani Dux, quo propius in spem venerat redigendi in potestatem suam Veronam & Brixiam, eo plus ira exarsit in Florentinos, quibus unice tribuebat, quod prospere incepta sua in irritum cecidissent. Jussit itaque Picininium ultorem esse doloris sui, & copias suas in Etruriam trajicere. Venisse cum eo dicuntur quidam Florentini exules, qui nullum audaciae finem statuentes, laetantesque in patriae trepitatione, significarunt Cosmo, *se non dormi-*

re; quibus ille, *credere se quidem, quod eos somno privasset*. Pro certo pollicebatur hoc Rainaldus Albitius Philippo atque confirmabat, simul ac Picininius ad Etruriam accessisset, futurum motum populi Florentini, cui intolerabile erat servire homini omnium impurissimo, conjuratosque contra Rempublicam Casentini Comitem, Joannem Vitelleschium Cardinalem, qui ad summum imperium, quod exercebat in Pontificis copias, adungebat etiam crudelitatem, calliditatem & superbiam naturae, aliosque Regulos, qui in Aemilia dominabantur. Quod nihil tam commune erat iis temporibus, quam infidelitas in amicis, desciverunt a Republica Malatestae, interceptaeque litterae fuerunt Joannis Vitelleschii ad Picininium, quae quamvis arcanis notis scriptae essent, satis firmam tamen criminis suspicionem dabant. Tum Cosmus quasi reprehendere & subaccusare visus est Pontificem, quod tot beneficia in hujusmodi hominem fuerat enim primum Notarius Apostolicus, & Recanati Episcopus, mox Patriarcha Alexandrinus, ac demum Cardinalis & Archiepiscopus Florentinus) congestisset, quodque ei in primis fidem habuisset, atque ipsum admonuit suae dignitatis & aequitatis esse poenas ab ipso nefarii sceleris repetere. Hac de causa Florentia Romam missus est Lucas Pittius, qui rem ita egit cum Praefecto arci S. Angeli, ut per dolum Vitelleschius ex Urbe jam discessurus comprehenderetur. Vulnus accepit in



capite, quia ense, quem semper gestabat, se se ab arcis militibus defendere voluit. Dum vulnere medicina adhibebatur, aderat Pittius, qui adeo specillum manu compressit, ut laesum cerebrum statim mortem attulerit. Tam foedo homine liberati Florentini & Pontifex, Picininii impetus se se facilius compressuros sperabant.

Due viae sunt, sane angustae & difficiles, ab Aemilia in Florentinum agrum, altera per Virtis, altera per Amonis vallem. Ab illa repulit Picininium Nicolai Pisani virtus, hanc eidem aperuit timiditas atque ignavia Bartholomaci Orlandinii, qui si copiis, quas a Republica acceperat, defendisset Marradium oppidum natura munitissimum, omnem sane hosti ad Mucellanum agrum aditum interclusisset. Itaque Picininus, cum, resistente nemine, Apenninum superasset, castra ad Pullicianum (id castello nomen est) posuit. Minuit profecto spem, quam obtulerat suis, potiundae urbis Florentiae, ut immensae ejus divitiae victoribus praemium essent, fortitudo, qua ejus impetus sustinuerunt ignobilis castelli defensores. Quod dum oppugnabatur, praedae cupiditas longius miles evocabat, neque ex occulto insidiandi, & dispersos circumveniendi singulis deerat audacia. At in ejusmodi difficultatibus quantum diligentia provideri potuit, provisum est; & quamvis hostes vel ad loca urbi propinqua excurrerent, & omnium civium animi ad ulciscendum arde-

rent, visum est potius, dum externa auxilia non advenissent, ut in nocendo aliquid omitteretur, quam cum aliquo detrimento militum noceretur. In urbe ipsa contra spem Picininii & exulum Florentinorum, qui cum illo venerant, erant omnia pacata. Nam plebs eam voluntatem, quam semper habuit erga Cosmum, retinebat, magistratus ab ejus fidelibus amicis gerebantur, & si qui erant paullo infensiores, occultabant & dissimulabant iracundiam suam vel propter metum, vel propter patriae caritatem. Verens Sfortia, ne quid durius accideret, magnis itineribus contendere Florentiam deliberaverat, sed Veneti multa pecunia, multisque precibus obtinuerunt ab eo, ne prospere incepta deferret, & ne quid concederet Insubrium Duci, qui nulla alia de causa Picininium jusserat transducere copias in Etruriam, nisi ut cum a Cisalpina Gallia abduceret. Homini virtute praestantissimo, ejus opera eximia in hoc gerendo bello exitit, singulares honores, cum Venetias de communibus foederatorum rebus consulturus venisset, habiti fuerunt, de quibus sic scribebat ad Cosmum, ut paratum semper auxilium suum ad ejus voluntatem futurum ostenderet, cum nulla occupatio, nulla utilitas posset esse tanta, ut interrumperet iter amoris & officii sui. Interim in Etruriam mille equites milit, & Petrum Joannem Paullum Ursinium aliosque ad comparanda subsidia sollicitavit. Tum Picininus desperans posse se magnum

gnum aliquid efficere, dum in Florentino agro consistebat, postquam ea loca, in quae incurrit, vastavit, iter ad Casentinum direxit, invitatus ab illius regionis Domino Francisco Guidio. Hunc licet Florentini multis beneficiis firmissimum reddere studuerant, detorsit tamen adeo aut in Albitium amor, aut in Cosmum odium, ut quidlibet perfidiosum atque nefarium committere non erubuerit. Indignationi causam dedisse a multis creditur repulsa, quam tulit, cum Gualtradam filiam suam pulchritudine & castimonia illustrem in matrimonium duci a Petro Cosmi filio concupivisset (73). Sed ii erant mores Florentinorum, ut domesticas nuptias externis anteponerent, neque dubitabat Cosmus, quin sibi invidiosum futurum fuisset, si se se cum viro potente affinitate devinxisset. Accessit eodem Nerei Capponii aliorumque amicorum consilium, qui affirmabant nihil tam conducere ad retinendam populi benevolentiam, quam aequalitatem quamdam fortunae, & pares honorum gradus. Sed quaecumque fuerit causa odii Guidii in Cosmum, nullam ejus perversitas atque improbitas (quin dicam stultitia?) excusationem habere potuit, effecitque ut illum consilii sui, quanquam sero, poenituerit.

Interea creverunt opes animique Florentinorum. Ad eas copias, quas habebant, tria millia equitum & quingenti pedites, qui militabant Pontifici, adduntur. Dux eorum erat Ludovicus Scarampius Patriarcha

L

Aquilejensis, quo & medico usus fuerat Eugenius, sed Simonetta magni nominis miles adiutor ad res gerendas datus erat. Verum magis quam hos, timebat Picininius Sfortianos milites, atque adfuturum Sfortiam arbitrabatur, postquam multas gloriosas victorias in Cisalpina Gallia consecutus fuerat. Multa jam ipse ceperat oppida Casentini, quae in ditione erant Reipublicae, de Cortona & Perusia patria sua opprimenda cogitaverat, qua in re cum minime ei fors favisset, & erepta quoque spes fuisset subjiciendi Tiphernates, extremam belli fortunam, antequam ipse in Cisalpinam Galliam revocaretur, aut Florentinis subsidio veniret Sfortia, periclitari deliberavit. Convenerat nostrorum exercitus ad Anglarium oppidum, quod ad Apennini radices positum duodecim millibus passuum a Tipherno, prope quod erant hostium castra, distat. Hunc inopinantem aggredi se posse Picininius sperabat, praesertim cum ab exploratoribus certior factus fuisset, post meridiem milites inermes aut sub pellibus desiderare, aut longius a castris digredi ad conquirenda militiae & aestus solatia. Itaque cum expeditis copiis in eum locum citatim contendit; sed ubi Michael Attendolus, qui praeerat Sfortianis, cujusque maxima erat vigilantia, & rei omnis militaris peritia, a summis castris subitum excitari pulverem prospexit, suspicatus quod erat, omnes ad arma vocavit. Acies tripartito disposita est, prima juxta Tyberis ripam, ut late-

ra hostium feriret, secunda ad pontem, ut venientes exciperet, tertia dextrorsum in ascensu collis, ut aut victis, aut submotis subsidio veniret. Sfortiani, qui erant in fronte, paullulum cedere coacti fuere, tantus fuit impetus hostium. Captus ab his fuit Nicolaus Pisanus, & parum abfuit quin Attendolus ipse caperetur. Superato ponte, angustias invenerunt, quas fossae, aggeres, & collis ipse faciebant, cumque nec facile moveri, nec fessis recentes succurrere possent, & undique a nostris, quibus apertae erant viae, premerentur, regredi ultra pontem coacti fuere. Ancipiti praelio diu & acriter ibi pugnatum est. Sed cum diutius fessi laboribus, aestu & itinere nostrorum impetum sustinere non potuissent, & illud quoque iis accessisset incommodum, ut subito magnus exortus ventus pulvere obcaecaret dimicantium oculos, fugae se se dederunt. Toto hoc praelio, quo ab hora quarta usque ad octavam pugnatum est, multa Picininius edidit exempla virtutis, sed in eo peccasse videtur, quod fatigatos duodecies mille passuum itinere milites acre certamen conferere coegit. Ipse, aegre mille equitibus collectis, ad Burgum S. Sepulcri confugit. A nostris LX milites occisi, cccc vulnerati, plurimique tum equites, tum pedites capti fuerunt. In his Astorres Manfredius, Ludovicus Parmensis, Romanus Cremonensis, Sacramorus Vicecomes, Danefus & Antonellus a Turre, qui duces erant & praefecti cohortium. Fugerunt alii, cum adjuvarentur

ab ipsis victoribus, qui tum facile parcebant hostium vitae, ut suam fervarent. Si valuisset sapiens consilium Nerei Capponii & Bernardi Medicei, qui ductores erant Florentinarum copiarum, & ipsius Michaelis Attendoli (74), victores in reliquias exercitus Picininii invasissent, omnemque ei potestatem transeundi in Aemiliam facile ademissent, ubi tuto aliquandiu esse potuit, & nova moliri, quae ipsis sollicitudinem attulerunt. Sed perpauci tum erant, qui victoria uti scirent, & quae parva fuit apud Anglarium die SS. Apostolorum Petri & Paulli festo, magna lactitia populum Florentinum complevit, non secus ac si ex crudeli incendio Etruria liberata, & manus illa Picininia, in caede nostrorum jam saepe victrix, plane deleta fuisset. Ea propter supplicationes decretæ, munera templis oblata, vota soluta, & donati amplissimis præmiis fuerunt, qui victoriae ipsius auctores fuisse putabantur, inter quos Legatus Pontificis Ludovicus Scarampius Patavinus, Cardinalis & Archiepiscopus Florentiae, postulante Cosino, creatus est. Qui de his rebus scripserunt, ajunt temerarium consilium cepisse Picininium adjuvendi exercitum loci natura munitum, cum tam valeat nihil in praeliis, quam loci opportunitas: addunt, ipsum etiam in eo errasse, quod iter ad Casentinum suscepisset; nam si in Prateni, aut Pistoriensi agro subdisset, plurimum sane vexasset Florentinos, qui in maxima caritate annonae inde magnam commectuum partem petebant.

Cosmus, postquam liberata patria Picininii metu fuit, egit cum suis de puniendis iis, qui fidem Reipublicae deferuerant, et cum hoste tam nefario conjuraverant. Ea propter Anfrosina a Montedolio, quae uxor fuerat Bartholomaei a Petramala, spoliata fuit Monterchio, Valialla & Montecatello (haec castellis nomina) eaque ad imperium Reipublicae adjecta. Severius etiam actum cum Francisco Guidio, Puppri Comite, qui perduellionis reus factus, postquam vi, ferro, fame omnique metu domi obsessus fuit, tandem exulare cum liberis ab ea regione, quam majores ejus tenuerant post quadringentesimum, quam in Italiam cum primo Othone (ut ferunt) venerant, annum coactus fuit (75). Genus illi perantiquum ac nobile, quod multi praecelari viri, praesertim quando in universo Casentino & in valle Arni superiore dominabantur, illustrius fecerant, dignitas atque opes satis amplae; sed virum nimis fortunae blanditiis fretum majorum rerum cupiditas praecipitem egit, qui dum aliena concupivit, suis omnibus amissis, patria extorris inopia consenuit, posteris futurus documento, fidem cunctis, sed praesertim potentibus, & in rectis consiliis constantiam servandam. Nova etiam lata sententia fuit adversus exules Florentinos, qui Picininii partes secuti fuerant, ut omnis illis spes reditionis in patriam auferretur (76). Haec res maxime offendit Rainaldi Albitii animum, qui odium implacabile, quod in Co-

finum habebat, saturare cupiebat, tantaque iracundia commotus ille fuisse dicitur, ut Anconae, dum coenabat, subitam mortem obierit. Laetitiam, quam cepit Cosmus ex tot rebus bene ac feliciter gestis, plurimum minuit Laurentii fratris mors, quae accidit Kal. Octobris an. MCCCXII. Amaverat carumque semper habuerat virum sibi fidelissimum, omniumque consiliorum, fortunarum periculorumque socium, qui cum ex Junipera Cavalcantia unicum suscepisset filium (huic Petri Francisci nomen, ex quo ferus ille Etruriae regnator Cosmus I. originem duxit) eum fratri in tutelam commendavit. Nullius fortasse privati hominis exequiae, ac Laurentii, majori pompa cohonestatae fuerunt. Prosecuti sunt funus non magistratus modo civitatis cum populi vexillis, sed et externorum Principum legati, magna pars aulae Pontificis ejusque fratrum filii. Novem usque Cardinales, multi Episcopi, omnis praeterea flos nobilitatis postridie in Basilicam S. Laurentii omni apparatu ornatam convenere, & mortui laudes Latina oratione celebravit Poggius Bracciolinius, cui maximam eloquendi vim omnes tum concedeant. Si Philephum audis non tam corporis (77) quam animi in Laurentio erat deformitas, & insatiabilis alienorum appetitio; & homo impotentissimus ardensque odio non minus ei, quam Cosmo dat crimini, quod omnia Florentinorum vestigalia parvo pretio redempta haberent, propterea quod illis licentibus con-



tra liceri auderet nemo; & his rebus non modo, sed & gravissimis usuris, & damnatorum poenis facultates maximas tum ad largiendum, tum ad obstringendos aere alieno amicos sibi comparasse ait, omnia demum honesta neglexisse, dummodo potentiam consequerentur. Verum, qui sine ira & sine invidia judicabant, probum virum fuisse Laurentium, satis eruditum, ad largiendum ex fructibus sua industria partis propensum, prudentem & gravem, & in obscuris patriae muneribus experientissimum & diligentissimum affirmarunt (78). Magnum sane detrimentum ex illius interitu cepit Cosmus, quoniam in eam fortunam devenerat, ut in administrandis suis & publicis rebus fidelibus adiutoribus indigeret. Quam necessitatem respicienti dolendum etiam fuit ob mortem, quae anno ante acciderat, Ambrosii Traversarii Camaldulensis Monachi, quem fraterne semper dilexerat, cuiusque prudentia, fide ac religione saepe in consilio capiendo usus fuerat. Interdum etiam ab eo quaerebat oblectationem animi & curarum levamen, quasi mercedem amoris exigens aut sermones, aut epistolas plenas litteratae senectutis, aut scripta, quae ad instituendos homines profutura sperabat. Ex his conmemorandas putamus interpretationes cum vitarum, quas Graecus homo Diogenes Laertius exposuit Graecorum philosophorum, tum sermonum S. Ephraim Syri, non tam propter praestantiam utilitatemque operis, quam

propter laudes, quas, dum illas Cosino nuncupavit, eidem tanquam litterarum omniumque nobilissimarum artium patrono munificentissimo impertivit. Sed fortasse nos quaesita ab aliis laude minime indigere judicabimur, cum suis virtutibus suisque gloriosis factis magnum fuisse virum Cosmum videamus.

Hic quamvis Etruria liberata fuisset armorum metu, non quiescendum tamen putavit, quod Picinini Mediolanum regressus magnam armatorum vim ad nocendum collegerat. Egit itaque vehementer, ut delectus haberentur, uti ex censu locupletum nova tributa exigenterentur, ut socii & amici essent Malatestae, & ut stipendia darentur militibus Pontificis, qui in summa erat angustia pecuniae. Propter hanc ipse vendenda censuit Nicolao Atesino Ferrariae Marchioni Bagnacavalli & Massae Lombardae oppida, ut et Florentinis viginti quinque mille florenorum pretio Burgum S. Sepulcri concessit. Solvit hanc pecuniam Cosmus ex suo aerario Reipublicae nomine, quod negotium a se perfectum fuisse vehementissime laetatus est, quia & sibi honori & Reipublicae magno emolumento futurum minime dubitabat (79). Vigilans & acutus gubernator omnes captabat occasiones, quibus Florentinorum imperium augeret, neque multo post Porciani (80), Dovadulae (81) aliorumque minorum oppidorum dominatum occupavit. Magnum audaxque consilium susceperat Tiphernum ha-

habendi, sed in hoc minime ei favit fortuna. Subsidio veniebat omnibus, qui illud requirebant, habuitque aliquando in potestate arces, quae Assisio impendunt, quasi pignora pecuniae, quam ipsi Eugenio Pontifici mutuam dederat (82). Omnino videri volebat tantas esse suas facultates, tantam auctoritatem, ut merito ad eum legationes concurrerent, ejus gratiam atque amicitiam publice privatimque expetentes. Non dubito autem, quin ad opinionem, quam de eo omnes habebant, augendam praeter potestatem summam, quae ei a libera civitate permittebatur, plurimum valuerit Francisci Sfortiae amicitia. Huic summa tribuerat Respublica Florentina, & ut gratus erga praecipuum auctorem fortunae suae cognosceretur, omnia ex voluntate Cosmi facere videbatur. Isthac studiorum & consiliorum consensio quo eruptura esset fortasse praevidebant Veneti, eaque propter pacem cum Philippo Vicecomite esse nolebant. Sed hic desensus tot bellis, periculis, quae impendebant, perterrefactus, & irritatus quibusdam Picininii aliorumque Ducum intolerabilibus postulatis, Sfortiam, cui omnia prospere in Cisalpina Gallia eveniebant, paterni juris defensorem, & quasi proprii patrimonii propugnatorem concupivit. Misit itaque ad eum secreto Antonium Guidobonium Derthonensem, cui summam rerum omnium fidem habebat, isque nocte intempesta introductus in tentorium Ducis hunc hortatur, ne opibus ac nervis ad com-

M

munem perniciem utatur, Philippum ei in matrimonio filiam suam, & dotis nomine Cremonam, & maximam partem Cremonensis agri & Pontremolum daturum affirmat, quae Picininius, Sanseverinas, Vermius, Talianus insolentissime peterent ostendit, quae Philippus intelligeret proponit, ac monet, ut in reliquum tempus omnes suspiciones vitet, & omnia sibi a foceri voluntate polliceatur, qui cum pacis arbitrum statuebat. Hujus orationi ita respondit Franciscus, ut se propensum ad ignoscendum & ad pacem faciendam ostenderit. Quapropter a Philippo Eusebius Caimus mittitur, qui quae proposuerat Guidobonius, scripto ac jurejurando firmaret. His nocte confectis in castris, quae posita erant ad Martinengum, cum postero mane multi salutatum Ducem, ut sit, venissent, ad Maripetrum Venetorum legatum aliosque conversus Sfortia, subridens inquit: *pacem nuncio vobis, viri clarissimi: nulla de bello & armis mentio amplius futura est: paci & otio unice consulendum.* Hic nuncius, ut res nova & minime expectata, omnes stupore complevit, quae-rebantque inter se unde tam subita in Sfortia facta fuisset voluntatis commutatio. Secutum inde Imperatoris edictum, ut ab armis milites & ab injuria abstinerent, quod idem Philippi legatus Picininio aliisque ducibus praecepit. Haud potuit occultare dolorem suum Picininius, & dum Martinengo in Laudensem agrum copias suas ducebat, multa de fortuna & Philippo que-

stus dicitur, quod se claudum, senem, atque inopem perdidissent. Sfortia, relictis castris, Venetias concessit, personam arbitri & amici gesturus. Honores, qui ei tributi fuerunt, Regi magis, quam Duci convenire dixisses, & quoniam consilio non multum uti licebat, omnes & factum & virtutem & fortunam ejus laudarunt, & latas ab eodem pacis conditiones ratas habuerunt. Communi animo atque consilio has quoque confirmarunt Florentini, & legatos ad Sfortiam miserunt Angelum Acciajolium atque Nereum Capponium, qui ei de suo statu gratularentur, & gratias agerent, quod caverit, ut sibi redderentur Mutilum, Oriolum, & Montesaceus, dum vicissim redderent Astori Manfredio Faventinorum Domino Fovazanum & Calvanellum, quae oppida in Aemiliae provincia posita sunt. Sed majoris momenti ceterae pacis leges fuerunt. Decretum enim est, ut Philippo in Brixientem & Bergomensen agros nullum jus esset, sed illud Veneti obtinerent: Cremona cum suo agro dotalis Francisco concederetur: Romanengium cum omnis Abduanae terrae oppidis Veneti Philippo redderent: Piscariam ipsi Lunatumque retinerent: reliqua, quae intra Matuanae provinciae fines essent, Gonzaga reciperet, ita tamen, ut ipse, praesidio educto, Leniacum cum portu Venetis cederet: Ripam, Turbulas ac Penetram, quae loca jure belli sua Venetus fecisset, haberet: haberet & Ravennam; & Eugenius post biennium a

Picininio Bononiam recuperaret: Quanquam Principum legati, qui convenerunt Cremonam, ubi nuptias plenas dignitatis & laetitiae celebravit Sfortia, uno ore omnes de iis conditionibus consenserint, Eugenius tamen Pontifex se illa minime accepturum declaravit, quod iis sacra Romanae Ecclesiae jura violarentur; & illud quoque vetus suum in Franciscum odium inflammasse dicitur, quod audierat secreto pactos fuisse Sfortiam ipsum & Picininium, ut quae in Pontificia ditione jam possidebant, & quae in posterum acquisivissent, mutuis auxiliis, quasi optimo jure parta defenderent. Ne unius dissensione utilis Sfortiae & Reipublicae Florentinae pax turbaretur magnopere sane Cosmo laborandum fuit, qui ita rem egit cum Eugenio, ut ejus auctoritas & consilium magno esse momento apud ipsum esse videretur.

Nae eum dolorem, quem a Republica capiebat Pontifex, consolabantur Cosmi amicitia, Florentinorum artes, quibus studebant diu apud se illum retinere, quod sane ipsis & utile & gloriosum erat, & legationes eorum, qui Graecorum exemplum secuti cum Romana Catholica Ecclesia fide & caritate jungi postulabant. Ceteros inter cum magno comitatu venerunt a Cyriaco Aethiopiae Rege legati, qui quamvis multa & magnifica jactarent, ut summa amplitudine digni putarentur, summis tamen supplicarunt Pontifici, ut se suosque in fidem Romanae Catholicae Ecclesiae re-

ciperet (83). Quae ille praescribebat sancta, augusta & religiosa erant, paterna caritate complectebatur omnes, qui ad se confugiebant, ac monitis praeceptisque sapientissimis in recta voluntate confirmabat; sed spei & studio eventus rerum minime responderunt. Nam perfidia nocentium iterum distracti animi Romani Pontificis auctoritatem abjecerunt, & illam Orientalis & Occidentalis Ecclesiae conglutinatam concordiam disjunxerunt. Sed non minori curae esse videbatur Eugenio quemadmodum Christianae Reipublicae rebus consulere, quam quemadmodum inimicorum suorum injurias persequeretur. Quanquam, ut diximus, auctore Cosmo, quaedam pacis conditiones inter illum & Sfortiam convenerint, quia tamen nihil tam optabat, quam ut recuperaret Picenum, quod in ditionem suam redegerat Sfortia ipse, & facile ad mutationem consilii impellebatur, illud sperabat ac moliebatur, ut causa novi belli oriretur. Hanc dedit Renatus Andegavensis, qui, recuperata libertate a Burgundiae Duce, a quo in praelio captus fuerat, cum in Neapolitanum regnum venisset, hoc spoliare Alphonsum Aragonensem conabatur. Multis praeliis cum illo infelicissime dimicavit, & quia in amicitia Sfortiae illius ambitio non mediocriter nitebatur, hunc vehementissime rogavit, ut quoniam omnia quiescentia erant in Cisalpina Gallia, ad se se cum suis copiis sine mora veniret, ut sua jura tenere, et communis hostis injurias (nam

& Sfortia ipse privatus fuerat illis urbibus & oppidis, quae in Neapolitano regno ex paterna hereditate possederat) ulcisci possent. Id haud occultari potuit Alphonso, qui cautus erat in periculis, & fortis in contentionibus, quare litteras dedit ad Mediolani Ducem, quibus ab eo pro jure amicitiae suae petebat, ut generum in Cisalpina Gallia retineret, dum ipse rationibus suis plane prospexisset. Vir ille suspiciosissimus, qui semper existimabat aliquid ab amico esse violatum, & pacis inimicissimus, facile in eam mentem inductus est, ut eodem tempore Sfortiam & generum & hostem videret. Itaque & nunciis, & litteris, & cohortationibus Pontificem ad recuperandum Picenum inflammavit, seque ejus causae tum pecunia, tum militibus non defuturum pollicitus est. Tantos sibi spiritus sumpsit Eugenius, ut rejectis pacificis Cosmi consiliis, egerit cum Picininio de trajiciendis ejus copiis ex Bononiensi in Perusinum agrum, quo propius Sfortiae, qui in Piceno commorabatur, molestae essent. De occupando etiam Fulgineo, in quo dominabatur Curradus Trincius, qui cum Sfortianis propinquitatis vinculis conjungebatur (ejus enim filia nupta erat Leoni Francisci Fratri) deliberavit, & frustra laborem suscepit Cosmus tum sua sponte, tum magnis Francisci aliorumque precibus excitatus (84), ut illum ab hoc consilio deterreret. Addebant Pontifici animum victoriae Alphonsi, qui, capta Neapoli, nullum reliquisse locum,



videbatur Renato, ubi tuto posset consistere. Venit hic Florentiam, sperans posse se placare Pontificis iram. Optime ac liberalissime egerunt cum eo Florentini, qui ei & victum quotidianum sic praebuerunt, ut Regi non afflicta, sed florenti fortuna (85). Verum quanta in iis comitas, tanta in Pontifice duritas fuit, & cum summa esset omnium rerum amissio & desperatio recuperandi, Rex Liburni consensa Genuensi navi, in Provinciam rediit. Jam Picininius Tudertum, Belfortem, Sernanum & Montemfortinum ceperat, & quando pugnam commissurus esse videbatur cum Sfortia, qui in ejus castra cum exercitus vi invadere deliberaverat, ecce litterae a Bernardo Mediceo, qui nunciabat se effecisse, ut hi Duces ab armis discederent, & complexu et osculatione pacem renovarent. Fictae ac simulate quidem. Nam paullo post Picininius Tolentinum cepit, inde rursus in concordiam reducitur, mox ad arma rediit, expugnatis Assisio & Gualdo, ut superbe illudere velle Sfortiam videretur. In tanta hominum perfidia & iniquitate ita se gessit Cosmus, ut aut concordiam in Italia constitueret, qua nihil utilius videbatur, aut Rempublicam summa cum dignitate defenderet, cujus fortunam, beneficiis, quos poterat, sibi conciliando, adjuvabat. Jam Eugenius Pontifex declaraverat velle se Florentia abire, quod cum aegre ferret Cosmus, nulla non arte, prece atque officio de illo retinendo laboravit. Vrebebatur

enim, ne ille absens facilius circumveniretur ad constituendam cum Alphonso Aragonio amicitiam, parandamque Sfortiae ruinam. Sed quae dixit, ut probaret nullum ei magis tutum locum fore, quam in Etruria, et vanam fore spem, quam in Alphonso posuisset, nihil tetigerunt Eugenium, qui ineunte an. MCCCCXXXIII. a Florentinis discessit, auxilia ab iis imploraturus, quorum opes et gratia valuissent ad vindicandos Pontificiorum bonorum usurpatores.

Superbiens Alphonsus florentissimi regni possessione, nihil tam optabat, quam ut in suum locum, tanquam heres aliquando succedere posset ejus filius Ferdinandus, in quo mirifica indoles virtutis apparebat. Genuerat ipsum ex concubina, quae res ne ejus consiliis officeret, delinire omnibus modis optatum, & magistratuum animos studuit. At necesse erat quae ipsi statuissent, firma ac rata esse Romani Pontificis auctoritate et consensione, apud quem summum illius regni imperium esse minime ambigebatur. Itaque postquam hac de re frustra egerat saepius cum Felice v., reconciliare sibi multis de causis infensum Eugenii animum, fovere ejus desiderium de recuperando Piceno, eique de suis studiis atque opibus prolixè polliceri (86). Harum rerum ad fidem faciendam Picininium Anxurem venire jussit, ut cum eo de ratione belli administrandi deliberaret. Hominem non generis nobilitate, sed audacia et virtute clarum accepit

cepit honorificentissime, & in nomen familiae suae adscivit. Confirmavit illi se prima aetate in Picenum cum exercitu venturum; direptor ille interea & vexator esset Provinciae, & viam victoriae sterneret. Vicens Sfortia quanta sibi impenderet tempestas, Venetos & Florentinos ad auxilium sibi ferendum sollicitavit. Suspensum autem habebat Cosmum cogitatio tum officii erga veterem & fidelem amicum, tum periculi Reipublicae, si se hujusmodi bello miscuisset. Sed dum pendebat animi, subveniendum fuit Bononiensibus, qui, duce Hannibale Bentivolo, comprehenderant Franciscum Picininium, qui patris nomiae regie, seu potius tyrannice, iis dominabatur, seque in libertatem vindicaverant. Auxilia Florentinorum & Venetorum liberarunt periculo Bononienses, quod iis constabatur ab armis Mediolanensium Ducis, & tum apparuit non quieturas foederatas Respublicas in Sfortiae sociorumque discrimine. Jam de adventu Regis fama perferrebatur; & quamvis Sfortia secundis aliquot praeliis virtutem Picininii superasset, se parem tamen esse non posse intelligebat maximo exercitui, superbissimo delectu conquisito, & multis victoriis & ipsius Regis praesentia elato. Postquam ille metuere coepit, & multa jam loca Piceni amiserat, & confugere Fanum Fortunae apud Sigismundum Malatestam generum suum coactus fuerat, multum de odio suo dimisit Philippus, mox odium in commiserationem

N

convertit (nihil enim illo erat mobilius) & prece humili ab Alphonso petere, ut parceret genero, parceret filiae, in quorum fortuna aetas sua jam ingravescens maxime conquiescere debebat. Principio Alphonfus fidem datam Pontifici objecit, mox se vinci passus est, & ad suos cum exercitu rediit. Supererat Picininius, sed ejus virtus consenuisse videbatur; quapropter cum pugnam paullo post discessum Regis ad Montelorum, quod oppidum est in agro Pifaurensi, commisisset, turpissime a Sfortiae & foederatorum copiis victus est. Tum Sfortia non solum amissa in Piceno recuperavit, sed & aliis civitatibus, quae erant in ditione Pontificis, potitus est. Profecto nisi exercitum mittere in hiberna coactus fuisset, hujus belli reliquias oppressisset. Sed renovatum illud fuit primo vere insequentis anni. Nam cum Picininius, homo sane instaurandis reparandisque bellis natus, subsidii Alphonfi Regis & Pontificis magnum iterum collegisset exercitum, hujus imperium dedit Francisco Filio, cujus virtuti magnopere confidebat. Sed hic quoque a Sfortia victus est (87), qui dum omnia militis & ducis officia in pugna sane acerrima exequabatur, propius nihil est factum, quam ut occideretur. In maximo captivorum numero fuit Pontificis Legatus, qui agnitus a Sfortianis, multis oneratus fuit injuriis. Tum Cosmus, qui nulla in re defuerat Sfortiae, dum bellum gerebatur, quo facilius in victoriae

possessione confirmaretur, consilium eidem plenum prudentiae & fidelitatis dedit, ut pacem cum Pontifice faceret. Scripsit & ad hunc, quae saluti ejus conducere arbitrabatur, & quae non aliena esse putabat ab illius dignitate. Verum nihil tam movit Pontificis animum, quam Nicolai Picinini mors, qui utrum dolore atque iracundia, quod prospere omnia procederent Sfortiae, quodque ipse frustra tot belli labores sustinuerit ob fraudes & fallacias Philippi Ducis, an veneno sublatus fuerit, adhuc ambigitur. In pace, quae Perusiae conciliata est exeunte an. mccccxxxiv. Sfortia magnam Piceni partem sibi pactus est, quodque erant quaedam aliae conditiones, de quibus inter se Eugenii & Sfortiae legati minime convenerant, communi consensu deliberarunt, ut in hanc rem arbitri essent tres Cardinales, Cosmus & Nereus Capponius, quorum prudentia & aequitate omnis sublata fuit discordia (88). Eodem tempore Florentini foedus cum Venetis ad decennium confirmarunt, & in fidem suam receperunt Fridericum Feltrium magnum porro virum, qui omni prudentiae genere praestitit, quique in Urbiniani Comitatus possessionem tum venerat.

Ceterum nequaquam ex rebus foris feliciter gestis tantum gaudium fuit, quantus dolor Cosmo, quod domi pullularent iterum odia & discordiae invidorum, qui aiebant ipsum minime habere respectum ad magistratus & ad bonos, eamque sibi viam patefacere ad

opes suas amplificandas, atque exercendam potentiam, quam virtus liberi populi ferre non posset. Omnes hi aut vinculis, aut exilio, aut privatione publicorum munerum poenas Reipublicae dependerunt, & ne deesset materia in suspectos saeviendi, in occulto gliscientia per indicium protracta fuerunt facinora. Ne vero timor in futurum esset, plurimum minutus fuit numerus eorum, qui administraturi essent Rempublicam, & ut urbi ac Cosmo a bonis satis esset praesidii consultum ac provisum est. Qui huic proximus dignitate potestateque erat Nereus Capponius, quamvis interdum in alia voluntate esset, omnia tamen facta Cosmi & probare & laudare videbatur, reminiscens casus multorum, quibus fatale fuerat odio atque dissidio ab ipso dissidere. Fuit vero Cosmus non veris tantum virtutibus mirabilis, sed arte quoque quadam ab juvenia in ostentationem compositus, ut jam inde ab initio praeeparaverit animos ad potestatem & dominatum omnium rerum sibi concedendum. Quia vero felicitas rerum gestarum populi benevolentiam rectoribus Rerumpublicarum, ut res adversae odia, conciliant, omnia se Cosmo debere populus Florentinus judicabat, ut si quid irati de illo gravius sentirent, illi adversus Rempublicam facere viderentur. Tantum studium aequabat ejus diligentia & vigilantia in procurandis populi ipsius negotiis, qui quidem nunquam majores res gessit, nunquam majori gloria, po-

tentia atque auctoritate fuisse videtur, quam Cosmo Rempubicam gubernante.

His temporibus magnopere de potentatu inter se Bononiae contendebant Cannetolorum & Bentivolorum familiae, cum principes essent illius quidem Baptista, hujus Hannibal. Sequebatur hic gratiam Florentinorum, ille Mediolanensium Ducis, & cum eo egit de occidendo Hannibale, eidemque tradenda civitate. Mortem quidem aemula intulit (89), quo audito, magnus totius populi motus factus est, addebantque huic animum Florentinorum & Venetorum Legati, qui Bononiae commorabantur. Antequam Cannetolis subsidio venire potuerint Mediolanenses, ii caesi fugatique fuerunt, & occisus quoque fuit eorum Dux, postquam in sepulcro aliquot dies latuerat. Nae Bononienfes quidem magno desiderio tenebantur, ut aliquis Bentivolorum Hannibali propinquitate conjunctus existeret, qui gubernacula civitatis prehenderet. Hunc esse in Etruria affirmavit Franciscus Guidius, narrans Herculem Bentivolum Hannibalis patruelem, dum erat Puppii apud se se, filium nomine Sanctem viginti annos ante ex adolescentula Cascesii cujusdam uxore genuisse, huncque facie & moribus patri simillimum esse. Hac re audita, confestim ad Cosmum & Ne-reum Capponiem missi homines fuerunt, qui eos rogarent, ut quid verum esset cognoscerent, & in voluntate socios et vicinos adjuvandi permanerent. Co-

fmus ex Casentino ad se adolescentem accersit, eique quae vellent Bononienſes, quae ſperare, quae timere deberet oſtendit. Poſtremo admonuit, ut ſe ipſum perſpiceret, totumque tentaret, & ſi animum Bentivolis dignum gereret, qui teſtis foret generosae ſtirpis, Bononiam quanto citius proficiſceretur; ſi vero nihil eſſet in eo niſi imbelles atque timidum, haud dubitaret ſe humili ortum eſſe parente, & vitam in ignoratione hominum, et in humili aliqua arte exercenda degere. His verbis, qui nullius animi eſſe principio viſus eſt, adeo commotus dicitur, ut nullum periculum ſe recuſaturum, omniaque ſe velle, quae Cosmo atque Nereo libuiſſent, affirmaverit. Hi quaſi nobiliſſimum Bentivolorum nomen illi reſtituiſſent, ne ad contumeliam honorem dediſſe viderentur, ornatu comitatuque plus quam privatum hominem deceat, ad Bononienſes ſuos eundem ire juſſerunt. Adventus ejus plenus laetitiae fuit, ejus vero vita plena decoris, ac fidei pietatiſque erga auctores fortunae ſuae (90), et raro Bentivolis exemplo, lucis uſuram ipſi natura, non vis inimicorum eripuit. Porro maxima ſemper Cosmum cura tetigit Bononiensium propter vicinitatem urbis, & quia maxime intererat Reipublicae, ne oppreſſione eorum libertatis inimicorum, aut aemulorum nimium augetur potentia, & quae illam ſequitur audacia. Egit quoque cum Eugenio Pontifice, ne pro juribus Sedis Apoſtolicae in illam



urbem gravius aliquid constitueret, & annuo tributo contentus esse vellet, neque illo admodum magno, quod ob civiles discordias (91) agricultura deserta fuerat, & mercatorum industria omnino conquieverat. Tanta vis erat malorum, ut homines quidvis perpeti, quam non solari praesentem calamitatem spe libertatis mallent, cujus desiderium vel ipsa studia Florentinorum et Venetorum augebant. Eodem tempore fidem etiam Florentinorum obtestatus est Genuensium Dux, secreto ad Cosmum misso fideli homine Joanne Calefchio. Verebatur enim ne novae calamitates importarentur a Mediolanensium Duce, cujus fides (et promissa quidem fuit Genuensibus libertas in conditionibus pacis, quae per Sfortiam paullo ante facta fuerat) facile in perfidiam convertebatur.

Hic fallax et insidiosus homo quarebat jam causam, quae impelleret Pontificem ad renovandum bellum cum Sfortia. Commemorat hunc in acerbissimum odium venisse Sigismundo Malatestae, quod fautor et adjutor fuerat Friderici Feltrii, ipsius impetus, importunitatem, direptiones bonorum, quae juris Romanae Ecclesiae essent, redarguit, offert se, et pollicetur non sua modo, sed et Alphonsi Regis subsidia, si expellere e Piceno sacrilegum usurpatorem voluisset. His artibus instauratum est bellum, ejusque causa semel atque iterum Sfortia Florentiam venit consulturus Cosmum de suis rebus, et subsidia pecu-

niae a Republica imploraturus, sine quibus resistere tantis hostibus minime potuisset. Auri argentique reconditas venas in sinu Reipublicae dixisses, tam facile ipsa habebat, quo amicorum saluti communibusque fortunis succurreret. Tum signa Pontifex irati Florentinis animi dedit, eo usque ut a Romanis violata dignitas fuerit Bernardi Medicei, qui legatus mittebatur tum ad Pontificem ipsum, tum ad Neapolitanorum regem ad deprecandam pacem (92). Quamquam Florentini cum Sfortiae hostibus haud aperte bellum gererent, attamen & sibi quoque impendentem procellam timere debuerunt. Venerat enim ad occupandum Pontremulum Aloysius Vermius, qui castra posuerat inter Fornovum & Calestanum, & venire quoque cum magna equitum manu nunciabatur Bartholomaeus Coleonius, nobilissimus sane Dux, ut multa in re militari partim nova attulerit, partim meliora fecerit. Tota etiam Cisalpina Gallia bello ardebat, & Franciscus Picininius studio inflammato ad occupandas Cremonam & Bononiam rapiebatur. Tum Florentini existimantes non tantum ad fidem suam, sed etiam ad salutem sociorum pertinere, communi animo consilioque rem gerere, quam maximas potuerunt copias contraxerunt, quarum imperium Guidoni Antonio Manfredio & Simonettae dederunt. Cum vero a Cosmo quaereret Sfortia, quid ipse maxime tentare deberet, dedit ei plenum animi consilium,

lium, ut inopinantem Pontificem in ipsa urbe Roma aggrediretur. Quod hoc fieri sine dimicatione pernicioſa non poſſe Sfortia animadvertit, multa præclara tum in Piceno, tum in Aemilia geſſit, vel quando in ſummas anguſtias adductus eſſe putabatur. Defenderunt & Florentini Pontremulum ab inimicis, & Venetorum ceterorumque foederatorum arma inſignem victoriam in Cremonenſi agro reportarunt (93). Tum omnia Venetorum conſilia ad occupandam Mediolanenſem provinciam ſpectare coeperunt, cujus periculo ſic Philippus perturbatus eſt, ut vix judicari poſſet, utrum ſecundis nimisſque rebus inſolentior, an adverſis mediocribuſque timidior eſſet. Nec ſolum ille perterritus, ſed etiam Alphoſus Rex, qui ſe tutum non fore in ſuo regno intelligebat, quoties ad Venetorum imperium tam nobilis Provincia adjungeretur. Placare itaque odia Sfortiae ſtuduerunt, qui & uxoris precibus & ſletu excitatus fuiſſe dicitur, ut ſocero actate decrepito & cæco ſubveniret (94). Cujus licet tanta eſſet iniquitas, ut in ejus pernicioſa ſita bonorum ſecuritas & Italiae tranquillitas eſſe videretur, ſibi tamen utile fore, & e Republica Florentina eſſe arbitratus eſt Sfortia non amplius perſequi Philippum bello. Quanquam nunquam antea ipſe in ſuſpicionem infidelitatis Florentinis venerit, hi tamen ita conſulendum præſentibus rebus judicarunt, ut nonliceret ei ſui commodi cauſſa nocere foederatis Rebuspublicis.

& ne ipsi suis viribus alere cogerentur cupiditatem Venetorum. Vigilandum etiam erat, ne qua Galli Italiam adversa molirentur, cum ad Genuam occupandam aliaque hujusmodi tentanda invitarentur (95) a Philippo, qui iis jam concesserat Aſtam Coloniam, Novum & Gavum. In hoc Italicarum rerum discrimine optabat Cosmus aliquem esse, qui se in pacificationem interponeret, cujus spem attulit mors Eugenii Pontificis, quae accidit vii. Kal. Martii an. mccccxxxvii. Ejus in locum paucos post dies suffectus fuit Nicolai v. nomine Thomas Calandrinus, de quo supra mentionem fecimus, qui licet Sergiani parentibus natus esset humilibus, amplissimo tamen honore dignus habitus est propter sanctitatem morum, animi magnitudinem & praestantiam doctrinae. Is biennium Florentiae fuerat apud Pallantem Stroctium, & Rainaldum Albitium, ut eorum filios litteris erudiret; inde vero regressus Bononiam, quo antea venerat studiorum causa, tantam de se opinionem, seu potius admirationem movit Nicolao Albergato ejus civitatis Archiepiscopo, ut de illo in Cardinalium collegio cooptando cum Eugenio Pontifice egerit vehementissime (96). Amavit semper Florentinos, & quod suo sibi beneficio illos habere obstrictos volebat, postquam eorum Oratoribus, inter quos erat Petrus Cosmi Filius, quod ante id tempus acciderat nunquam (97), eisdem honores, quibus magnorum Regum Legati affici sole-

bant, tribuisset, large ipsis promisit de sua voluntate in pace procuranda, et in prospiciendo Reipublicae rationibus. Ipsi, qui Romam vicerant, Oratores adierunt ad Alphonsum Neapolitanorum Regem, qui Tibure tum commorabatur, & cum eo sic egere, ut se cupidos concordiae ostenderint.

Dum haec res vehementer Ferrariae agitabatur per Cardinalem maxime Morinensem Pontificis Legatum & Leonellum Atestinum ejus civitatis Marchionem, id. Sext. moritur ille turbo et tempestas pacis Philippus Vicecomes, & inde additus animus & spes Venetis convertendi in ditionem suam Mediolanensem provinciam. Ceperant jam Laudem Pompejam & Placentiam, & armis & castris alias tentabant civitates. Metuens Alphonsus, ne dilationem res non pateretur, bellum Florentinis movere deliberavit, quod sperabat posse Venetos abduci a Cisalpina Gallia, ut foederatis opem ferrent. Itaque iter ad Etruriam direxit cum exercitu, qui constabat ex septem millibus equitibus totidemque fere peditibus, & cum totius belli instrumentis atque apparatu. Hac re Florentiam nunciata, magnus repente terror omnium animos invasit, delectus habentur, creantur Decemviri, qui belli curam gerant, quorum & in numero erat Cosmus, & Joannottus Pittius & Bernardus Mediceus legati ad Regem in Monte Politiano confidentem mittuntur, qui petant atque orent, ut ab armis discedat, quod causa

nulla erat, quare irasci Florentinis deberet, qui nihil fecerant, & ne cogitaverant quidem inimicum illi, vel dum in magna perturbatione rerum fortunae & hostibus ipse succumbere debere videbatur. Ad ea respondit Alphonsus: *se multorum promissa, & preces, & spem pacis deseruisse, quod videbat nonine pacis bellum involvi a Venetis, qui tantos spiritus tantamque arrogantiam sibi sumperant, ut ferendi amplius non viderentur: periculum esse, ne ipsi Italiae domini fierent, quod sine Florentinorum subsidiis nunquam tentare ausi fuissent; ipsos materiem praebuisse eorum ambitioni, & tantae culpa poenas daturos Deo hominibusque; se vero non suam modo, sed & Italiae universae causam agere, quod hostis ad eos advenerit, & insigne documentum Etruriae vastationem fore, ne quis fidei Venetae aut societati confidat.* Ferocia haec dicta moverunt maxime Florentinorum animos, & quamvis nonnulli essent, qui suaderent foedus cum Venetis rumpendum, & pacem cum Rege faciendam, obstitit tamen eorum sententiae Cosmus (sunt, qui tradunt (98) illum principio Regis iracundiam & vires formidantem secus judicasse) qui pluribus verbis docuit tum se minime honestum & tutum censere vetustissimam amicitiam, qua una stetit res Italica adversus Philippi Ducis nefarios conatus, dissociare. Profecto multa erant Florentinis adversa, Regis potentia atque ira (ajebat enim se aut interiturum, aut Florentiam cum

suo gubernatore Cosmo everfurum) tot bellis imminutae Reipublicae vires, absentia Sfortiae, qui cogebarur sui & Mediolanensium rationibus consulere, infidelitas Ducum, quorum nonnulli ad Regem ipsum cum suis copiis transierant, levitas Senensium, & insidiae, quae fiebant a Sigisfredo Malatesta Arimini domino fortunis Friderici Urbini Comitis, cujus virtuti & viribus nostri magnopere confidebant. Comparaverat & Rex modicam classem ad subvehendos comatus, & ad adoriendum Plumbinum, cujus, qui dominus esset, cum universae Etruriae facile potiri posse ajebat. Tot tantisque difficultatibus afflicti Florentini litteris legationibusque sollicitarunt Venetos ad auxilia ferenda (99), sed ab iis nisi inania verba, & interdum etiam odiosa elicere minime potuerunt, ut nullo cum pudore ingrati animi suspicionem illi sustinere viderentur. Itaque coactis quaerere externa auxilia Cosmus auctor fuit, ut in Provinciam ad Renatum Regem Antonium Pactium legarent, qui cum invitaret ad renovandum bellum cum Alphonso, recuperandumque Neapolitanum Regnum, quod facile potuisset, conjunctis ejus & Reipublicae viribus, & ad faciendam rebellionem excitatis Apuliae ceterarumque provinciarum Regulis, quibus intolerandum erat tyrannicum Alphonso imperium (100). Proponuntur a Renato conditiones quaedam, quarum caput erat, ut Florentini & Veneti magnam partem

militarium stipendiorum persolverent. Frustra tempus conteritur in his rebus tractandis, & soli Florentini impetus atque incurSIONES armorum Alphonſi Regis ſuſtinere coguntur.

Is principio Volaterranum agrum vexavit, captaque Ripomarancia, milites tantam crudelitatem in oppidanos exercuerunt, ut alia oppida metu perterrita deditionem fecerint. Fortiter tamen obſidionem ſuſtinuit Monſcaſtellus, & Rex inde movere coactus, iter ad Campiliam direxit, ſperans, ea capta, ſe facile in poteſtatem ſuam Piſanam provinciam redacturum. Quanquam nonnulla parva oppida ceperit, Campilienses tamen ſe fortiffime defenderunt, hoſteſque ab oppugnatione deſiſtere coegerunt. Hanc rem graviter illi tulerunt, quod nimium viribus ſuis fidentes omnia oppida ad reſiſtendum imbecilla fore putabant. Erat hiems ſumma, tempeſtas perfrigida, quare exercitum in hiberna Rex duxit, poſitis caſtris in colle, qui imminet portui, quem veteres Populoniam dixere, quicquæ aberat a Plumbino millia paſſuum circiter vi. Caſtra erant ad bellum ducendum aptiſſima natura, & loci munitione, et maris propinquitate, & caeli temperie. Sed antequam primo vere illud inſtauraretur, actum eſt de pace, impetrataque foret, ſi quod impenſae factum erat in bellum ipſum, praestare Florentini, & ab Venetorum anicitia ſe remove- (haec enim poſtulabantur a Rege) in animum induxiſſent.



Hos vero ut omni ratione vexaret, pelli e suo Regno iussit omnes eos, qui mercaturam faciebant, ex quo magnum damnum universa Respublica accipiebat. Saepe etiam Rex querimonias de rebus Mediolanensium habebat, adjurabatque se nunquam passurum, ut ii aut in Venetorum, aut in Aurelianensis Ducis, qui et jus se habere in illos agebat (101), potestatem venirent.

Confecta hieme, auctoque exercitu, Rex ad Campiliam accessit, simulans se velle oppidum expugnare, sed repente copias ad Plumbini periculum convertit. Dominabatur in eo Rainaldus Ursinius Catharinae Appianae uxoris nomine, ad quam Jacobi patris morte jure hereditario oppidum illud pervenerat, qui sibi timens, petiit a Senensibus, ne se, quem commendatum in suorum amicorum numero jamdiu habebant, maximo in discrimine desererent. Quod nihil ab iis obtinere potuit, convertit se ad Florentinos, & studiis Cosmi factum est, ut nihil non ab iis sperare juberetur. Pecunia, spe promissisque abduxerant ii a Rege Sigismundum Malatestam, & arte singulari effecerant, ut is & Fridericus Feltrius, qui contentionibus & ambitione diu inter se dissidebant, mirifice de defendenda causa Reipublicae consentirent. Quorum adventus in Volaterranum agrum regii exercitus audaciam compressit, nostrosque & Plumbinenses firmavit, ut se ex maximo timore colligerent.

Ad haec Florentini quatuor magnas triremes & duas minores summa industria instruxerant, iisque praefecerant Bernardum Venturam, qui usum rerum navalium percallere putabatur. Nactae idoneum ventum ex portu Pisano exeunt, & ad S. Vincentium, qui locus non longe abest a Plumpino, perveniunt. Ubi eas regiae naves conspexere, se se ad configendum parant, & qui iis praeerat Garzerarius Recchescensis Hispanus, plenus spei bonae atque animi, quod navium numero superior erat, adversus eas cursum direxit. Commisso praelio, principio Florentinis res nulla ad virtutem defuit, & memores praeceptorum, quae paullo ante a Cosmo acceperant, ita decertabant, ut nullum aliud tempus ad conandum habituri viderentur, perinde ac si ii, qui pugnantes in discrimen ac periculum vitae vocabantur, non ita multo se reliquorum civium fatum antecedere existimarent, quibus, urbe capta, eadem esset belli fortuna patienda. Neapolitani non cedebant virtute nostris, tantaque vi post quinque horarum acerrimam pugnam in binas triremes, quae antecedeabant, se se incitarunt, ut hae vehementissime ex concursu laboraverint. Qua re animadverta, in cas impeditas impetum faciunt, celeriterque ambas capiunt. Nox praelium diremit, victique cum in fugam se se coniecissent, Pisas redeunt. Hanc cladem culpa Praefecti, cujus se nomen ignorare ait Ammiratus, accidisse putarunt Florentini. Et qui-

quidem si ille magis idoneam rei gerendae occasionem exspectasset, aut saltem hostes coegisset longius a litore dimicare, ne facile parvis navigiis novi & recentes milites fessis & faucibus submitterentur, & capta oneraria navi, praedae cupiditatem cohibuisset, non adeo adversam expertus esset fortunam. Hac victoria elatus Rex, cum mare tutum ab hostibus esset, acrius ad diruendos machinis muros Plumbini incumbebat. Verum quod interdiu ceciderat, noctu ab oppidanis reficiebatur, quibus non ad munimenta modo defendenda satis animorum erat, sed etiam ad laceffendum hostem (102). Cosinus per litteras Ursinio magnopere mandaverat, ne per vim oppidum expugnari, ne se Regis minis terreri, aut promissis allici (& sane nihil ipse intentatum reliquit) pateretur, quod priusquam autumnus appropinquaret, ille ab Etruria demigrare coactus fuisset. Ac sic accidit, ut cum toties expugnationem oppidi, ac postremo, quae ultima esse solent in bello, frustra tentasset, ac plurimum innunutus fuisset ejus exercitus laboribus, vulneribus, aestu & morbis, quos caeli aquarumque gravitas maxime attulerat, ne ob anni tempus (aequinoctium enim suberat) navigatione excluderetur, iter Neapolim versus arripuit. Via, quae est in ora maritima, ad Centum usque Cellas jactatus fuisset tempestate, tandem Cajetam appulit. Magha pars militum,

P

effigies, immo umbrae hominum fame, illuvie, squalore eneati, claudi ac debiles equi terrestri itinere Neapolim rediere. Profecto si Florentini adeo quassatum exercitum ac prope fugientem insequi voluissent, magna fane ei detrimenta attulissent, sed parcendum Regi putarunt, a quo multa sperare et timere poterant propter ejus potentiam & singulares virtutes. Tum per Nicolaum Pontificem agi de pace coeptum est, explorataque Regis voluntate, cum ad illam ipsum inclinare intellexisset, Cosmo persuasit (103), ut homines idoneos Neapolim legandos curaret, qui conditiones ferrent atque acciperent. Fuerunt hi Jan-nottus Manettus & Franciscus Sacchettus, qui cum aliquandiu disceptassent de reddenda Florentinis Castilionis arce per injustum erepta bellum, & de solvenda Regi certa pecuniae summa, tandem consenserunt sic pacem accipiendam, ut quae hinc inde essent, aut oriri possent controversiae dijudicarentur a Cosmo & a Petro Bifaldimo; si vero de aliqua re ii dissiderent, arbiter illius esset Romanus Pontifex. Ejusdem pacis suaeque voluntatis erga Florentinos confirmandae causa Rex ipse Legatos Florentiam misit, quibus dicentibus ita plausum est, ac si per eum salva Respublica fuisset (104). Praemiis etiam affecti fuerunt Duces, qui Rempublicam tempore belli adjuverant, & cum Florentiam advenisset Rainaldus Ursinius, nemo non ejus singularem virtutem hono-

ravit, decretumque eidem annuum stipendium fuit novem millium Florenorum, quo illata ab hostibus damna refarciret, suisque copiis agrum Florentinum a militibus defenderet, quos Alphonsus Rex in praesidio Castilionis collocaverat (105). Sed quoniam ea erat conditio temporum, isque Italiae status, ut bellum ex bello sereretur, non diu Florentinis pace frui licuit, qui in amicorum periculis eundem habebant animum, quem in suis difficultatibus. Mortuo, uti supra commemoravimus, Insubrium Duce, Mediolanenses de libertate recuperanda laborarunt, sed cum tantae non essent illorum opes, ut ambitioni Venetorum obsistere possent, traxerunt in partes suas Franciscum Sfortiam, qui armatus praestolabatur occasionem sub suum imperium ditionemque eosdem redigendi. Sed tum decebat occultare ac dissimulare hanc cupiditatem suam, quare hoc spectare videbatur, ut se duce non Mediolanenses modo, sed et aliae illius regionis civitates adversus ambitiosos Venetorum conatus libertatem suam retinere possent. Is quidem multa ab iis capta loca recuperavit, & ut majus detrimentum Respublica acciperet, praelium commisit cum illius copiis ad Caravaggium, ex quo gloriosissimam victoriam reportavit. Tum Veneti pro jure foederis a Florentinis auxilia petere, quae minime abnuenda Cosmus putavit, quamvis ejus in Sfortiam haud immutata esset voluntas. Huic quidem aut palam, aut se-

creto in difficultate nummaria subvenit semper, & quae agebant, de communi sententia agere videbantur. Cum Mediolanenses timere coepissent, ne quidquid prospere eveniebat Sfortiae, ad patriae periculum converteretur, pene coegerunt ipsum pacem facere cum Venetis. Sed haec ad breve tempus duravit. Nam cum ipse, capto jam Ticino aliisque urbibus, Mediolanum obsidione clausisset, ut brevi illud se in sua potestate habiturum speraret, tum subito Veneti illi per Leonardum Venerium denunciarunt, foedus se junxisse cum Mediolanensibus, & se illi hostes futuros, qui eosdem vexasset. Hic nuncius maxime commovit & perturbavit Sfortiam; at ejus fidelissimus consiliarius Cosmus suavit ei, ne animo deficeret, obsidionem continuaret, & nihil non a sui & Reipublicae opibus expectaret. Non diu urbs famem, ceterasque belli calamitates sustinuit, quapropter se dedere coacta, Sfortiae regalia insignia detulit, ipseque viii. Kal. Aprilis an. mcccc. Mediolanensis Ducis nomen assumpsit. Non est credibile quanto id gaudio compleverit Florentinorum animos, qui gratulandi & amicitiae confirmandae causa statim ad Sfortiam miserunt cives primarios Petrum Cosmi filium, Nereum Capponium, Lucam Pittium & Dietisalvum Neronium. Retulerunt hi singulari humanitate ac benignitate a Sfortia se acceptos fuisse, hunc in omni sermone praedicare eximiam fidem Cosmi & Florentinorum omnium,

atque affirmare se non solum regnum , sed & animam prius amissurum , quam ulla in re auctoribus fortunæ suae deesset . Haec omnia aegerrime ferebant Veneti praevidentes quantum pondus habituræ essent in Italia eorum conjunctæ vires , & non solum pigebat eos potentiae Sfortiæ , sed etiam pudebat , quod ad nihilum recidissent tot studia , tot conatus , tot impensæ , ut suæ ditionis florentissimam Provinciam facerent . Sed non propterea omnino animos demiserunt , & periclitari deliberarunt , si quo modo potuissent Sfortiam , non bene adhuc firmato imperio , ab illo deturbare . Tentarunt itaque Alphonsum Aragonium , quo animo hæc omnia ferret , cumque cum facile revocassent ad vetus odium in Sfortiam & Florentinos , coierunt cum ipso societatem , ea mente , ut in illorum possessiones irrumperent . Sed quod tum facere turpe & periculosum esse videbatur , occultandum & belli causam quaerendam putarunt . Venerunt itaque a Rege & a Venetis Legati Florentiam , qui nunciarunt illos inter se foedus junxisse , non ut cuiquam damnum inferrent , sed ut tuti essent ab aliorum injuriis , & Italiae salutis tranquillitatiq; consulerent ; quapropter se rogare Florentinos , ut se tertios ad amicitiam adscribe- rent . Venetus Legatus in ea , quam ad Senatum habuit , oratione reprehendit atque accusavit Florentinos , quod subsidia amicis debita in libidine audaciaque Sfortiæ consumpsissent , debere eos facti poenite-

re, ac videri eorum prudentiae esse, vitare pericula, quae procreabantur ab eo, quem ipsi armassent & ad minime ferendam potentiam exexissent; si vero in ejus amicitia permanere voluissent, durissimo bello premi, & ruinas fortunarum suarum videre parati essent. Causam patriae egit Cosmus propter summam ejus auctoritatem, & quia prudentiam cum eloquentia jungebat, ita locutus fertur.

*Si quem animum Respublica vestra in communis fortunae defensione tot annos habuit, eundem minime immutasset, nulla profecto illi de nobis querendi causa esset. Fides & religio foederis tam sancte a nobis servata est, ut non dubitaverimus vel arma sumere contra eos, quos habere amicos Reipublicae maxime intererat. Nihil turpius quam cum eo bellum gerere, a quo magna accepta sunt beneficia, nibilo tamen minus, dum vos treennio ante armis contendebatis cum Sfortia, non ut vestras possessiones tueremini, sed ut alienas occuparetis, misimus ad vos Sigismundum Malatestam cum bis mille equitibus, & Gregorium Auglariensem cum mille peditibus, strenuos sane duces, qui utilem operam tribuerunt Reipublicae. Neque id erat praebere se gratos benemeritis. Nam cum vestrum causa in magna venissemus pericula, quibus unicum remedium esse videbatur reditus in Italiam Renati Andegavensis, vos recusastis stipendia solvere ejus peditibus, totque difficultates nostrae voluntati ac diligentiae attulistis, ut quod caluerat negotium, bre-*



vi refrixerit. Nibilo tamen minus studium vos defendendi ab hostibus semper vobiscum commune fuit, & quasi nos ipsi vicissemus, quod pie, quod grate, quod anice aut fecimus, aut tulimus, in utilitatem praesertim vestram cessisse gratulati sumus. Quod vero nostri sensus, quenniamodum in bello, sic in pace mirifice semper congruerunt, ut vobis placuit depouere inimicitias, quas cum Sfortia gerebatis, libuit & nobis cum ipso veterem renovare amicitiam, & laetitiam apertissime tulimus, quod fortuna & virtus elargitae sint ei regnum, quo usutum illum merito speramus ad sui gloriam & foederatorum utilitatem. Superioribus annis divinam illius fidem, divinam virtutem praedicabatis, quod per eas Piciniorum audacias atque furores, & mobile & infidum Philippi Ducis ingenium, qui vestris fortunis maxime inhiabat, cohibere potuimus; nunc, quando debitum praecclarissimis suis gestis praemium obtinuit, nihil non ab eo timendum esse affirmatis, quasi insolentia dominatus non extulerit modo, sed etiam immutaverit ejus animum, & ad omne indignissimum facinus inflammaverit. Nos in illum acquiores in pristina mente erga auctores fortunae suae ipsam mansurum confidimus, & nunquam adhibiturum nervos suos & animi excelsi atque invicti magnitudinem ac robur, nisi adversus eos, qui malo consilio de sui & amicorum perniciie cogitabunt. Quae verecundia est vos, Veneti, de boniue, quem semper fidelissimum habuimus huic nostro imperio, tot mala suspicari, nosque insimulare violati

*foederis, quod ei iulerimus opem & auxilium, quando utilitas vestra ipsum vobis reconciliavit? Si igitur optima fide erga vos semper fuimus, nec ullam de nobis querendi causam habuistis dum bella gerebatis, quod vestrum silentium satis indicavit, cur in pace nos immeritis incusatis querelis, & minas jactatis, ut nos adigatis ad novum foedus sanciendum (quasi vetus unquam ruperimus) cujus nomine crudelissimum bellum involvi arbitramur? Hostis, non amicus vim & arma intentat, quae si feretis adversus nos, consolabimur cum conscientia bonae mentis, tum etiam spe Deum patronum, custodem & defensorem fore justissimae causae, nostraeque libertatis. Nemo impune adhuc hanc nobis eripere tentavit, & civitatem, in qua nunquam hostis armatus vestigia posuit, nobiliora etiam posteris fortitudinis & patrii animi exempla prodituram speramus. Nihil habuit quod ad haec responderet Venetus Legatus, ut ad lenitatem acquitatemque revocatus esse videretur. Dum vero expectabatur quid consilii Venetus Senatus esset initurus, nuncius affertur ipsum tulisse edictum de pellendis Florentinis, qui frequentissimi Venetiis & in universa ejus ditione negotiabantur, quod exemplum, Reipublicae sane rationibus perniciosissimum, paullo post, eodem instigante, secutus est etiam Alphonsus Aragonius (106). Tantum odio atque irae Veneti indulsērunt, ut egerint etiam cum Constantinopolitano Imperatore, ut idem vellet, quod a fide sua abhorreere respondit.*

Haec quamvis hostilem Venetorum animum factis ostenderent, quia tamen bellum Florentinis minime aperte nunciaverant, hi miserunt ad eos Legatum, ut dehortaretur a discindenda amicitia diuturna voluntatum & studiorum consensione conjugata. Sed hic, jure gentium violato, in fines imperii non admittitur. Tum omnia velut adversus vicinos hostes cauta provisaeque fuerunt. Ietum foedus cum Francisco Sfortia de sententia Cosmi (erant enim multi, qui deferendum illum censebant, ne ejus causa detrimentum Respublica caperet) nec prudens ullus dubitabit hac re maxime utriusque salutem stetisse. Nam si Florentini Venetis adhaesissent, Dux profecto viribus hostium succubuisse, eandemque postea fortunam iidem subiissent, conversis in se se victorum armis. Accesserant interim ad Venetorum Alphonsique societatem Sabaudiae, Montis Ferrati, Carpique Principes, conveneratque inter eos, ut Rex Florentinos, ceteri Ducem adorirentur. Hi in unum coaetis copiis, quarum viginti & amplius millia numerabantur, rebusque omnibus ad bellum necessariis comparatis, Cremonensem agrum, maturis jam frugibus, depopulabantur. Non minus Francisco omnia ad bellum apta et parata erant, receptoque in societatem Ludovico Gonzaga Mantuae Regulo, manus conferere cum hostibus optabat, priusquam illi quaesitis auxiliis confirmarentur. Primo impetu Brimam castellum, mox alia Venetorum op-

Q

pida cepit. Positis deinde ad Quintianum castris, ut ab hostibus conspici possent, praesentem facultatem cum iis praelium conferendi praestolabatur. Sed ipsum belli fortunam minime tentandam putarunt, & quo illud longius traherent, paludes, quae Brixiam Bergomumque interjacent, petiere. Ne segniores essent Florentini in exequendis iis, quae e Republica esse videbantur, Cosmi diligentia efficiebat. Ipsi in fide Reipublicae Bononienses confirmarunt, Genuenses sibi adjunxerunt, stipendia Simonettae, Sigisfundus Malatestae, Astorri Manfredio aliisque decreverunt, & Legatos quaque versus miserunt, ut allicerent Principum voluntates aut alienas aut dubias, partas retinerent. Nihil vero tam valuit ad augendas spes Reipublicae, quam foedus pactum inter ipsam, Mediolani Dacem et Gallorum Regem, qua in re mira fuit Angeli Acciajolii dexteritas (107). Inter haec Florentiam venit Fridericus Austriacus, qui Romam petebat a Romano Pontifice coronam ceteraque Caesarea insignia accepturus. Decernitur, ut ei obviam iretur ab Archiepiscopo (108) (is erat Antoninus vir doctrina & sanctitate clarus) & viginti duobus primariis civibus, ut deduceretur in Mucellanam Cosmi villam tanquam ad regale diversorium, utque in urbe magnificentissimo exciperetur hospitio ad S. Mariae Novellae. Comitabatur Caesarem ceteros inter Ladislaus Bohemiae & Hungariae Rex, qui posthumus ab

Elisabetha matre ei in tutelam traditus fuerat. Egrot hic secreto cum Cosmo ceterisque, qui summum magistratum gerebant, ut sibi adiutores esse vellent, quo gubernacula suorum regnorum prehenderet, quod se facturos negarunt, ne ex eo aliquid offensionis Caesar haberet. Eodem tempore Liburnum appulit, quae huic desponsa erat, Eleonora Portugalliae Regis filia, & ipsa quoque liberaliter atque honorifice tractata est. Non diu hi in Italia fuere, ex qua ut discesserunt, exeunte vere an. MCCCLII., bellum crudele, quod Alphonsus terra & mari comparaverat, Florentinis sustinendum fuit.

Venit in agrum Cortonensem Ferdinandus Aragonius Regis ipsius filius cum octo millibus equitum et quatuor millibus peditum, sed adolescenti tum primum ennti ad militiam datus est consiliarius & tanquam summus moderator omnium rerum Fridericus Urbini Comes, quem sane perpauci aequarunt scientia rei militaris, virtute & consilii felicitate. Unus tum Sfortia ejusdem focer, cui adolescens bellicam in disciplinam se se tradiderat, par illi esse poterat; sed cum hominem cum homine, & facta cum factis comparo, inclinatur animus, ut nostratem Hannibalem (sic enim Fridericus appellabatur, non modo quia valebat calliditate, ceterisque militaribus virtutibus, sed & quia altero oculo caecus erat) ejus aemulo praefeream, quod non tam belli, quam pacis artibus plurimum praesta-

Q<sub>2</sub>

bat. Miror equidem hunc a fide data Florentinis, qui ei quadriennio ante suarum copiarum summum imperium commiserant, discessisse. Fortasse prae odio, quod habebat in Malatestam, in hanc mentem impulsus est. Illo duce, Ferdinandus depopulationem & vastitatem intulit Cortonae agro, sed quia de expugnanda urbe desperabat, iter ad sinistram dirigens, Fojanum Aretinae regionis oppidum obsedit. Mira in hac obsidione virtus fuit non modo virorum, verum etiam mulierum, qui intus erant, sed demum lassitudine & vulneribus confecti, cum nemo subsidio veniret, se se dedere coacti fuerunt. Post id Ferdinandus, collocatis militibus in praesidio oppidi, per agrum Senensium, a quibus ejus in Florentinos odium fovebatur, ad arcem, quam Rencinam vocant, pervenit, quae septimo die Praefecti ignavia dedita est. Cum essent nonnulli Florentiae, qui querebantur magnum Rempublicam accepisse detrimentum ex capto oppido, ab iis pacato laetoque vultu quaesivisse dicitur Cosmus, ut sibi indicarent qua in parte ditionis Florentinae illud esset. Inde hostes Castellinam quatuor millibus passuum arcis propinquam accessere, ibique castra posuerunt. Frustra de expugnando oppido quadraginta & amplius dies laborarunt, in quo cum essent occupati, excursionibus & latrociniis vicinam regionem infestabant. Defendebat Simonetta propinqua urbi loca, & subitas incursiones sustinebat; Malatesta vero ad montem,

quem Imperialem nominant, Poggio Bonitio imminentem castra locaverat, tunc ne caperetur ab hoste, tum ut hunc sive Pistorium, sive aliam quamcumque partem Florentiam versus peteret, insequeretur. Quae hinc inde tota aestate & autumno gesta sunt nullius aut parvi momenti fuerunt, & cum Novembri incunte omnia rigerent jam nive & frigoribus, visum est Ferdinando exercitum iam hiberna deducere, delectis ad id locis Senensium maritimis, ubi commeatus & pabuli copia abunde erat. Ex iis locis crebrae per hiemem in Florentinorum agros factae sunt incurSIONES ab hostibus, quibus sola praeda pro stipendio erat. Ab Alphonfi quoque classe agri Volaterrani arx munitissima Vada nomine, Rubei Attavantii civis Florentini aut ignavia, aut, quod credibilius est, perfidia capta est, de quo valde doluit Respublica, quod inde hostes facile aditum habere potuissent ad Pisanos adoriendos. Ea propter jussus est Simonetta prope Campiliam subsidere, ejusque virtute & diligentia factum est, ne illi longius progredi auderent.

Cum tempus ad gerendum bellum idoneum advenisset, Cosmus ad Sfortiam Ducem litteras mittit, ut quam celerrime posset, quoniam plurimum hostium suorum vires infirmaverat, foederatis succurreret. Ille Alexandrum fratrem in Etruriam cum bis mille equitibus, qui exercitatisimi erant in armis, contendere jussit, iique cum se conjunxissent cum nostris copiis,

magnam his fiduciam, ut timorem hostibus attulerunt. Beneficium reddidere Florentini, cum Sfortiae, qui pecunia egebat, octuaginta millia florenorum mutua dedissent. Neque is parvo pretio suas mercenarias copias vendebat. Pro quadringentis enim equitibus tria & amplius florenorum millia in singulos menses expensa fuisse a Florentinis scriptum invenio. Cum de summa rerum Florentiae deliberaretur, erant sententiae, quae conandum omnibus modis, castraque Aragonensium oppugnanda censerent. Alii praestare dicebant minime belli fortunam tentare, ne quid gravius Reipublicae accideret. Cosmus utrumque improbens consilium, quantum alteri sententiae superesset animi, tantum alteri deesse dicebat; quapropter, eodem auctore, vires Reipublicae ad recuperanda, quae amiserat, conversae fuerunt. Capitur Recina & Fojanum cum praesidiis, quae iis in locis posuerat Ferdinandus, Vada tanto ardore expugnatur, ut cum animus & vires deficerent hostibus ad eam defendendam, ipsi cum arce in potestatem nostrorum venturi essent, nisi consensu navibus fugam arripuissent. Ne illud receptaculum amplius hostibus pateret, funditus eversum fuit. Atque hostium copiae non solum his adversis rebus, sed etiam quia multi ad nostros transfugerant, & quia gravis aestas in regionibus mari propinquis & insalubribus omnem fere exercitum valetudine tentaverat, plurimum imminutae erant. Ne-



quaquam etiam, quemadmodum speraverat, processit Ferdinando, ut obtineret a Gherardo Gambacurta Bagni oppidum ejusque agrum, ad quae sibi danda magnis promissis illum allexerat. Haud enim occultari infidi hominis dolus ac perfidia potuit, & privatus ille ditione fuit, quam ab ipsa Republica Florentina acceperat ejus Pater Joannes, ut illi praemium daretur pro deditis Pis. His rebus confectis, perinde ac si ad laborum periculorumque finem esset perventum, multi Florentinorum de ulciscendis Senensibus, qui quidem plurimum faverant Aragonensibus, egere. His respondit Cosmus, etsi multis jam rebus perfidiam Senensium perspectam habebat, non se censere tamen iis aperte bellum inferendum; cupere hoc Ferdinandum, ut eos foedere & societate conjunctos haberet; non augendum inimicorum numerum; magis opportunum tempus expectandum ad persequendas injurias; has in praesentia dissimulandas, reservandasque vires ad removendum hostem, qui adhuc in Reipublicae visceribus insidebat. Actum interea est de pace, Romano Pontifice non modo hortationibus, sed etiam minis ad eam Principes stimulante, qui totus inflammatus erat ad avertendos a Christiana Republica furentes Turcarum impetus. Sed ad illam obtinendam plus valuit propria bellatorum, quam publica utilitas. Deseruerat spes Venetos deturbandi Sfortiam Ducatus Mediolanensis possessione non modo propter ejus virtutem &

robur, sed etiam propter auxilia, quae illi a Renato Rege mittebantur. Quod hic e Cisalpina Gallia redire coactus ad suos fuerat, misit statim in Italiam Joannem Filium cum mandatis, ut omnem vim adhiberet ad Florentinorum & Sfortiae hostes opprimendos. Fractus ille & debilitatus exercitus Aragonensis, qui nihil magnum in Etruria efficere potuerat, vel quando viribus valebat, ductoresque summos viros Fridericum Feltrium, et Aversum Napolconemque Urfinios habebat, erat sine ulla expectatione rerum meliorum, & pace turpem ab Etruria discessum obtinere vehementer cupiebat. Ipsi Florentini et Sfortia fessi erant belli fluctibus & impenis, quas illius causa fecerant, et otium quaerebant, ut amissas vires redintegrare possent. Omnibus igitur consentientibus pax iii. id. Aprilis an. mccccliv. conciliata est, ea inter ceteras lege, ut Sfortia et Veneti amissa in bello recuperarent. Tum minime recuperarunt Florentini Castilionem Pescariae & Gavorranum, ac vehementissime quidem antea petierat Sfortia a Cosmo, ne parvorum oppidorum causa, quae retinere volebat Alphonsus, ut non frustra Reipublicae hostis fuisse videretur, concordiam suis rationibus utilissimam turbaret. Huic vero ut auctoritas dignitasque adjungeretur, legati sunt ad Venetos Jannottus Pandulphinius & Petrus Cosmi Filius, qui Senatui exposuerunt: *non videri satis communi tranquillitati esse consultum, nisi pristina amicitia,*  
*ent-*

*culpa temporum intermissa, inter duas Respublicas renovaretur: his enim societate junctis a nemine Italas res turbatum iri. His dictis valde omnes assensu sunt, novumque foedus inter Florentinam & Venetam Respublicas ac Mediolanensium Ducem sancitum est, invitatusque Alphonsus Rex, ut in eo locum habere vellet. Hac de causa missi ad eum legati fuerunt a Venetis Hieronymus Barbadicus & Zacharias Trivifanus, a Sfortia Bartholomaeus Vicecomes Novariensis Episcopus, & Albericus Maletus, a Florentinis Bernardus Mediceus & Dietrichus Neronius. Post aliquot concertationes tandem Regi persuasum est, ut leges foederis acciperet, et pacem apud Laudem Pompejam factam confirmaret, nonnullis, quae ad Regem ipsum pertinerent, additis conditionibus. Id inter cetera decretum, ut si qua in posterum controversia inter foederatos oriretur, Pontifex ejus judicandae jus potestatemque haberet, neque cuiquam arma adversus alium sumere jus esset, nisi postulato prius latoque Pontificis decreto. Universum hoc bellum ad memoriam Cosmi sane insigne est, quod ut aequabilitas quaedam esset potentiae in iis, qui maxime in Italia dominabantur, neque cuiquam facultas esset pro libidine omnia mutare atque miscere, utque viam sterneret Sfortiae ad Mediolanensium imperium obtinendum, in eoque ipsum confirmaret, consilio cum improvidis civibus, & armis cum potentibus hostibus*

R

dimicare minime dubitavit. Quod vero in liberis maxime civitatibus secundae adversaeque res immutare solent animos, vel ii ipsi, qui in conviviis rodebant, atque in circulis vellicabant illius obstinatiorem voluntatem in alendis bellis, de eodem, confecta pace, sic praedicabant, unum esse, cuius consiliis atque providentia res Italica, ac dignitas Reipublicae Florentinae staret.

Tempore belli nihil praetermisit Cosmus, quantum facere potuit, ut multae nobiles & divites familiae a privatis contentionibus avocarentur, redderenturque patriae multi, qui ab ea exulaverant. Quos vero sui amantiore noverat, hos omnibus beneficiis afficiebat; mercabatur interdum etiam nonnullorum officia & voluntates, & cum potens ac florens per mediam urbem volitaret, in eum omnium civium oculi atque animi intenti esse videbantur. Pulcherri-  
me etiam ejus res domesticae procedebant. Dederat in matrimonium Petro Lucretiam Tornaboniam, Joanni Corneliam Alexandriam, quae conjunctiones magnae ei voluptati erant, & quod amantiissime & concordissime cum iis vivebat, & quod nepotibus, inter quos erat Laurentius ille noster, qui avi laudes aut superavit, aut certe aequavit, familiam auxerant. Erat et in ea Carolus (109), quem ex serva (& mos tum erat primariis viris servas, quas non parvo emebant (110) in familia habere) genuerat Cosinus, dum

voluptas sicut labes quaedam ejus primam adolescentiam paullisper foedavit. Ceterum cum grandior factus accusavit, & justa reprehensione dignissimos illos putavit, qui blanditiis obscenarum voluptatum deſniti atque corrupti officia deſerunt, & mollitie obcaecati minime praevident quid mali familiae & patriae illae ſint allaturae. Nihilo tamen minus plurimum amavit Carolum, quod in eo egregiam quamdam indolem & praeclaram eſſe cognoverat, & ubi honorum & optimorum ſtudiorum cupidum vidit, Romam miſit, quo iis operam daret. Habebat is ſaepe a Patre mandata de comparandis Graecis & Latinis codicibus, numiſmatibus, aliisque antiquitatis monumentis, quibus ſic ſatisfaciebat, ut ad eum quoque hujus gloriae hereditas pertinere videatur. Conſuluit etiam Coſmus rebus fratris filii, quocum negotia communia habuit uſque ad an. mcccci. quo anno, Carolo Marſuppinio & Bernardo Mediceo Antonii F. judicialibus laudatoribus, bipartita facta eſt ampliſſimi patrimonii diviſio (111). Multa vero Coſmus providit divinitus, ut familia, ſummis laboribus a ſe ad ampliſſimam dignitatem & potentiam evecta, ſtabilitate fortunae conſidere, & civium injurias propulſare poſſet. Plures enim invidos illam inter optimates maxime habituram facile exiſtimatu erat, quod ii erant mores Florentinorum, ut libenter de iis detraherent, quos virtus & fortuna ſupra ceteros extollebat, & quem paullo ante

ob bene & praeclare gestam Rempublicam summis laudibus persecuti fuerant, invidiose criminarentur. Ipsam gratiam, qua plurimum pollebat apud omnes fere Italiae Principes, & apud Gallorum Anglorumque Reges, domui adminiculo fore sperabat, nullique parcebat industriae, quo illam retineret augetque. Gravissimus auctor Gallicae historiae Philippus Comineus satis constanter affirmat Eduardum iv. Anglorum Regem, Cosmo, cum regno ejectus pecuniam ab illius procuratoribus, qui Londini erant, magno gerendo bello necessariam mutuum sumpsisset, partam de hoste victoriam acceptam retulisse. Philippo etiam Burgundiae Duci (minores Principes nominare non lubet) pecunia subvenit, pro qua oppignerata eidem fuit pergrandis & magni pretii gemma, quam *Alisii florem* appellavere (112). Sic dum multis succurrebat Cosmus, suam rem & gratiam mirum in modum augebat. Nec vero ii, qui illum accusabant, nimium studere pecuniae, habebant quid jure succenserent. Ad rationem enim Reipublicae gloriosum erat multos beneficiis & aere obstrictos habere. Pertinebat quoque ad dignitatem Cosmi ejusque familiae magnus concursus, qui ad eum fiebat doctissimorum hominum. Eorum consuetudinem sancte retinendam putavit, quod ipse amabat litteras (quamvis propter infinitas tum publicas, tum privatas occupationes eas satis excolere minime potuit) quod iis mandari optabat omnes suos de inimicis triumphos,

ornamenta omnia honoris, monumenta gloriae ac laudis insignia, quod magni intererat ad decus civitatis ipsam florere omni genere honestissimorum studiorum, quodque liberos ac nepotes suos nunquam claros fore arbitrabatur, nisi exemplo, hortatu praeceptisque summorum virorum eorum mores conformarentur. Optime quoque iis utebatur ad rem publicam. Nam tres viri summi ex urbe Aetio Leonardus Brunius (113), Carolus Marsuppinius (114), & Benedictus Accolitus (115), atque Poggius Bracciolinius (116), qui scribendi elegantia ceteros vincere putabantur, Reipublicae ab epistolis (Dominorum Cancellarios vocabant) fuerunt (117). Hoc ipsum munus postea etiam sustinuit Bartholomaeus Scala, qui humillimo loco Colle natus atque egentissimus cum Florentiam venisset, & excellenti ingenio humanioribus litteris se se dedidisset, eum domum suam recipit Cosmus, munivitque ipsi viam ad amplissimas dignitates atque fortunas. Medicei dabant purpuram amicis (118), hi operas, quibus improborum & stultorum audaciae resistebant. Omnino ut quique optime nati institutique sunt, non ita capefunt Rempublicam honoribus imperiisque adipiscendis, quin se etiam ad studia doctrinae conferant, quibus curas, sollicitudines ac vigilias facilius perferant, optimaque parte hominis, quae in nobis divina ducenda est, ingenii & mentis acie fruantur. Quapropter minime intermittunt aut admirationem earum

rerum, quae sunt ab antiquis repertae, aut investigationem novarum, qua occupatione cum nunquam fatientur, nihil abjectum, nihil humile cogitant, tantaque est vis talibus in studiis, ut etiamsi maxime sibi proposuerint rerum publicarum administrationem, aut administrandi, sciendique prudentem, temperatam, fortem & iustam rationem, in iis tamen prorsus conquiescere videantur. Et hoc quidem apparuit in Cosmo, cujus illustria & gloriosa facta pro patria obscurantur ab iis, quae contulit ad litterarum incrementum, quod horum utilitas ad omnem regionem, omnemque posteritatem pervenerit. Ab his multi oratores, poetae, historici, medici, jurisconsulti, philosophi extiterunt, quorum artes, licet principio parvae fuerint, suis tamen progressionibus usae, postea magnae fuerunt. Nec sine causa. In primo enim ortu inest timiditas quaedam, ut homines nec res videre optimas, nec agere possint. Jam coeperat Juris prudentia veterem exuere barbariem exulta maxime per Antonium Minuccium, Franciscum Accoltum & Marianum Sozzinium, qui se summa a Cosmo beneficia accepisse in omni sermone praedicabant, jam in scholis paulo liberius de Peripateticorum opinionibus disceptabatur, jam praecepta non solum ad privatae vitae rationem, sed etiam ad rerum publicarum rectionem, jam leges, mores, instituta, disciplinae cognoscebantur, jam in pretio coeperat esse elegans Latinus sermo, jam Grae-



cæ passim excolebantur litteræ, harumque rerum omnium instrumenta in domo Cosmi tanquam in optimarum artium officina reperiebantur. Utebatur ille præsertim opera Nicolai Niccoli, Christophori Bondelmontii præbyteri Florentini ac Poggii Bracciolinii in comparandis antiquis codicibus, quorum copiam non modo iis faciebat, qui domum suam frequentabant, sed interdum etiam absentibus. Plures enim extant Nicolai v. litteræ, quibus eundem rogat de commodandis sibi ad exscribendum Græcis codicibus (119). Quanta vero illi viri essent industria & diligentia in exequendis Cosmi mandatis nihil attinet dicere. Nam tanquam canes venatici optime odorabantur & peruestigabant omnes veteres bibliothecas ac tabularia, & testis est locupletissimus Franciscus Barbarus Poggium ex Germania in Italiam transfuisse, atque e tenebris in lucem hominum protulisse Tertulianum, M. Fabium Quintilianum, Asconium Pedianum, Lucretium, Silium Italicum, Marcellinum, Manilium Astronomum, Lucium Septimium, Valerium Flaccum, Capram, Eutyrium, Probum Grammaticos, aliosque hujus generis scriptores bene multos. Vel ipsi, quos adhibebat Cosmus, librarii, erant apprise boni, celebrabaturque præsertim ex iis Vespasianus quidam Philippi Filius, doctus non Græcis solum & Latinis litteris, sed etiam Hebraicis, quem Lucam & Senas aliquando misit emendi codices causa. Ipse vero ha-

hebat non modo familiares, sed et contubernales Albertum Enochium Afculanum (120), quem Nicolaus a Vulpe doctissimum appellat, Antonium Pacinium Tudertinum (121), quibus filios suos instituclos dederat, Gentilem Becchium Urbinatem, quo ufus est Laurentius nepos & praeceptore optimo & amico fideliffimo & confiliario fapientiffimo, ac demum Marfilium Ficinium, qui fe binos patres habuiffe dicebat, Ficinium medicum, a quo natus est, & Cosmum Medicem, a quo in novam vitam revocatus fuit. Ficinii medici & chirurgi tum confuetudo Cosmo jucunda erat, tum etiam ars, quam est expertus in fui fuorumque valetudine tuenda, in quo fibi tum ipfa fcientia, tum etiam fidelitate benevolentiaque fatisfecit. Adeo vero filii illius gloriae laudique favit Cosmus, ut cum ex eo tempore, quo de myfteriis Platonis difputantem audivit Graccum philofophum nomine Gemiftum, cognomine Plethonem (venerat ille ad Florentinum Concilium) cogitationem fufcepiffet instituendae Academiae Platonicae, hujus principatum penes Marfilium effe voluerit. Nemo est in philofophia vel leviter eruditus, qui ignoret quantam gloriam haec Academia Etruriae & Mediceis pepererit, quod illa omnium prima delendae Scholasticorum tyrannidis & hujusmodi coetuum habendorum exemplum dederit. Cosmus in Careggianum propinquum urbi rus convocabat Academicos, & acu-

& acuebat omnium industriam ad interpretandum & explicandum illum animi & virtutis magistrum Platonem. Ne quid eis deesset, omnium Platoniorum libros studiosissime conquisivit, & auctor fuit Ficini, ut illustriores & quosdam etiam ipsius Platonis libros in Latinum converteret. *Contuli me in agrum Careggium (his ipsis verbis scribebat ad eundem Ficinium) non agri, sed animi colendi gratia. Veni ad nos, Marsili, quamprimum. Fer tecum Platonis nostri librum de summo bono, quem te isthic arbitror jam e Graeca lingua in Latinam, ut promiseras, transulisse. Nihil enim ardentius cupio, quam viam, quae commodius ad felicitatem ducat, cognoscere. Vale, & veni non absque Orphica lyra.* Testatur ipse Ficinius tam acutum fuisse Cosmum in disputando, quam prudens & fortis erat in gubernando; & nescire se utrum magis Platoni, an Cosmo ipsi deberet, quod *virtutum ideam, quam semel ille sibi monstraverat, eam hic quotidie agebat.* Hunc etiam modo comparat Soloni, quod per omnem vitam vel in summis rerum publicarum occupationibus solitus esset philosophari, modo Dioni Syracusano, qui expolitus a Platone doctrinis omnibus tantum magistro tribuebat, ut ille sibi unus esset instar omnium. Cave vero putes inter Academicos Platonicos Marsilio Ficinio quemquam superiorem fuisse tum ingenii acuminis, tum praestantia eruditionis atque doctrinae, ut veluti alter Speusippus ab ipso Platone philosophiae

quasi heres relictus fuisse videretur. De omnibus enim rebus, quae in illa continentur, poterat varie & copiose dicere. Illo igitur sic utebatur Cosmus, ut nec doctiorem, nec diligentior, nec officiosior, nec sui studiosior facile delegisset, quapropter nec quicquam invidi quidam de hac dirimenda conjunctione adlaborarunt. Cupide etiam fruebatur Cosmus sermonibus Paulli Toscanellii, hominis omni virtute et doctrina physica ac praesertim astronomia ornatissimi, sed hic nullum cum Platonis commercium habebat. Horum tamen divina studia se plurimi facere ajebat, & laudabat Cosmum, quod non tantummodo haec suae aetatis hominibus, sed etiam posteris proderet satagebat. Dum hic vero exequabatur omnia Academici officia & munera, dolere videbatur, quod propter maximas molestias & turbulentissimas tempestates non omnia, quae voluerat, perficere potuisset; sed fortuna, quae illum Reipublicae gubernacula tractantem potuit pervellere & pungere, non potuit certe magnum & fortem animum frangere, ne uno eodemque tempore & litteris & publicis rebus consuleret. Si nostra cum externis conferre voluerimus, nullam porro invenimus nationem, quae tum cum Florentina potuerit aequari doctrina & ingeniis, & quod omnium patrocinium susceperit Cosmus, & suis qua voce, qua exemplo auctor fuerit, ut in imperio atque in publica dignitate quaererent maxime laudem & glo-

riam, quae ex liberalibus disciplinis atque artibus aut cultis, aut provectis capitur, nulla esse debet tam immemor posteritas, nullae tam ingratae litterae, quae illius memoriam non immortalitatis memoria prosequantur (122).

Vetus haec est opinio multorum, per Graecos, qui capto Byzantio, ut Turcarum tyrannidem vitarent, in Italiam aufugere, ad nos veluti postliminio rediisse Graecarum litterarum & omnis politioris elegantiae studium. Quanquam nonnulli eorum ad provehendas Graecas litteras praeclari adjutores fuere, hae tamen, vel ante hoc tempus, adeo in Italia & praesertim in Etruria florebant, ut nos majoribus nostris hac in re plurimum concedamus. Philolphus, Aurispa (123), Guarinius, Robertus Florentinus (124) Jacobus Angeli de Scarparia, aliique plures multos annos ante quam a Mahumete Byzantium caperetur, in Graeciam concesserant, exquisitas antiquorum artes mercaturi, nec sine magna utilitate contigit, ut divitias, quas multo labore multaque industria congestere, ad Italarum suorum bonum contulerint. Extat hac de re praeclarum Pii II. Summi Pontificis testimonium, qui in ea, quam de bello Turcis inferendo habuit, oratione ait: *Mansit apud Constantinopolim usque ad nostrum tempus vetustate sapientiae monumentum, ac veluti ibi domicilium litterarum esset, & arx summae philosophiae, nemo Latinorum satis doctus*

*videri poterat, nisi Constantinopoli aliquandiu studisset, quodque florebat Roma doctrinarum nomen habuerunt Athenae, hac tempestate nostra Constantinopolis obtinebat, unde & multa veterum sapientum volumina susceperamus, & in futurum suscipere sperabamus. Vel ipsi Graeci, qui Florentiam Concilii causa accessere, mirati sunt Ambrosium Traversarium, ejusque collegam Jacobum Tornaquincium, Leonardum Brunium, aliosque adeo nosse Graecam linguam, ut multa, quae iis erant incognita (perpauci enim eorum disputationum cupidiores coluerant humaniores litteras) explicare docte & erudite potuissent. Haec studia vel ab saeculo xiv. transtulerat in Etruriam Leontius Pilatus, sed cum brevi ea friguissent, extiterunt multos post annos Demetrius Cydonius & Emmanuel Chrysoloras, qui fecerunt ut illa iterum in honore essent & passim celebrarentur. Publice vero docentibus Florentiae tum e Graecis ipso Chrysolora & Joanne Argyropylo, qui non exspectavit patriae Byzantii excidium, ut in Etruriam & in sinum Cosmi confugeret, tum e nostris Philadelpho & Christophoro Landinio, cujus doctrinae & ingenio plurimum semper favit Cosmus, nec non iis, quos paullo ante nominavimus, Leonardo & Carolo Aretinis, illa urbs tanquam sedes quaedam facta esse videbatur Graecarum atque Latinarum litterarum. Et mira sane erat Cosmi industria atque diligentia, ut intelligerent homines in ipsis rebus, quae*

discebantur & cognoscebantur, invitamenta esse, quibus ad discendum cognoscendumque moverentur. Tum quoque multi numerabantur, qui, ut omnibus nota essent Graeca exemplaria, in iis aut Latine, aut Italice reddendis utilem operam ponebant, & ex iis, quae scripsit Jacobus de Castiglionchio, qui et Lapis Castellunculus nominabatur, cum ad Cosmum mitteret Themistoclis vitam a se ex Graeco Plutarchi in Latinum conversam, intelligi potest, quantum hujusmodi exercitationes Cosmus ipse foveret. Licebat quoque Florentinis in hoc gloriari, ut cum saepe ad Principes mitterent legatos, qui cum instituti optime, tum etiam perfecte planeque eruditi ad Rempublicam accesserant, anteire ceteros illis artibus & studiis, quae sunt nobis Graeciae monumentis disciplinisque tradita, putarentur. Ii, qui studiose antiqua persequuntur clavis & magnis viris commemorandis, jactare quidem poterunt Jannottum Manettum, Bartholomaeum Valorium, Petrum Pactium, Ugolinum Peruzzium, Matthaeum Palmierium, Pallantem Strostium, Donatum Acciajolium aliosque, qui cum Graece luculenter scirent, & omni liberali & digna hominibus nobilibus doctrina essent eruditi, admirationem movebant ipsis, ad quos legabantur, Principibus. De Manetto quidem sic praedicabat Alphonsus Aragonius Rex, neminem se novisse, qui magis teneret artem dicendi, delectandi & permovendi audientium animos. Etsi autem

natura talem Cosmo mentem dedit, ut omnem virtutem omnemque doctrinam accipere posset, & traheretur ad cognitionis & scientiae cupiditatem, hac re tamen minime illorum, quos nominavimus, summorum virorum gloriam aequavit. Sed quia saepius ad laudem atque eloquentiam natura sine doctrina, quam sine natura valuit doctrina, habebatur & erat eloquentissimus, quanquam interdum dissimulabat hoc bonum, propterea quia prudentia hominibus semper grata est, lingua suspecta. Nisi modus adhibendus esset, possem multos alios & hujus, de qua scribimus, & superioris aetatis doctos viros commemorare, ex quo intellectu facile esset, viguisse Florentiae, ut et in aliis Italiae urbibus studia Graecarum litterarum omnisque humanitatis multos annos ante quam ex illa clade Constantinopolitana, & ad nos tanquam in tranquillitatis portum confugerint Demetrius Chalcondyles, Joannes Lascaris, Joannes Andronicus Callistus, aliique plures, qui apud Cosmum magno semper in honore fuerunt (125). Omnino quod ex animo excelsio magnificoque quaeritur, promptum & paratum in illo erat, praesertim si id litteris incrementum esset allaturum. Praeter illam suam domesticam bibliothecam ad studioforum commodum binas alias exaedificavit optimisque libris instruxit, alteram urbanam ad S. Marci, alteram suburbanam ad S. Bartholomaei. Quod vero illa pene tota corruiť an. MCCCLIII. quo tempo-



re magni Florentiae totaque in Etruria terrae motus facti sunt, ipsam non multo post instauravit renovavitque. Non est vero praetereundum, cum primum cogitationem suscepit hujus bibliothecae conficiendae, mandasse eundem Thomae Calandrinio, quando Florentiae commorabatur, quemque ad Pontificatum Maximum evectum fuisse commemoravimus, ut scripto exponeret qua ratione ipsa esset instituenda atque ordinanda. Credibile est quidem Vaticanæ bibliothecae institutorem, & callidum omnis generis librorum aestimatorem plane satisfecisse desiderio Cosmi. Hujus quoque studiis & munificentia factum est, ut multi codices, quos possederant Coluccius Salutati, Ugolinus Peruzzius, & Nicolaus Niccolus, qui ad eos comparandos non Italiam modo, Germaniam, Angliam, Galliam, sed & Graeciam perlustraverat, in illa ipsa bibliotheca conderentur. Quod vero Niccolus horum itinerum causa in aes alienum inciderat, hoc ejusdem heredes Cosmus liberavit. Porro nullus ferme erat, qui litterarum gratia in longinquis regionibus peregrinaretur, cui non subsidia pararet Cosmus, cujus rei ceteros inter optimus est testis ille antiquitatis pater (sic enim merito appellabatur) Kyriacus Anconitanus, qui quod ex Graecia, Asia, Aegypto atque Cilicia plurima in Italiam advexerit antiqua monumenta, ex iisque famam collegerit, hoc a se deberi in primis Cosmi liberalitati ac studiis palam

professus est. Quod beneficium Cosmus alio quoque cumulavit, cum eundem de meliore nota Eugenio Pontifici commendasset. Quae si Regibus gloriosa sunt, quanto magis commemorabuntur in privato homine, qui pecuniam, auctoritatemque summam, quam ex sua industria atque virtute sibi pepererat, reddabat patriae & litteris!

Intelligebat Cosmus nihil tam conducere ad litterarum bonum quam tranquillitatem & otium, sed ea erat conditio temporum, ut quoties Reipublicae decerant externa bella, ipsa domesticis discordiis laceraretur. Cum iis conflictari, qui querebantur eorum rationem non haberi in mandandis magistratibus, omniaque paucorum libidine administrari, & pro salute patriae quotidie dimicare erat omnino Cosmo molestum. Ad eorum sedandas querimonias visum est illi revocari sortis beneficium: nam quando superiorum bellorum fluctibus Respublica jactabatur, non pro jure civitatis omnium sortes miscebantur ducebanturque, sed pauci deligebantur, ut judicio magis Cosmi, quam fortunae monitu creati magistratus viderentur. Nec defuerunt, qui turbulenta & temeraria consilia inirent de illius potentia labefactanda, ac palam dicerent, Rempublicam idcirco tot bellis afflictatam fuisse, quod illa aluit Cosmi ambitio & cupiditas omnia miscendi. Conjurarunt etiam de mutando civitatis statu Petrus Riccius, Alamannus Adimarius, et nothus quidam

ex

ex Nicolao Valorio genitus cognomine Botticellius, homines incredibili importunitate atque audacia, sed hi dum alios quaerebant sceleris socios detecti poenas legibus & iudicio dederunt. Inter haec repentinus Jacobi Picininii in agrum Senensem incurfus Florentinis timorem attulit. Augebat hunc suspicio non sine Alphonſi Regis voluntate & conſilio ab illo, quam eſſet ad omne facinus, ut fuerunt omnes Braccianae factionis duces, audaciſſimus, iterum turbatum iri Etruriam. Quod magnum collegerat exercitum, & plura Senenſium oppida ceperat, non ſolum Florentini cum iis copiis, quarum imperium dederant Simonettae, ſed & Veneti, Pontifex ac Inſubrium Dux cum illo conjunctis viribus dimicarunt, victumque coegerunt perſugium quaerere apud Neapolitanorum Regem. Neque hic, neque Veneti, neque ceteri Italiae Principes magnas moturi res videbantur, quod omnium mentes occupaverat Turcarum timor. Illud enim belli fulmen Mahometes, poſtquam an. mccccxiii., Byzantio terra marique expugnato, caeſoque Conſtantino poſtremo Graecorum Imperatore, antiquiſſimum eorum imperium funditus everterat, ad cripiendas Venetis, quas in Graecia, Illyrico & Dalmatia habebant poſſeſſiones, ad inſirmandam Regis Neapolitanorum potentiam, & ad univerſae Italiae ſtatum convellendum aſpirare videbatur. Ejus vero cupiditas dilatandi imperii eo formidanda magis erat, quod multas naves

T

in omnem fere oram maritimam dimiserat, quod abundabat pecunia & milite, quodque non deerant vel inter Christianos Principes, qui ejus superbiae & libidini facultatem & materiam dare videbantur. Respexit Catholicae Reipublicae periculum Nicolaus v. cujus tamen vitam Deus ad Apostolicae Sedis decus & gloriam non diu reservavit. Mortuus enim est ix. Kal. Apriles an. mcccclv. & dolore animi confectus traditur ob captum a Turcis Byzantium. Qui ejus in locum successus est Callistus iii. non segnior fuit ad horrandos Christianos Principes, ut foedus jungerent adversus communem hostem. Egit quoque cum Cosmo, ad quem Jacobum Ragusinum Archiepiscopum misit, quem magnae auctoritatis, magnique consilii virum appellavit, ne Florentina Respublica, quae omnes superabat divitiis, se a ceteris vinci liberalitate & studio in rem Catholicam pateretur; & homo religiosissimus, a quo nemo unquam rem laude dignam desideravit, ea respondit Summo Pontifici, quae declarabant insignem sui, suorumque omnium voluntatem.

Porro magnorum periculorum metus non modo ab apparatu bellorum, sed etiam ab ostentis inferebatur, quae iis temporibus, quibus summa erat physicarum rerum ignoratio, gravissima ad significationem futurorum malorum putabantur. Magnus in caelo apparuit Cometes, qui quadraginta quatuor diebus ita luxit, ut omnium in illum conjecti oculi essent; saevi

exitere turbines, a quibus multis locis labes facta est; Neapolitanum regnum terrae motibus conquassatum; imbres continui campis omnibus inundantes, animalium etiam repentina multitudo vastitatem effecerant. Pudet alia referre, quae proximam Christianae Reipublicae everisionem portendere putabantur, quod nimiam hominum credulitatem arguant. Ad tantum terrorem minuendum plurimum valuit victoria, quam Pannonii, Joanne Corvino duce, ad Albani Graccam de Turcis reportarunt, & licet per se magna erant, quae ii gesserant, praesertim si eorum non magnus numerus cum tanta multitudine hostium (hi enim centum quinquaginta millium numerum explere putabantur) conferretur, majora tamen memorabantur, ut de suis homines laudibus libenter praedicant. Ea propter omnia supplicationes ubique decernebantur, eminusque semper Florentinorum pietas ac religio, Cosmo cunctis exemplo praecunte. His temporibus cum fides tota Italia esset angustior, neque creditae Reipublicae pecuniae solverentur, Cosmus ad Patres detulit, ut iterum fierent aestimationes possessionum & rerum, & ex censu tributa, sicuti antea decretum fuisse commemoravimus, conferrentur. Hoc ad levandum populum & ad tuendam existimationem Reipublicae ipsius esse aptissimum existimavit; sed ejus rei causa potentiorum querimonias sustinere debuit. Item ejus consilio coercita fuit Hebraeorum avaritia, & gravissimis

ufuris liberati cives fuerunt. Quod vacua ab hoste & a bello otiofa erat Respublica, multa sane providere potuit, quae ad levandas publici aerarii angustias & ad mercatorum industriam juvandam mirifice conducebant. Nec auxilium suum frustra implorari patiebatur Cosmus, quotiescunque spes erat posse ab aliquo percipi uberes industriae fructus. Erat ei res rustica, ut temporibus illis, sane bene culta & fructuosa, sed modica, si illam conferes cum opibus, quis ex mensis, & ex permutandis pecuniis, & versuris faciendis habebat. Erunt fortasse, qui tam utili labori Cosmi nomen avaritiae imponant. Qui si reputaverint & quibus ille temporibus vixit, & quos in usus pecunias impendit, profecto existimabunt majus commodum ex negotiis illius, quam ex otio multorum Rempublicam cepisse. Qui dediti pravis cupidinibus aut ignaviam suam tenebrarum ac parietum custodiis tegunt, aut conviviis & omni privato luxu gloriam & gratiam quaerunt, non satis admirabuntur hominem, qui quae coloni sui arabant, quae procuratores exigebant, solvebant, navigabant, permutabant, omnia virtuti, modico victu cultuque contentus, parabat. Neque eos audiendos putamus, qui improbant aedificiorum magnificentiam. Illa enim civitatem ornant, familiarum dignitatem augent, & foveant artes, quae oblectant animos, religioni inserviunt & ad vitae usus sunt necessariae. Quapropter nihil videmur debere praetermit-

tere, quod pertineat ad declarandum quantum pecuniae, quantumque studii in his rebus consumpserit Cosmus, quae & gratæ & laude dignae fuerunt, ut facile intelligi posset tantam pecuniarum vim virum magnum & excelsum congesse non propter inertiam laboris, sed propter magnificentiam liberalitatis.

Ille magni interesse ad laudem & decus civitatis existimavit, ut quae Pater ejus Joannes instituerat ad amplificandam atque ornandam Laurentianam Basilicam perficerentur. Illo vivo, a Mathæo Dolphinio, qui praeerat Canoniorum collegio, aedificatum aliquid fuerat, sed male adeo, ut magis poeniteret coepisse, quam liceret desistere. Itaque Philippus Brunelleschius architectorum suae aetatis facile princeps eidem Joanni auctor fuit, ut pecuniam ad eadem magnificentius extruendam decerneret, quod se velle omnino respondit. Jacta igitur illius fundamenta fuerunt anno mccccxxv. quadriennio ante quam ille e vita decederet. Sed lente ac paullatim, illo vivo, procedebatur, & intermissum etiam postea ad tredecim annos opus fuit. Demum hanc tarditatem & moram, quam multae res attulerunt, visus est Cosmus quasi reprehendere & subaccusare, attributisque ab eo xl usque florenorum millibus, non templum modo, sed & aedes, in quibus Canonici habitant, incredibili celeritate exactificatae sunt. Tale quidem templum evasit, ut opinioni, quam omnes habebant de munificentia Cosmi

& de ingenio Brunelleschii, quos nil nisi magnificum delectabat, plane responderit. Plura alia contulit Cosmus ad illius templi & collegii ornamentum & decus, quae singula hoc loco commemorare minime necessarium arbitramur (126). Post id religiosus homo multa alia opera Deo dicata maxima pecunia facienda curavit. Eodem Brunelleschio architecto, ad radices Fesulani collis templum & coenobium, quod Regulares, ut appellantur, Canonici ad nostram usque aetatem incoluere, a fundamentis erexit; & quod multi inter eos erant, qui mirifice colebant litteras, viro doctissimo Matthaeo Bossio omnibus praeunte, bibliothecam multorum saepe nummorum iisdem donavit. Erant in ea ceteros inter codices scripta historica Sozomeni civis & canonici Pistoriensis, qui humaniores litteras Florentiae docuit, cuius eruditissimi viri eo libentius mentionem fecimus, quod suorum studiorum unum Cosmum sibi patronum adscivisse videbatur. Tota haec librorum copia non multis ab hinc annis in Laurentianam bibliothecam translata est. Nec mediocria fuerunt, quae Cosmus tribuit Dominicanae familiae hominibus, qui Florentiae sunt ad S. Marci. Etenim coenobium ac bibliothecam eo in loco extruxit, picturis ornavit, usus praesertim opera Angelici Fesulani non tam pingendi arte, quam vitae sanctitate illustis, abside templum auxit, & haec hortatore fecisse traditur Antonino Pieroctio,



antequam is Archiepiscopus Florentinus crearetur, cui sane plurimum Cosmus ipse ac Florentini omnes tribuebant propter doctrinam & morum innocentiam. Aedificavit & monasterium Florentinum ad S. Verdianae, coenobium & templum Fesulanum, quod S. Hieronymi dicitur, & prope Cafaggiolanum suum, quod est in Mucellano agro, media in silva excitavit templum & coenobium, quod Franciscanis cum bibliotheca attribuit. Sacellis atque aris, omnique sacrae suppellectilis genere exornavit aedes B. Virginis ab Angelo Salutarae, S. Crucis, S. Miniatis atque Angelorum. Hierosolymis, quo nostri homines exciperentur, qui eo religionis causa accederent, xenodochium suis sumptibus aedificavit, certo assignato agro, ex cuius vestigalibus, quae ad illos alendos necessaria essent, suppeditarentur. Saluberrimam aquam Assisum deduxit, ut incolarum & religiosorum peregrinatorum commodo inserviret; accessionem adjunxit Franciscanorum coenobio, & viam stravit, quae ducit ab aede S. Mariae Angelorum ad ipsam urbem. Supra commemoravimus quae, Venetiis dum erat, Benedictinis monachis concessit, et ex litteris Francisci Barbari conjici potest (127) quaedam etiam Carthusianis coenobitis ipsum largitum fuisse. Testatur Ambrosius Camaldulensis singularia fuisse beneficia, quae Cosmus omni tempore contulit suis monachis, solitus nihil denegare quod dono dignum erat. Atque

haec religionis ergo, in quibus, quo minus gloriam quaerebat, eo magis consequebatur. Quamquam cave-  
rit semper Cosmus, ne extra modum sumptu & ma-  
gnificencia prodiret, quo in genere multum mali est  
etiam in exemplo, quod studiose plerique facta Prin-  
cipum imitentur, cum tamen domum in via, quae  
dicitur Lata, vellet aedificare, curam dignitatis adhi-  
bendam putavit. Non ex domo, ut ait Cicero, di-  
gnitas tota quaerenda est, sed etiam dignitas domo  
ornanda; & sane multis summis viris honori fuisse  
accepimus, vel quando ii erant mores Romanorum,  
ut non divitiis & sumptibus, sed probitate & indu-  
stria inter se contenderent, quod praeclaram aedificas-  
sent. Binos hac in re consuluit Cosmus magni nomi-  
nis architectos Brunelleschium & Michelottium. Hic  
dignitatis commoditatisque rationem habuit, ille laxi-  
tatis, quod in domum clarissimi civis hospites multi  
recipiendi essent, & admittenda hominum cujusque  
generis multitudo. Tum autem ab amicis exquirere  
coepit Cosmus quam descriptionem ipsi praetulissent,  
& quod multi inter eos fuerunt, qui censuere regiam  
magis quam privatam domum descripsisse Brunelle-  
schium, & illam in libera civitate maximam invidiam  
habituram, deliberavit adhibere modum in ipsa ma-  
gnificencia, ut hanc ad communem usum cultumque  
vitae referre videretur. Talis tamen domus fuit, quae  
an. mccccxl. absoluta est, qualem hominis honorati &  
prin-

principis decuit esse tum ad speciem & dignitatem, tum ad commodum; & ex ea Michelottius, quamvis quaedam peccavit, magnam laudem consecutus est. Minime patienter tulit Brunelleschius quod hic sibi praelatus fuerit, & iracunde rabioseque, quam fecerat, descriptionem aedificii discidisse dicitur. Haec domus, quam nunc Riccardii possident, a praetereuntibus sic inspicitur tanquam sacrarium aliquod, in quo musae omnes, omnesque liberales artes a Cosmo ejusque liberis & nepotibus munificentissime cultae habitarent. Ornabant has ipsas aedes librorum copia (128), vasa magnifice & pretiose caelata, gemmae, lapides affabre iucisi (129), antiquitatis monumenta, quorum studiosissimus erat Cosmus, quaeque undique conquieserat, statuae, opera anaglyptica, tabulae & multa, quae artifices peritissimi pingendi, fingendi scalpendique, quorum tum plurimi Florentiae erant, elaboraverant. In villis etiam magnificus & elegans videri voluit Cosmus, sic ut qui virtutem civis medioeritate quadam metirentur, ei, ut olim Lucullo Romani, objicerent horum aedificiorum amplitudinem. Cafaggiolanum, Careggianum, Trebbianum & Fesulanum a fundamentis excitavit, & quod ea erant tempora turbulenta atque periculosa, ut tute ac tranquille in iis habitare posset, ipsa turribus munivit. Commodabat haec interdum amicis, praesertim si ex iis essent, qui otium quaerebant, ut liberius litteris va-

carent, quod de se ipso Marsilius Ficinius testatus est.

Atque in his extruendis aedificiis Cosmus praefertim usus est opera Michelottii. Amabat hominem carumque habebat non modo propter ejus ingenium (omnium enim judicio in architectandi arte neminem, nisi Brunelleschium, superiorem habebat) sed etiam propter optimam & spectatam fidem. Quando in exilium ille pulsus est, habuit calamitatis socium Michelottium, qui aiebat sibi illam causam doloris & timoris & periculi communem esse. Curavit Cosmus, ut ejus ingenium noscerent Veneti & probarent, & is celeriter ad multa aedificia adhiberi est coepit. Quae quod ei famam confecere, idem sibi evenisse, subridens aiebat, quod Cosmo, qui licet princeps pace belloque prius quam exulatum iret, clarior tamen in exilio fuit, vel honoribus, quos accepit, vel desiderio patriae, vel felicitate, qua in illam restitutus est. Auctor est Philaretus Cosmum usum etiam fuisse Michelottii opera in augendis ornandisque aedibus, quae erant Mediolani, quasque dono acceperat a Francisco Sfortia, cum honorificentissimo decreto ipse ejusque liberi in Mediolanensem civitatem adsciti fuissent (130). Ut sibi gratissimum fuisse donum declararet, magnos sumptus in eas fecit, & Vincentius Zoppa in iisdem satis belle pinxisse dicitur multas tabulas, quae exhibebant facta Trajani aliorumque Caesarum, & in quibus erant imagines multorum virorum belli & pacis

artibus illustrium. Illorum in numero primam posuit Michelottius imaginem Cosmi, & ipsam per se pinxit, quamvis hac arte non admodum valeret. Distinguebant vero ornamenta ex marmore & ligno facta aut Falco, aut Adamas, qui ipsum Cosmum signabant. Quanquam hic viveret conjunctissime cum Michelottio, eique multum tribueret, magis tamen suspiciebat Brunelleschium (131), & id, quod erat difficillimum, efficiebat, ut inter quos laudis esset aemulatio, nulla intercederet obtrectatio, essetque talium virorum ad magnificis operibus exornandam urbem copula. Omnino fatebatur Cosmus hunc a se majorem architectum cognitum, quam quemquam eorum quos vidisset, aut legisset, tantaque in constituendis ornandisque aedificiis prudentia fuisse, ut qui ejus vestigia minime persequerentur, necesse esset eos recidere in easdem tenebras, in quibus ad illa usque tempora Architecti omnes misere jacuisse videbantur. Fortasse illum poenituit, quod & a Georgio Vasario traditum est, se minime illius consilium secutum esse in sua aedificanda urbana domo, praesertim cum sibi adeo satisfecisset in Laurentiana Basilica, & in S. Bartholomaei aede & coenobio, ut nihil melius quaereret. Is, qui vivo semper tribuerat officia vel in mediocritate fortunae, vel in obtrectatione invidiae, mortuum monumento honorandum curavit, quod est in principe Florentina Ecclesia, quae ab illo majus suum

ornamentum (quid enim nobilius atque elegantius ejusdem tholo non dicam fieri, sed ne cogitari quidem unquam potuit?) acceperat. Multi sunt alii architecti, quorum memoriam non modo illa aetas, sed etiam consequentes exceperunt, qui a Cosmo honorati atque adhibiti fuere; quodque eos hortabatur, ut antiquorum bene inventis obtemperarent, & ex optimis naturae principiis & veritatis exemplis praecepta peterent, de nobilissima utilissimaque arte optime illum meritum fuisse judicabimus. Nec minus illi debuit Pictura, quae per Florentinos artifices illius cohortationibus atque beneficiis maxime excitatos ad novam, ut ita dicam, vitam revocata fuit. Illorum princeps Masaccius, quem non imitari puduit vel ipsum Raphaelem Urbinatem, et Michaellem Angelum Bonarrotium, ut Cosmum ab exilio revocatum audivit, Roma Florentiam rediit, hancque nobilissimis picturis ornavit. Non satis tamen illae celebratae fuerunt, nisi quando mors extinxit invidiam, de quo cum quereretur Cosmus cum Brunelleschio, videbatur misereri magnorum virorum fortunam, quod eos, velut umbra corpus, semper comitetur invidia. Ad Masaccium proximus accedebat Philippus Lippius, sed longo intervallo, tamen proximus. Qui sine illius comparatione hujus opera spectat, satis magna dicit: non parum elegans in figuris, satis uber in reperiendis & solutus in explicandis historiis, ut temporibus illis, peritus pulchre effin-

gendi omnes corporis humani partes, bene etiam colorabat; tam bonus denique pictor erat, ut illius aetatis homines nescirent quid ei addi posset. Hunc amicissime semper amplexus est Cosmus, plurimi fecit, atque saepissime exercuit. Quod erat levitatibus amatoris deditissimus, quibus ut indulgeret, interdum quod promiserat, minime praestabat, Cosmus cum aliquando in celsissimam domus suae cellam conclusit; sed cum vidisset minus eum assabre pingere, quoties praecidebatur ipsi ista licentia libertasque vivendi, eamque ut recuperaret, magnum adiisse vitae periculum (ex lintheo enim scalis factis, e superiore aedium parte noctu descendit) non amplius vi, sed blanditiis & donis dissolutum hominem ad pingendum invitavit. Quod ipse praesertim excellebat in parvis figuris exprimendis, ex multis elegantissimis hujus generis tabulis quasdam Cosmus delegit, quas Eugenio iv. dono daret. Accipit ille libentissime munus, & artificii multa signa amoris dedit. Factum est etiam auctoritate & testimonio Cosmi, ut ipse Spoletum vocaretur ad pingendum sacellum B. V. dicatum in principe Aede, qua in urbe vitam finivit, fuitque suspicio ei venenum dedisse propinquos mulieris cujusdam, quam perditae amabat. Cum hoc percrebuisse fovere Cosmum omnes praeclaros artifices, qui horum operam expetebant, absentes Principes cum illo sic agebant, ut omnes intelligerent ab illius judicio & consilio pendere multorum

samam atque fortunam; ob eamque causam omnes fere se ipsos illi penitus dederant, quos non solum liberaliter adhibebat, sed optimum quemque hospitio atque amicitia sibi copulabat.

Perpauci tum egregie sculpebant. Haec ars ad pristinae elegantiae spem revixisse visa est opera Donatelli, qui sive statuas, sive anaglypta faceret, ea erat conformatio partium omnium, is motus, ea elegantia, ea compositio, ut nihil iis deesse tum judicaretur. Idque eo mirabilius erat, quod sero allata fuerunt Florentiam antiqua quaedam monumenta, quae ipse ceterique artifices imitarentur. Testatur Vasarius hoc curasse Cosmum, ipso Donatello auctore, qui quae tempus & barbaries ab iis abstulerant, restituit. Tum intelligere homines coeperunt egere se hac norma & regula; non satis esse naturam imitari; majus aliquid esse in arte, quod tantam habet pulcritudinem, ut nihil simile in natura ipsa inveniatur; fuisse Graecos sculptores hujus perfectionis & auctores & magistros; & ita anaglypta elaboranda, ut quemadmodum sonorum varia compositio harmonias efficit plures, sic multiplex figurarum dispositio serviat varietati atque suavitati. Quod lente & per gradus quosdam ad id pervenire homines solent, quod absolutum sit omnibus suis numeris & partibus, quamvis aetatem Cosmi multi praestantissimi architecti, pictores & sculptores illustrem fecerint, defuit iis tamen ille lepor, illa venu-



stas, illa charis, illud ultimum ac perfectum, quod  
 tantopere in consequentis saeculi artificibus admirati  
 sumus. Hic gradus fuisse secundus videtur eorum, qui  
 studium liberalium artium, quae ad graphicen perti-  
 nent, longo intervallo intermissum revocarunt. Sed  
 ad Donatellum revertor, in quo cum Cosmus sibi  
 videretur videre insignem speciem quasi reviviscentis  
 sculpturae, multum ipsum adhibuit tum ad Lauren-  
 tianum templum, tum ad domum suam exornandam.  
 Diligentes sunt descriptores illius operum Vasarius,  
 Migliorius, Borghinius aliique plures, qui Cosmo et-  
 iam laudatore et teste usi sunt, ut tanti sculptoris  
 excellentiam magis magisque comprobarent. Cum ad  
 summam senectutem pervenisset, & paralyfi impedi-  
 retur ab arte, quam profitebatur, exercenda, & pecu-  
 niae esset egentissimus (hanc enim semper contempse-  
 rat, omnia cum amicis & discipulis habens communia)  
 sustentabatur liberalitate Cosmi, qui et moriens caris-  
 simum virum Petro Filio commendavit. Donatus ille  
 praedio, unde panem & vinum haberet (his enim  
 verbis usus Petrus fuisse dicitur) illud anno post red-  
 didit patrono suo, quod aiebat talibus rebus care-  
 re minus sibi molestum esse. Sed non propterea Pe-  
 trus illum egere sivit, cujus liberalitatis tanta erat  
 commendatio, ut Patrem aequare putaretur. Par, aut  
 fortasse superior erat Donatello ille Laurentius Ghi-  
 bertus, qui assabre adeo tantoque artificio aeneas templi

S. Joannis portas fecit, ut superiorum sede illas dignas esse judicaverit Bonarrotius, & hic quoque a Cosmo liberaliter atque honorifice tractatus, multisque in rebus adhibitus fuit. Cum is e Casentino in Florentinam aedem Angelorum intulisset corpora diu neglecta Sanctorum Martyrum Proti, Hyacinthi & Nemefii aereos loculos per Ghibertum faciendos curavit; atque hoc unum exempli causa e multis selegimus, quod non judicium modo & liberalitatem, sed etiam religionem Cosmi declarat. Cum ille multorum artificum opera contemplabatur, satis intelligebat quae dura essent, quae molliora, quae ad veritatem adducta essent, quae ab illa declinarent; & cum in sculptorem incidisset, qui gaudere se dicebat, quod imitatus esset antiquum Marfiae signum, dum Christum fingeat; *utinam*, respondit, *non ossa solum, sed etiam sanguinem*. His artibus Cosmus non modo opinionem vicit omnium, quae de ejus ingenio liberalitateque erat, sed etiam gloriam superiorum; idque eo fuit mirabilis, quod cum ejus vita perpetuis fluctibus jactata fuisset, nunquam tamen neglexit studium liberalium artium, quae tantummodo otiosorum hominum pabulum esse solent. Quapropter haec vere scripta a Paulo Jovio fuisse putamus: *Nunquam cum institutae liberalitatis poenituit; nullus unquam aedificandi sumptus eum deterruit, nullus unquam vel adversus fortunis ejus casus popularis beneficentiae cursum interrupit. Constat*  
*ex*

*ex adversariis rationum codicibus, quos ipsi vidimus, Cosmum supra quadraginta myriades aureorum nummum in privata & publica aedificia contulisse: piae vero aut occultae largitionis sumptum myriadum decem summam excessisse. Sic cum Cosmus non desisteret quibuscumque rebus posset patriam juvare & ornare, interdum etiam ejus nomine munera summo artificio elaborata mittebat Regibus & Dynastis, quae indicabant studium elegantiae non esse commune Italiae, sed proprium Florentinorum. Itaque praedicabat mirari se, non pernicioforum civium numero eos haberi, qui nullam aliam laudem ac gloriam nisi in armis quaerebant, quique artes, quas ignorabant, inertes illiberalesque vocabant. Et si quondam Romanis gloriosum fuit ab aratro vocare homines, qui summos magistratus gererent, non inglorium fuisse Florentinis arbitramur, hos ipsos interdum mandasse iis, qui vitam in officinis contriverant.*

Quod nonnulli erant, qui aegre ferebant se ingenio, divitiis, auctoritate atque amore populi a Cosmo superari, in Republica residere semper aliqua videbatur conjuratorum manus. Huic facile resistere ille poterat, sed cum longissime respiceret spatium futuri temporis, neque in animo Petri Filii magnum aliquid & robustum esse videret, unde ille familiae potentiam confirmare, aut ubi lapsa fuisset, ad pristinum statum revocare posset, non levi cruciatu timoris angebatur.

## X

Magnam spem collocaverat in Joannis virtute, quae non modo sibi honori, sed etiam usui Reipublicae esse potuisset, sed cum illius immatura mors, ineunte Novembri an. MCCCCLXIII. accidisset (132), neque ullos ex se liberos reliquisset (unicus enim, quem susceperat Cosmi nomine, septennis an. MCCCCLII. xv. Kal. Decembris obierat (133)), exclamasse dicitur: *o falsas spes! o nimis lata domus tam modicae familiae!* Tum enim minime divinare poterat qualis futurus esset Laurentius nepos, cū magna indoles virtutis & ingenii in illo appareret. Sed quia ab hominibus doctis acceperat, nullum esse tam grave malum, quod patientia & exercitationes animi levare non possint, propterea & otio fruebatur, non illo quidem, quo debebat is, qui peperisset otium patriae, & illa persequeretur studia, quae familiae & civitatis decus conservarent. Et si a coetu hominum frequentiaque interdum, tanquam in portum, se in solitudinem recipiebat, minime tamen cessabat de Republica cogitare, ut omnia, quae illi conducebant, curare, non modo sapientiae, sed etiam felicitatis diceret sibi videri.

Aegre ferebant Florentini retineri ab Alphonso Aragonio Castilionem Pescariae tanquam pignus praeteritarum injuriarum, & aegrius etiam ferebant oppidani se crudeliter tractari a regiis militibus ibi in praesidio collocatis, quare, impetu in eos facto, fugere coegerunt, seque Reipublicae dediderunt. Cosmus in

id omni cura intentus, ne ulla daretur Regi caussa novi movendi belli, censuit ad ipsum mittendas litteras, quibus certior fieret placere Reipublicae oppidum illius nomine retineri. Id gratum acceptumque habuit Alphonfus, confirmavitque se propensissima voluntate esse ad bene de Florentinis merendum, pacemque cum iis servandam. Hos enim in tali tempore offensos habere nolebat, cum in spem venisset expugnandae Genuae, expellendique ex ea Fregosios, specie Adornios in pristinam auctoritatem restituendi. Petrus Fregosius, qui in ea dominabatur, cum se parum tanto hosti minime fore intelligeret, legatum misit ad Carolum VII. Gallorum Regem, orans ut se in fidem, & urbem in potestatem suam reciperet: ni propere venisset, hanc sub hostium imperium casuram. Carolus rem Genuensem sibi curae fore pollicitus, misit eo Joannem Andegavensem, qui, occupata urbis possessione, id etiam sperare ac moliri videbatur, ut paterna jura in Neapolitanum regnum tueretur. Tum Alphonsum vehementer poenituit, se Genuensium rerum caussa formidandum hostem in Italiam advocasse, & in hac poenitentia diem obiit supremum. In hoc viro magna vis animi ingeniique fuit; fortis erat ad pericula, rei militaris peritissimus, idem, quod difficillimum est, cautus & prudens (nam providentia timorem, audacia temeritatem adferre plerumque solet) ad simulanda negotia callidus, amicitia facilis,

multarum rerum ac maxime pecuniae largitor, atque illi felicissimo omnium in acquirendo amplissimo regno nunquam super industriam fortuna fuit, multique dubitavere fortior, an felicior esset. Simultates nimio plures & exercuerunt cum, & ipse exercuit eas, nec facile dixeris, utrum cum magis prefferint interni externique hostes, an ille agitaverit eos. Nec senectus quidem, quae frangit omnia, robur ejus corporis animique imminuit. Idem non minor in pace, quam in bello fuit. Amabat litteras & praeclara ingenia, delectabatur publica magnificentia, ut Romanos ipsos apparatu spectaculorum aequare putaretur; singulari quamvis caritate esset in suos, nunquam tamen in eorum obitu, ut nec in ceteris rebus asperis, perturbatus est; omnino talis erat, ut nulla ars neque publicae, neque privatae rei bene gerendae illi deesse videretur. Illius filius & heres Ferdinandus cum praevideret fore, ut in maximis turbinibus ac fluctibus regni navem gubernaret, declaravit Florentinis nunquam se paterni foederis religionem violaturum. Multum is timebat a Callisto Summo Pontifice, qui cum inimicissimo semper animo fuisset in Alphonsum Regem, filium ex justis nuptiis minime natum deturbare regni possessione volebat, specie jus Sedis Apostolicae persequendi. Sed mors illius a Republica conatus avertit, atque cupiditatem extinxit aliena ruina fortunam fratris filii amplificandi. Successit in illius locum Pii u. nomine

Aeneas Sylvius Piccolomineus Senensis, quem natura & litterae ad pacem humanitatemque formaverant. Hic & aequum & utile judicavit si Ferdinandum in regni possessione confirmasset, quod non ipse modo submisit, sed & Franciscus Sfortia, atque Cosmus vehementissime postularunt. Sciebant enim hi quantum interesset non mutari statum Italiae, neque plus aequo augeri potentiam eorum, qui in illa dominabantur; & qui de hujus, ut ita dicam, politicae aequilibratae utilitate scripsere, ejus non solum praecipuos, sed & primos auctores & magistros Cosmum & Laurentium Mediceos facile agnoscunt. Ut universus hic mundus omnibus partibus inter se congruentibus, aequaliterque distributis cohaeret ac nititur, sic in Imperiis aequabilis tributio esse deberet virium ac voluntatum, quarum conspiratione summi rectores se se mutuo adversus eos, qui dum nimia concupiscunt, aequitatis fines transire non dubitant, defendere possent.

Pontifex, rebus Italicis compositis, omnia sua studia contulit ad inflammandos Christianos Principes, ut conjunctis animis ac viribus obsisterent atque occurrerent audacissimis Turcarum consiliis. Ea propter Mantuam cogitavit, quo conventuros multos eorum, aut saltem legatos suos missuros sperabat, ut deliberarent de ratione belli administrandi. Ubi nunciatum est illum per Etruriam iter facturum, venerunt Florentiam Arimini, Fori Livii & Carpi Domini, Urbi-

ni Comitis Frater, & Joannes Galeatius Sfortia, qui major natu erat liberorum Francisci Ducis. Hic in domo habitavit Cosmi, qui nullum reliquit officium, nullique pepercit sumptui, ut tantum hospitem honoraret, & cum eo iisdem vinculis, quibus cum Patre erat colligatus, adstringeretur. Quod nihil apud Cosmum viderit nisi lautum, elegans, splendidum & exquisitum, admiratione obstupescactus ab illo discessisse narratur. Fecit & Respublica ludos apparatusissimos, ut nunquam sumptuosiores antea fecisse constaret. Atque non minus liberale hospitium fuit, quod Pontifici ceterisque Principibus paravit. Quae quidem valebant non modo ad studia eorum, quos honorabat, acquirenda, sed etiam ad gloriam adipiscendam, sic ut Florentini consuetudine beneficentiae paratiores, & tanquam exercitiores ad bene de multis promerendum esse viderentur. Qui effusiones pecuniarum non admirantur in apparandis spectaculis, quibus ii deliniri posse putarunt Galeatium florentem aetate, fortuna & opibus, & nil probant, nisi quod ad usum Reipublicae pertinet, laudabunt profecto nostrorum prudentiam, qui fructum divitiarum putarunt non modo talium sumptuum facultatem, quando dignitas Reipublicae id exigere videbatur, sed etiam illorum meliorum, quibus civium commodis, & horum utilitati salutique confulebant. Ex his commemorare lubet quos decreverunt, ut navigabilis esset Arnus ad



comportanda ex mari, quae usui essent civitati, quae res magna sane & ardua, frustra aliis temporibus tentata, non modo suadente, sed etiam gubernante Cosmo cum aliis primariis civibus, ad exitum adducta fuit. Extant in tabulario Mediceo litterae cujusdam Gabrieli de Poetis Bononiensis datae an. MCCCCLVIII. ad Joannem ejusdem Filium, ex quibus apparet cum consiliarium gloriosissimi operis fuisse, rationemque consilii sui scripto exposuisse. Haec sane erant permagna ad laetitiam Cosmi, qui in eam benignitatis consuetudinem jam venerat, ut illum diem se amisisse putaret, quo non serviret patriae commodis.

Haec praesertim visa est implorare atque efflagitare auxilium Cosmi tum cum a Joanne Andegavensi, atque a Ferdinando Aragonio, inter quos magnum & crudele bellum fore judicabatur, legati Florentiam missi sunt subsidia pecuniae petentes. Fit Senatus consultum, ut respiciatur gratia Gallorum, & Joanni quotannis ad belli sumptus sustinendos octuaginta florenorum millia solvantur. Cosmus errorem illorum, qui ita putarunt, libere coarguit, & multis argumentis probavit nil nisi de Francisci Sfortiae sententia agendum, consulendos etiam Venetos, & quae dixit & fecit tanti fuerunt, ut abrogaretur decretum, quod Reipublicae profecto periculosum futurum fuisset. Responsum itaque Legatis fuit, ut eam pacem, qua fruebatur Respublica, conservare ipsam paterentur; huic

semper fuisse propositum, ne se immisceret Neapolitanis bellis, atque tribuerent publici aerarii angustiiis recusationem pecuniae. In hoc Joannes redarguit inconstantiam Florentinorum, Ferdinandus vero infidelitatem, quas accusationes ut ab se removerent, multis scriptis probarunt, se id facere, quod erat aequum, & Reipublicae ac totius Italiae rationibus accommodatissimum. Satis hac re Senatus declaravit plus apud se valere unius Cosmi, quam ceterorum vocem & voluntatem. Quo tamen non frangebantur animi inimicorum ejus, sed admonebantur, ut majores pararent necessitudines, quibus cogi possent magistratus id probare, quod ipsis placuisset. Hi tanquam artifices improbi opus quaerebant, qui & semper aegri aliquid esse in Republica affirmabant, ut ad ejus curationem adhiberentur. Ex his multati exilio fuerunt Hieronymus Machiavellius, Antonius Barbadorius, & Carolus Benitius, qui nimis multa movere tentaverant, aliique, quibus minime audacia defuerat calumniandi Cosmum, pecunia poenas luerunt. Atque harum animadversionum suasor & auctor fuit Lucas Pittius, quando is summum magistratum gerebat. Homo sane erat callidus & audax, simulavitque tum se studiosum esse Cosmi ad captandam populi benevolentiam. Novum illum induisse ingenium dixisses; nam antea extiterat Cosmi laudum invidus adeo, ut hac de causa subierit interdum iracundiam populi; & quasi ab illo se ulla in re superare

rari

rari nollet, domum ejusmodi aedificaverat, quae magnificentia regiam aequabat. His aliisque artibus effecit, ut nullus ei honos deesset, neque ulla hoc tempore res gereretur publica, de qua prius decerneretur, quam Pittii sententia cognita. Ad id plurimi illum patronum unum sibi adoptabant, donis etiam ejusdem studia emebant, & quae in liberis praesertim civitatibus honorificentissima putantur, salutari, appeti, decedi, assurgi, deduci, reduci, consuli, sic ei tribuebantur, ut in republica rex esse videretur. Quo artes spectarent Pittii haud poterat ignorare Cosinus, & cum recordabatur ex truci saevoque insectatore plebis repente omnis aurae popularis mirificum captatorem illum evasisse, praesentiebat quae idem in posterum esset tentaturus. Quem gereret animum indicabat etiam emblemata, quo ipse utebatur. Tormentum erat bellicum igneam a se pilam projiciens, quae quod pertinebat ad stemma Medicorum, quam hi vim & fortunam aliquando experiri debuissent haud dubie emblemate illo Pittius declarabat. Nihilo tamen minus quod periculosum erat nimis aperte obviam ire Cosini potentiae, cum illo sic agebat, ut fieri solent amici. Expectandum enim tempus arbitrabatur dum homo, qui senex jam factus erat, & qui stomachi & urinae morbis coeperat tentari, & qui saepe podagrae doloribus ardebat, ex vita migraret. Quem postea exitum foeda & perniciofa ejus consilia habuerunt, in Lau-

rentii vitâ, ad quam spectant, persecuti sumus, ex qua cognosci poterit fortunam ac prudentiam non parum in Pittio fuisse ambitioni animoque.

His rebus permotus Cosmus vigilanter se tuebatur, idemque praeestabat, ut esset bonorum conspiratio atque consensus ad defendendam libertatem. Id vero non poterat non vehementer dolere, quod quando non habebant Florentini externos hostes, quibuscum dimicarent, novarum rerum causas quaerentes facile intestinas atque domesticas concitarent discordias. Itaque qui ei dant culpa, quod interdum visus sit alere bella, propterea quia id conducebat ad potentiam suam, iidem fateantur necesse est, hac re maxime ipsum consuluisse patriae incolumitati & gloriae. Sed nihil in liberis civitatibus tam est commune quam invidia, odia, dissensiones, atque ob eas non modo malorum, sed & benemerentium civium expulsionem, calamitates, fugae, rursusque secundae res, honores, imperia ac victoriae de inimicis. Quapropter is prudens dicendus est, qui sine publicae rei detrimento hominum studia ad utilitates suas allicere atque excitare potuit, atque cum multum diuque vixerit, nunquam neque hominibus, neque perturbationi animi, neque fortunae succumbens, mirificos attulit fructus auctoritate, gratia, consilio, gloriaque semper claruit bene gestae Reipublicae. Quanta constantia restitit iis, quorum sententia inclinabat ad subsidia ferenda Ferdinando Aragonio,

qui ea saepe vehementissime petiit, cum multa adversa ei accidissent in bello, quod per quadriennium cum Joanne Andegavensi sustinere coactus fuit? Quanquam inde magnam Regis in se suosque omnes concitari offensionem intelligeret Cosmus, quia e Republica magis esse putabat non irritari Gallos, non dubitavit dicere illa, quae quondam Appius Claudius senex Ennianis versibus dixisse fertur :

*Quo vobis mentes, rectae quae stare solebant  
Antebac, demens se se flexere ruina?*

Horum, aliorumque hujusmodi benefactorum recordatio, & conscientia bene actae vitae sane jucundissimae Cosmo erant; & cum ex eo quaereretur quamdiu vellet esse in vita: *tamdiu*, inquit, *dum ea, quae animo & mente concepi ad augendam Rempublicam & hoc imperium, ad exitum adducere possim.* Quo sane dicto innuebat maxime desiderium, quod semper aluerat, subigendi Lucenses, cujus obtinendi quod spem sefellerat Franciscus Sfortia (promiserat enim, compositis Insubrium rebus, se primo quoque tempore in illam expeditionem exercitum educturum) saepe ille queri auditus est, beneficia se maxima in ingrato homine collocasse (134) quae minime continere nimium cupidi animi angustiae possent. Sed erant per se magna cetera, quae gesserat Cosmus, nec facile invenies privatum

hominem, qui aut fortunae indulgentia, aut studiis suorum, aut propria virtute tantum sibi gloriae ac nominis pepererit.

Nec vero ille in luce modo atque in oculis civium magnus, sed intus domique praestantior. Qui sermones! quae praecepta! quanta rerum publicarum notitia! Omnia memoria tenebat, non domestica solum, sed etiam externa bella, & de instantibus rebus verissime judicabat, & de futuris callidissime conjiciebat. Cujus sermone ita tum cupide multi boni cives fruebantur, quasi divinarent, illo extincto, fore neminem, unde discerent. Nihil sane admirabilius quam quomodo ille extremam aetatem egit. Multos beneficiis singularibus placavit, in quibus aliquas in se residere simultatis reliquias sentiebat. Effecit ut temeritatis suae poenituerit vel illum ferocem hominem Franciscum Philelphum, cujus filius Jo. Marius Latina poesi clarissimus carmen de Cosmi laudibus composuit, quod *Cosmias* inscripsit & in duos libros distribuit. Ex hoc apparet Franciscum stimulasse filium, ut summae suae asperitatis ac licentiae (multis enim millibus versuum in Cosinum aliosque Mediceos debacchatus fuerat) odium deprecaretur, sibi que illum reconciliaret. Ait enim in initio operis (135).

..... *Solus simulante tot unus*  
*Inter eos vates, quos gentis fama Latinae*

*Evehit in coelum, priscorum nomine dignus*  
*Franciscus Graiique decus, Latine . . . .*  
*Nominis, hic vates inter rapiente tot nuns*  
*Tisiphone in Cosmon laesus furialibus hydris*  
*Scriptis, & in Divum labem commisit Averni,*  
*Sive fuit ratio pungentis corda doloris,*  
*Sive & amicitia, ductis & honore Camoenis,*  
*Quorum magna fuit quondam res gesta Senatus.*  
*Quem quum saepe mihi laeter statuisset parentem*  
*Fata virum, cui secula parem non ulla dederunt,*  
*Tam doleo Cosmi luctatum laudibus olim.*  
*Nunc meliore animo, graviore & singula sensu*  
*Corrigit, inque suum recipit sua prima tumultum.*  
*Quae si abolere queam nihil est, quo laetior esse*  
*Mens valeat, ne forte viro, cui quisque Deorum*  
*Tradidit insignis manifesto numine laudes,*  
*Atque duae fovere Deae, nocuisse Philelpbus*  
*Ore queat, calamoque truci, cui nulla sub orbe*  
*Est lues tribuenda viro, si Cosman honore*  
*Adficeret &c.*

Fuerunt alii asperi procul dubio animi, & lin-  
 guae acerbac & immodice liberae, qui quod a lae-  
 dendo Cosmo praemia speraverant, minimeque obti-  
 nuerant, repente commutati sunt, ut mansuetudo ani-  
 mi ac verecundia asperitatem consecutae fuisse vide-  
 rentur. Quae vero faciebat Cosmus vel ad placandos

inimicos, vel ad comparandos retinendosque amicos non solum humanitati, sed etiam religioni tribuebat. Hanc enim semper, sed praesertim ingravescente aetate, sancte ac pie coluit. Ea propter saepe erat cum hominibus, quos vitae innocentia ac sanctitas commendabat, ut eorum sermonibus & exemplo fieret melior. Cum Timotheo Maffeo Veronensi, qui erat e Canonicis Regularibus, ut loquuntur, unus, idemque sacra eloquentia celebratissimus, quotannis complures dies in Fesulano S. Matthaei coenobio ita versabatur, ut nulla nisi divinarum rerum cura tangi videretur. Secedebat etiam interdum in S. Marci coenobium, quod tum multi & morati & docti homines decorabant. Nihil non his concedebat Cosmus; negligebat vero desidiosos, clamoros, leves, superciliosos, qui sordida veste obtegunt dissolutos mores, aut fictam vendunt sanctimoniam.

Liberalium artium & disciplinarum studia, quae vel ab adolescentia coluerat Cosmus, quaeque animo ipsum retinuisse diximus iis etiam turbulentis temporibus, quibus sui atque patriae incolumitati prospicere coactus fuerat, pacatioribus sic fovit, ut levationem aegritudinum, & curarum requiem ab iis peteret. Recipiebat ad epulas illustriores artifices & sapientiae doctores, & saepe versabatur in Careggiano cum Platonicis suis, beatum cum Platone illum appellans, cui etiam in senectute contigerit, ut sapien-



tiam, verasque opiniones assequi posset. Ex iis, qui tum & postea fuerunt, laudantur maxime a Marfilio Ficinio Michael Mercatus, Antonius Canisiani, Joannes Cavalcantius, Matthaeus Corfinius, Antonius Seraphicus, Loëterius Neronius, Peregrinus & Antonius Allii, Bartholomaeus & Franciscus Vallorii, Bernardus Nutius, Baccius Ugolinus, Bernardus & Nicolaus Michelottii, Laurentius Lippius & Cherubinus Quarqualius. Festiva acroamata, joci & facetiae, in quibus multum excellere putabatur Cosmus (136), exhilarabant convivia moderata et honesta. Nam quamvis tanta facta esset pecuniae accessio, ut veluti alter Crassus, cognomine dives appellaretur (137), nihil de quotidiano cultu mutavit, nihil de vitae consuetudine; intelligebat enim magnum esse vestigal parsimoniam, & vitae modestiam non parum valere contra falsos rumores. Porro non facile invenies, qui aequae Cosmus, solitus metiri usum pecuniae non magnitudine, sed ratione, amplissimis divitiis tam bene, tamque gloriose usus sit (138). Et quoniam hoc subsidium nonnunquam necessarium est ad retinendas aut recuperandas hominum voluntates, non omnem largitionem corruptelam esse dicemus, cum Cosmus, quo plures ad bene consulendum Reipublicae adjuutores haberet, aut aes alienum suscepit amicorum, aut in filiarum collocatione eos adjuverit, aut opitulatus iisdem sit in re quaerenda vel augenda. Profecto minime est du-

bium, quin illa benignitas, quae constat ex opera & industria, & honestior sit, & latius pateat: nonnunquam tamen est largiendum, & si hoc benignitatis genus in illa temporum confusione repudiasset Cosmus, non tanta studia eorum, qui ab eo dona acceperunt, assecutus esset. Venia igitur interdum necessitati est danda, nisi dicere velimus gravi homini, & ea, quae faciebat, iudicio certo ponderanti summo honori fuisse, quod largitione temporibus necessaria & ad facultates suas accommodata multos in fide & caritate sui atque patriae retinuerit. Omnino tria illa, ex quibus summa & perfecta gloria administrantium Rempubicam constat, si diligit multitudo, si fidem habet, si cum admiratione quadam honore illos dignos putet, nunquam non spectavit Cosmus; & quia amor multitudinis commovetur non tam opinione liberalitatis, beneficentiae, iustitiae ac prudentiae, sed etiam iis virtutibus, quae pertinent ad mansuetudinem morum ac facilitatem, non tam domi, quam foris speciem prae se boni & humanissimi viri ferebat. Quod vero ejus comitas non sine severitate erat, neque gravitas sine facilitate, efficiebat, ut cum sui & amici non magis vererentur, quam amarent. Omnino nemini nolebat esse incommodam gravitatem suam, quapropter fuscitanti aliquando uxori, quare nimium tacitus esset, & saepe oculos clausos haberet, respondit: *quia tu mihi in oculis es, & in tui cogitatione libentissime acquiesco.*

Ia

Intentum animum, tanquam arcum, habebat, ne languescens succumberet senectuti; & cum decrant graviore occupationes, se & Nepotes oblectabat narratione dictorum & factorum, in quibus non magis ingenium eminebat, quam prudentia. Vigebat in illa domo antiquus mos & disciplina, atque Cosmi extrema actas in hoc beatior, quam media, quod quo laboris minus habebat, ut Reipublicae, quae nullo externo bello flagrabat, consuleret, plus tribuebat temporis exercitationibus virtutum, atque gubernationi familiae. *Habemus liberos parvos* (scribebat aliquando ad Petrum); *incertum est, quam longa nostrorum vita futura sit: consulere vivi ac prospicere debemus, ut illorum solitudo ac pueritia firmissimis praesidiis munita sit.* Neque minus studebat, ut Nepotes magno amore inflammarentur in patriam & litteras, qua in re non ipse modo iis poterat esse exemplo, sed etiam Petrus, cujus optimi semper fuerunt de Republica sensus, & eximia opera in provchendis optimis disciplinis (139). Erat & in Petro summa comitas, & indulgentia in liberos, & quamvis in fragili corpore odiosa omnis offensio sit, quae tamen adversa Cosmo accidebant, leviora fiebant & bonis moribus, & artibus. Nec illum solum ratio impellebat, ut patientia sua molliret adversariorum animos, sed etiam utilitas: minime enim obscurum esse poterat, extincto Patre, fore ut obstinatiores vel ad evertendam,

vel saltem ad infirmendam familiae potentiam conspirarent. Id ipsum respiciens Cosmus, cum sibi vitae finem instare intelligeret, haec dixisse fertur. *Nolite arbitrari, o mihi carissimi filii, cum a vobis discessero, vos laetos fructus ex iis rebus, quas gessi, posse percipere. Eisdem creditote esse mores civium, qui fuerunt, cum, multis incumbentibus ad meam perniciem, in exilium pulsus fui. Nam etsi multis malefaciendi libertas gravissimis poenis erepta est, quorum calamitates aequo animo ego tuli, ne misericordia in ruinam patriae libertatis caderet, quod nunquam tamen defuerunt, qui dominari vellent, cum his perpetuum bellum mihi gerendum fuit, & vobis aeterna sollicitudo remanebit, cum intelligetis aut serviendum esse, aut per summam industriam, maximaque pericula patriae libertatem & familiae dignitatem conservandam. Potest ne in tam diversis mutabilibusque mentibus pax aut amicitia esse? Quare moneo hortorque vos, ut incumbatis ad salutem Reipublicae, ut circumspiciatis omnes procellas, ut nemini credutis, nisi illi, quem diu fidelem experti estis, & quem prudentem & bene animatum in patriam inveneritis, hunc consulatis, omniumque vestrarum actionum moderatorem habeatis. Si gloriae & famae vos cupiditas tangit, exinuiam illam & praeclaram esse putate, quae a bene & praeclare gesta Republica proficitur, in qua nisi recte facitis atque honestis vitae rationibus excellere impium execrabileque est. In privata vita or-*

do, moderatio atque aequabilitas conspiciatur: in bonos homines & prudentes liberalitas, quae ab ostentatione potentiae & largitionis absit, semperque habeat beneficentiae commendationem. Tanta vis est virtutis, ut cum aliquid humaniter, mansuete, jussu, moderate factum auditur, vel improbi admirentur, retineanturque ab laudando eo, qui benefaciendo se supra ceteros extollit. Severitas, Reipublicae tantummodo debita, ita exercenda est, ut medicinam imitetur, quae membris non parcat, quae sanari posse desperat. Neque tamen vos hortor, quod saepe majores nostri fecere, uti contra injurias armati eatis. Haec sunt & turbulenta, & temeraria & periculosa, quae multos praecipites egerunt, & incrementa attulerunt potentiae eorum, in quam invadebatur. Exterorum Principum amicitias & vestrorum, & Reipublicae maxime causa colendas censeo, atque utinam ille Franciscus Sfortia, qui per nos ad tantam fortunae amplitudinem pervenit, eundem servet animum, quem aliquando gessit. Illo enim socio & amico, haec Respublica obistere poterit multorum odii, & coercere ambitionem eorum, qui se dominos esse universae Italiae concupiscunt. Hoc a Deo immortali sepe precatus sum, ut per se potens haec civitas esset, nec alieno semper indigeret auxilio. Sed quia multa adversa fuere, & ad aequandas potentiorum vires foederibus opus est, in his feriendis optime is patriae consulat, qui universae Italiae rationem habebit. Gaudio me hac in re, ut &

in aliis multis, boni civis munus executum fuisse, & maximos labores, & summa, quae adii, pericula in patriae utilitatem cessisse. Quoniam igitur ita vixi, ut me non vixisse poeniteat, & habet natura, ut aliarum rerum omnium, sic vivendi modum, non dolebo, quasi decurso spatio, me ad calcem pervenisse, praesertim cum mors meliorem, quam qui est in hac miserrima vita, sit allatura statum. Ita Deum mihi velim propitium, sicuti confido fore, ut in coetu eorum, qui iustitiam & pietatem coluere, & patriam conservarunt, adjuverunt, auxerunt, aevo sempiterno fruatur. Haec oratio magno viro & sapiente digna declarat Cosmum nunquam de negotiis cogitare desuisse, & senectutem & vicinam mortem, quae languorem afferunt ceteris, illum acuisse, ut sibi magis magisque, patriae & liberis prospiceret. Providebat enim animo hos, veluti qui proximis littori vadis inducti mare pedibus ingrediuntur, quidquid progredierentur, in vastiorem altitudinem ac velut profundum inveni.

Quod hoc tempore requiescens a Reipublicae muneribus se in Careggianum receperat, ut a coetu hominum frequentiaque remotus secum liberius loqueretur, ibi eum mors, quam praesertim podagra attulit, oppressit. Ut audivit eum vehementer aegrotare Franciscus Sfortia, misit clarum medicum, qui ipsi medicinam adhiberet. Sed ipse ab nullo alio solatio levati potuit, nili ab iis, quae divinitus instituta sunt ad

expiandos animos. Ex illis, quae scripsit Petrus, ut Liberos certiores faceret quo in statu vita esset Patris, intelligi poterit quam hic integra mente, quantoque cum studio rerum, quae ad religionem pertinent, de statione vitae discesserit (140), quod accidit Kalend. Sextilis sub solis occasum an. MCCCCLXIV. Nullum testamentum fecit, & funeris pompam vetuit. Nihilo tamen minus Florentini mortem tanti civis non solum luctu publico, sed etiam exequiis, quarum nullae frequentiores fuerunt (141) laudatione & monumento contra defuncti votum honorandam esse putarunt. Orationem habuit de ejus laudibus vir civitatis amplissimus Donatus Acciajolius (142). Illa vero laus fuit universi populi, qui, quod ab ipso urbs servata & illustrata fuerat, solemni decreto PATREM PATRIAE appellavit, & nomen omnium gloriosissimum, quod sane perpauci in omni memoria meruere, in ejusdem tumulo inscribi jussit. Sic enim titulus habet. COSMUS MEDICES HIC SITUS EST DECRETO PUBLICO PATER PATRIAE. VIXIT ANNOS LXXV. MENSES III. DIES XX. Haec leguntur in Laurentiana Basilica ante aram principem. In subterraneo vero loculo ad ejusdem latus haec inscripta sunt. PETRUS MEDICES PATRI FACIENDUM CURAVIT. Talis fuit exitus vitae viri, omnium, quos habuit Florentina Respublica & Medicorum familia, amplissimi. Ob ejus mortem Petrus consolatorias epistolas ab omnibus fere Italiae Principibus accepit, qui

singularibus verbis declarabant quanti illum fecissent, perinde ac si unus ex omnium memoria sapientissimus esset judicandus (143). Et re quidem vera quid majus & admirabilius est, quam privatum hominem solis armis prudentiae triginta & amplius annos ferme imperium exercuisse in suos, pauca ad suam, pleraque ad utilitatem publicam retulisse, de statu rerum Italicarum, de pace, de bello consuluisse, reges magnificentia superasse, mirifice fuisse ingeniis, doctrinis & artibus liberalibus, eandem animi magnitudinem in omni fortuna prae se tulisse, & posteris suis reliquisse amplissimum patrimonium bonorum, atque nominis, ac gloriae immortalis?

F I N I S.



## I N D E X

## A

- A**cademia Platonica quando instituta [136.](#) a Cosmo quam provecta [174.](#)
- Acciajulus Angelus [43.](#) in exilium mittitur [44.](#) legatur ad Sfortiam [91.](#) ad Gallorum Regem [122.](#)
- Donatus [141.](#)
- Accolus Benedictus [133.](#)
- Franciscus [134.](#)
- Adimarius Alamannus [144.](#)
- Adornii [163.](#)
- Albergatus Cardinalis [16.](#) [25.](#) [106.](#)
- Albertus Leo Baptista [29.](#)
- Albitus Ormannus [47.](#) pellitur in exilium [49.](#)
- Rainaldus ejus seditiosa consilia [13.](#) [31.](#) [34.](#) [39.](#) suorum belli Lucensis [20.](#) puniendi Cosmi [31.](#) [34.](#) quid gesserit ne ipse revocaretur in patriam [45.](#) ejus oratio ad Pont. [46.](#) pellitur in exilium [49.](#) ejus voces irarum plenae [50.](#) [53.](#) [86.](#) machinae adversus patriam [78.](#) moritur [86.](#)
- Thomas [4.](#)
- Alexandria Cornelia [130.](#)
- Allius Antonius [175.](#)
- Peregrinus [176.](#)
- Ammiratus Scipio [2.](#) [112.](#)
- Anfrosina a Monte Dolio suis oppidis spoliata [85.](#)
- Andegavenfis Joannes [163.](#) [167.](#) bellum gerit cum Ferdinando Aragonio [173.](#)
- Renatus [57.](#) [70.](#) [93.](#) [109.](#) [118.](#) Florentiam venit [95.](#) in Provinciam redit [ib.](#)
- Ang'ariensis Gregorius [118.](#)
- Anglarium [82.](#)
- Anoninus S. Archiep. Florent. [122.](#) [150.](#)
- Appiana Catharina [111.](#)
- Aprianus Jacobus Plumbini Dominus [23.](#) [111.](#)
- Aragonius Alphonsus Rex [57.](#) [70.](#) [94.](#) ejus victoriae [95.](#) favet Pontifici [96.](#) bellum Florentinis & Sfortiae movet [97.](#) [107.](#) Vicit primo [112.](#) post victus ab Etruria discedit [113.](#) paci consentit [114.](#) Venetis junctus bellum renovat [121.](#) acriter

ter persequitur 123. pacem facere cogitur 129. Jacobum Pininimum ad bellum incitat 145. caussa novorum motuum in Italia 163. moritur ejusque laudes *ib.*

Armeni Latinis reconciliati 73. 91.

Arnus navigabilis redditur 166.

Argyropylos Jo. 140.

Arsili arcem Cosmo oppignera-  
tae 89.

Attavantius Rubeus 125.

Attendolus Michaelottus 34. 82.  
84.

---- Mutius 53. 69.

Atellinus Leonellus 107.

---- Nicolaus 11. 40. 47. 88.

Aurispa 139.

Aventia capitur 59.

## B

**B** Agnacavallum venditur 88.

Barbadius Hieronymus 129.

Barbadorius Antonius 168.

---- Nicolaus 31. 45. 50.

Barbarus Franciscus 43. 72. 135.

151.

Bardia Lecta Contessina Cosmi  
uxor 6.

Barga obseditur 60.

Basilica S. Laurentii 149.

Becchius Gentilis 186.

Benedictus XIII. 6.

Benitius Carolus 168.

Bentivolus Hannibal 97. 101. 06.  
ciditur *ib.*

---- Hercules 101.

---- Sandes 101. 102.

Bessarion Cardinalis 72.

Bisaldinus Petrus 114.

Blanca Vicecomes a Sfortia uxor  
expetitur 62. illi desponditur  
63. 74. 90. nubii 92.

Bonaventius Michael Angelus 156.  
160.

Bondelmontius Christophorus 115.

Bononienium vires 57. 62. 97.  
101. Florentinis juncii 122.

Borghinius 159.

Bossius Muthaeus 160.

Bracciana facio 57. 147.

Bracciolinus Poggius 30. 86. 133.  
135.

Brunelleschius Philippus 21. 29.  
149. 150. 152. 155. ejus mo-  
numentum 156.

Brunius Leonardus 6. 30. 133.  
140.

Brunorius Petrus 60.

Bueria Piccarda 2.

Burgundiae Dux 93.

Burgus S. Sepulcri 58. concedi-  
tur Florentinis 83.

By-

Byzantium a Turcis occupatum  
139.

## C

**C** Aesarinus Card. 72.  
Cajmus Eusebius 90.  
Calandrinus Thomas: *vid.* Nico-  
laus V.  
Calcondyles Demetrius 142.  
Caleschius Joannes 103.  
Callistus Jo. Andronicus 142.  
Callistus Ill. P. 146. 164.  
Campilia obseditur 110.  
Canisianus Antonius 175.  
Cannetolus Jo. Baptista 101.  
Capponius Ginius 11.  
---- Nereus 44. 76. 81. 84. 91.  
99. 100. 101. 102. 126.  
Carolus VII. Gallorum Rex 163.  
Carpi Princeps 121. 165.  
Carraria capitur 59.  
Casertini Comes 78. *vid.* Guidius.  
Cassiani S. arz Florentinis subij-  
citur 58.  
Castigljunculus Lapus 141.  
Cavalcantius Joannes 175.  
Cocchius Nicolaus 44.  
Coleonius Bartholomaeus 104.  
Comineus Philippus 112.  
Concilium Constantiense 7.

---- Bafilense 16. 70. 71. 73.  
diras imprecatur Eugenio & Fe-  
licem V. Pont. eligit 73.  
---- Florentinum 70. & seq.  
Corfinius Matthaeus 175.  
Corvinus Joannes Pannoniae Rex  
Turcas vicit 146.  
Cossa Balthasar 6. privatus Pon-  
tificatu maximo 7. cardinalis  
creatur 8. ejus mores & mors  
*ib.* monumentum 9.  
Cremona Sfortiae conceditur 91.  
Chrysologas Emanuel 142.  
Cydonius Demetrius 140.  
Cyriacus Aethiopiae Rex 92.

## D

**D** Atus Leonardus 7.  
Davanzius Julianus 67.  
Dellius 29.  
Dio Syracusanus 137.  
Dolfinius Matthaeus 149.  
Donatellus 9. 29. 158. 159.  
Donatus Andreas 41. 74.  
---- Jacobus *ib.*  
Duvadula quando subjecta Floren-  
tinis 88.

## E

**E** duardus IV. Anglorum Rex  
112.

A

Elio

Eleonora Portugalliae Regis filia

131.

Enochius Albertus 136.

Ephrem Syrus in Latinum con-  
versus 87.

Eugenius IV. Pontifex creatur

23. Florentiae commoratur 45.

Cosmum adversus Albitium tue-  
tur 46. Florentia discedit 55.

ejus adversa fortuna 57. con-

cilium Florentiam transfert 70.

quid a Basileensi ferre debuerit

71. 73. 88. quid egerit ut

Graecos aliosque cum Latinis

reconciliaret 71. 93. oppida

quaedam vendit 83. paci con-

sensit 92. retinetur Florentiae

*ib.* de recuperando Piceno co-

gitat 94. duriter accipit Rena-

tum Regem 95. cum Sfortia

bellum gerit 98. 104. pacem

facit 99. dat signa irati animi

Florentinis 104. moritur 106.

## F

**F**aesulana templa a Cosmo  
aedificata 150.

Faestlanus Joannes 29.

Farganaccius quam utilis Cosmo  
fuerit 34.

Felix V. 74. 96.

Feltrinus Fridericus 99. 101. 107.

111. 123. ejus laudes *ib.* 128.

165.

Ferrariae concilium habetur 71.

Ficinus Marfilius quam Cosmo

acceptus 136. quam doctus 137.

175.

---- ejus pater 136.

Florentinorum mores & artes 7.

18. 24. 28. 29. 71. 81. 131.

170. bella eorum cum Medio-

lanensium Duce 11. 12. 24.

55. 75. 90. et seq. paces 11.

27. 92. Lucensibus bellum mo-

vent 20. instaurant 55. non

admodum valebant militari vir-

tute 24. disputant cum Vene-

tis Francisci Sfortiae causa 63.

de trasferendo concilio Floren-

tiam laborant 70. qui ad illud

venerint 72. quot beneficiis a

Graecorum Imperatore affecti

75. quid a Picininio timuerint

79. vincunt Picininium apud

Anglarium 82. bello laessuntur

ab Alphonso Rege 97. 107. 123.

quantum Cosmo tribuerent 100.

Sfortiae succurrunt 104. a Ni-

colao V. quantum honorati 106.

quam fidei Venetis 110. 111.

VI-

visi a Neapolitanis 112. pacem cum iis faciunt 114. re-  
prehenſi a Veneſis ob auxilia  
Sfortiae data 118. cauſſae iis  
reſiſtendi 121. novum bellum  
cum Neapolitanis ſuſtinent 125.  
& ſequent. quam de litteris  
bene meriti 138. 140. de archi-  
teſtura, pictura & ſculptura 29.  
156. & ſeq. quantum valent  
in apparandis ſpectaculis 166.  
Fortebraccius Nicolaus 20. 24.  
46. 57. 58.  
Forum Livii 11.  
Foscarus Venetorum Dux 66.  
Fregofius Petrus 163.  
---- Thomas 11. Liburnum ven-  
dit 12. Sergianum amittit 54.  
Fridericus Caesar Romam petit  
122.

## G

G Allorum Rex Florentinis fa-  
vit 122. Cosmi ſtudioſus 132.  
Gambacurta Joannes 6.  
Gemifus Pletho 136.  
Genuenſes eorum vices 11. 20.  
22. 24. 53. 57. 103. 106. 163.  
poſſuntur Petra Sancta & Mo-  
trono 22. Florentinis juncti 122.  
Ghibertus Laurentius 159.

Gonzaga Ludovicus 60. 121.  
Graecae litterae per quos excul-  
tae 135. quando in Italia flore-  
re coeperint 139.  
Graecorum cum Latinis unio agi-  
tata 71.  
Gregorius XII. 6.  
Guadagnius Bernardus 31. 34.  
39. 51.  
Guicciardinius Jo. 45.  
Guidius Franciſcus Picininio fa-  
vit 80. cauſſae odii illius in  
Cosmum ib. ſua ditione ſpolia-  
tur 85. 101.  
---- Guelfus 19.  
Guidobonius Antonius 89.

## II

H Ebraei 27. eorum avaritia  
coercita 147.

## I

J Oanna Neapolis Regina 8. 56.  
Joannes XXIII. vid. Cossa.  
Italiae ſtatus 56.  
Juris prudentia per quos provec-  
ta 134.

## K

**K** Yriacus Anconitanus 143.  
a Cosmo Eugenio IV. com-  
mendatus 144.

## L

**L** Adlaus Bohemise Rex 122.  
Laertius Diogenes interpreta-  
tus 87.  
Landinius Cristophorus 140.  
Lascaris Jo. 142.  
Latinae litterae a Cosmo prove-  
ctae 134.  
Liburnum quando & quanti em-  
ptum a Florentinis 12.  
Lippius Laurentius 175.  
--- Philippus 256.  
Lucense bellum 20. quo modo fi-  
nietur 27. insauratur 59. trahi-  
tur subsidii Mediolanensium  
Ducis 60. 62. 67. quem exi-  
tum habuerit 67. ejus nunquam  
curam deposuit Cosmus 171.  
179.

## M

**M** Acchiavellius Hieronymus  
108.

--- Nicolaus 2.  
Massejus Thimotheus 174.  
Mahometes Byzantium occupat  
145.  
Malaspinae 54.  
Malatesta Sigismundus 103. 100.  
111. 118. 122. 134.  
Malatestae a Florentinis desciscunt  
78. cum iis in gratiam re-  
deunt 88.  
Malavoltus Fridericus 33. 34.  
Maletus Albericus 129.  
Manellius Ramundus 24.  
Manettus Jannottus 114. 141.  
Manfredius Astorres 87. 91. 122.  
--- Guido Antonius 62. 104.  
--- Ludovicus 19.  
Marcianum coenobium a Cosmo  
restauratum 150.  
Marcus Ephesus 73.  
Marradium quo tempore captum  
19. quam natura munitum 79.  
Marsuppinus Carolus 30. 56. 131.  
133. 140.  
Martellius Antonius 47.  
Martinus V. 7. Florentiam venit  
8. Florentinis irascitur 15. de  
conjungendis Graecis & Lati-  
nis cogitat 71. moritur 25.  
Masaccius 29. 156.  
Masolinus 29.  
Mas-

Massa Lombarda venditur [188](#).  
 Medicus Averardus [32](#). [17](#). [47](#).  
 ——— Bernardus [84](#). [95](#). [104](#).  
     [107](#). [129](#). [131](#).  
 ——— Carolus Cosmi Filius [130](#).  
 ——— Cosmus ejus ortus 1. institutio [5](#). obses Pisanis datur [6](#). Constantiam concedit [18](#). odia Philippi in ipsum [9](#). quos genuerit filios [10](#). [130](#). quando magistratus gerere coeperit [10](#). Mediolanum legatus mittitur [11](#). Lucam, Bononiam & Romam [15](#). quam gratus Pontifici [16](#). suusor belli Lucensis [20](#). Veronam concedit [23](#). pacificatorius legatus ad Pont. [27](#). auctor saluberrimarum legum [18](#). [144](#). [147](#). fauor eximius litterarum [30](#). [132](#). in invidiam adducitur [30](#). in iudicium vocatur [33](#). carceri mandatur [18](#). pellitur in exilium [35](#). ejus oratio ad populum [35](#). [48](#). ad Venetos [63](#). [118](#). ad liberos [178](#). ejus magnitudo animi [39](#). magnificentia [42](#). [142](#). [148](#). honoratur a Venetis [40](#). consilia de revocando ipso ab exilio [44](#). revocatur [47](#). quomodo a patria exceptus [48](#). Vexillifer

creatur [52](#). [70](#). relinquit Mediolanensem Duci et bellum Lucense instaurat [55](#). persequitur [59](#). ejus salsa dicta [93](#). [78](#). [134](#). [160](#). [176](#). de augenda Florentinorum dititione laborat [58](#). [85](#). [88](#). Venetias legatur [63](#). Ferrariam ad Pont. [68](#). quot et quanta pro Sfortia gesserit [69](#). [77](#). [88](#). [97](#). [99](#). [104](#). [105](#). [116](#). [129](#). Concilium Florentiam transferendum curat [70](#). quid tum egerit [73](#). rogant eum Veneti ut sibi succurrat [74](#). alienat a se Casentini Comitem [81](#). quibus adiutoribus utebatur [75](#). [87](#). qua via ad summam potentiam pervenerit [89](#). [100](#). [173](#). paci consulit [92](#). [99](#). [167](#). Bononiensibus. favit [102](#). Genuensibus [103](#). Venetis adversus Alphonsum Regem [107](#). quam fortiter & prudenter in hoc bello se gesserit [114](#). [122](#). [129](#). hospitio excipit Fridericum Caesarem [122](#). Galeatium Sfortiam [160](#). aequilibratis politicae auctor [129](#). [165](#). quemadmodum familiae consuluerit [130](#). [148](#). [162](#). quam gratus [132](#). quid contulerit ad

ad incrementum litterarum 134.  
 et seq. auctor Academiae Platonicae 136. quam Platonico-  
 rum studiosus 137. et seq. 174.  
 bibliothecae ab eo institutio 142.  
 templa aut erecta aut restaurata 149. et seq. domus rusticae et urbanae ab eo aedificatae 152. 153. quid ei debeat architectura 155. pictura 156.  
 sculptura 158. quae a Pittio tulerit 169. Gallis favit 171. nunquam animum deposuit subigendi Lucenses *ib.* causas habet querendi de Sfortia 171. 179. quam domi magnus 172. 177. ejus pietas 169. 174. 189. quam dives 132. 175. quam sapiens in divitiarum via 175. ejus mors 181. honores funebres *ib.*  
 ----- Joannes Cosmi pater 2. ejus mores 1. 17. divitiae 1. legationes et munera 4. consilia pacifica 11. odia Albitii in ipsum 4. Philippi 9. studia erga Joannem XXIII. Pont. 7. 9. plebis fautor eximius 13. novitatorum generis suasor 14. a Pontifice Montis Viridis Comes creatur 16. moritur *ib.* ejus oratio ad filios 17. Basilicam

S. Laurentii aedificare instituit 149.  
 ----- Cosmi filius 10. 130. moritur 162.  
 ----- Laurentius Cosmi frater 4. cum eo in exilium mittitur 37. honoratur a Venetis 40. revocatur ab exilio 47. legatur Ferrariam Concilii causa 70. moritur 86. exequiae illius pompae plenae *ib.*  
 ----- Laurentius Cosmi nepos 130. 162. 165. 179.  
 ----- Petrus Cosmi filius 10. 106. 128. 130. 159. 161. 177. 181.  
 ----- Verus ejus moderatio 3. 38.  
 Mercatus Michael 175.  
 Michelotius Architectus 29. 42. 152. 154.  
 ----- Bernardus 175.  
 ----- Nicolaus 175.  
 Migliorius 159.  
 Minuccius Antonius 41. 134.  
 Moneta capitur 59.  
 Mons Caroli a Florentinis captus 59.  
 Motronum a Genuensibus captum 22.



## N

- N** Eapolitanum Regnum quot  
bellorum causa fuerit 57.  
Neronius Dietisalvius 116, 129.  
---- Locterus 175.  
Niccolus Nicolaus 30, 135, 143.  
Nicolaus V. 50, 106, 143.  
pacis auctor inter Florentinos  
& Neapolitanos 114, 127. e-  
jus curae de comparandis codi-  
cibus 125.  
Nicolaus Pisinus resistit Picini-  
nio 70, capitur 83.  
Nutius Bernardus 175.

## O

- O** rdelaffius Georgius 11.  
Orlandinius Bartholomaeus 79.

## P

- P** acinius Antonius 136.  
Pactius Antonius 109.  
---- Petrus 141.  
Paleologus Joannes Graecorum  
Imperator 72. Florentiam ve-

- nit 72. ab ea discedit 73.  
---- Demetrius 72.  
Palmierius Mathaeus 141.  
Pandolfinus Jannotus 138.  
Panormita a Florentinis accitus 20.  
Patriarcha Constantinopolitanus  
Florentiam venit 72. ibi moritur  
73.  
Petra Sancta a Genuensibus capta  
22. a Mediolanensibus obsessa 58.  
Peruzzius Rodolphus 45, 47, 49.  
---- Ugolinus 141, 143.  
Philelphus Jo. Marius Cosmi lau-  
dator 172.  
---- Franciscus quam meledicus  
in Mediceos 9, 46, 86, 172.  
Florentiam vocatur 29, 140. de  
occidendo Cosmo aliisque co-  
gitat 56. sententia de eo ib.  
in Graeciam ivit 139.  
Philippus Burgundiae Dux 132.  
Picenum a Sfortia occupatum 76.  
93, 98.  
Picininius Franciscus 97, 98, 103.  
---- Jacobus 145.  
---- Nicolaus 21, 24, 54, 55.  
60, 67, 68, 69, 74, 75, 77.  
78, 79, 82, 90, 94, 95, 96.  
97, 98, moritur 99.  
Pierocius : vide S. Antoninus :  
Pilatus Leontius 140.  
Pi-

Pisae subjectae Florentinis 6. quam crudeliter hi in illas se gesserint 30.

Pius II. 119. 164. Christianos Principes ad bellum contra Turcas incitat 165.

Pittius Joannotius 107.

----- Lucas 44. 73. 116. fingit se Cosmi amicum 168. quam potens 199. conjurat in Mediceos 170.

Plato in Latinum conversus 137. Platonica Academia quando instituta 136.

Plumbinum ab Aragoniis obsessum 109. 111.

de Poetis Gabriel 167.

Ponsremulum a Florentinis defensum 105.

Porcianum paret Florentinis 88.

Pratum Vetus quando a Florentinis caprum 58.

Puccius 32. in exilium mittitur 17.

Puppi Comes 57. vide Guidius. a Pontifice exagitatur 52.

## Q

Quarqualius Cherubinus 175.

## R

Ragusinus Archiepiscopus 146.

Raphael Urbinas 156.

Ravenna capitur a Picininio 69.

Razius Silvanus 2.

Rechesensius Garzerarius 112.

Riccus Petrus conjurat 144.

Robbia 29.

Robertus Florentinus 139.

Roma a Neapolitanis capta 8.

Rutheni Latini reconciliati 71.

## S

Sabaudiae Dux 121.

Sacchetti Franciscus 114.

Salutatus Coluccius 145.

Scala Bartholomaeus 133.

Scarampius Ludovicus 81. 84.

de Scarparia Jacobus 139.

Seraphicus Antonius 175.

Sermoneta a Florentinis accitus 29.

Sergianum capitur 54. 59.

Sfortia Alexander 125.

----- Franciscus 21. Cosmo & Florentinorum partes sequitur 53. Pontificem vexat 57. 92. multa praeclara in Lucensi bello gerit 60. revocatur ab eo 61. Lucam rediit ib. disputationes inter Florentinos et Venetos de solvendis illi stipendiis 62. pacem inter Florentinos & Lucen-

censes conciliat 67. Blancam Vicecomitem uxorem sibi dari optat 62. illi desponditur 63. 90. nubit 92. in Apuliam transit dimicaturus cum Rege 69. a Venetis ejus fides imploratur 74. foedus cum his & Florentinis paciscitur 75. Venetias venit 80. 91. Victor in Cisalpina Gallia 82. quantum a Cosmo re & consiliis adjutus 97. 99. 103. 105. cum Picininio reconciliatur 95. coetus dimicare cum Aragoniis fugit 97. vicit Picininios 98. cum Pontifice pacem facit 99. cum Venetis feliciter dimicat 115. Mediolanensi ducatu potitur 116. utrum major esset Urbini Comite 123. subsidia mittit Florentinis 125. domum Cosmo donat 154. non satis ejus beneficiis respondit 171. 179. ad eum aegrotantem medicum mittit 180.  
 ---- Joannes Galeatius hospitio a Cosmo excipitur 166.  
 ---- Leo 94.  
 Sigismundus Caesar in Italiam venit 26. Florentinos incusat *ib.*  
 Simonetta 82. 104. 122. 124.  
 Solon philosophus 137.

Sozomeni historici scripta 150.  
 Sozzinius Marianus 134.  
 Strocitus Pallas 16. Legatus Ferrariam mittitur 27. Albiū sequitur 45. in exilium pellitur 50. ejus laudes *ib.* 106. 141.

## T

**T** Hæthalonicensis Isidorus 72.  
 Tolentinus Nicolaus 24. 33. a Mediolanensium Duce occiditur 34.  
 Tornabonia Lucretia 140.  
 Tornaquincius Jacobus 139.  
 Toscanellius Paullus 138.  
 Traversarius Ambrosius 5. 30. 41. 71. 140. moritur 87. quæ rogante Cosmo scripserit 88. quæ ab ipso obtinuerit 151.  
 Tredotium a Florentinis capitur 19.  
 Trincius Curradus 94.  
 Troilus a Sfortia Mediolanum legatur 75.  
 Trivisanus Zacharias 129.  
 Turcae victores 146. victi 147. foedus adversus eos 165.

## V

**V** Ada capta a Neapolitanis 125.  
 Va-

Valorius Bartholomaeus 141. 175.

----- Franciscus 175.

----- Nicolaus 145.

Vasarius Georgius 155. 159.

Venetj victores 16. quam studiosi

Cosmi 40. ad Italiae imperium

aspizant 56. Franciscum Sfor-

tiam a Florentinis petunt 61.

74. illius caussa disputant 62.

bello lacesiti auxilia a Floren-

tinis postulant 74. Brixiensem

& Borgomensem agros obinent

91. Bononiensibus succurrunt 97.

Sfortiae 104. de occupando Me-

diolani ducatu cogitant 105.

107. 115. reprehendunt Floren-

tinios ob auxilia Sfortiae data

118. infide cum iis se gerunt

120. & bello vexant 122.

Ventura Bernardus 112.

Vermius Aloysius 104.

Vespasianus librarius 135.

Ugolinius Baccius 175.

Viaregium a Florentinis capitur

59.

Vicecomes Bartholomaeus 129.

----- Philippus Maria Mediola-

ni Dux 11. ejus mores 11.

21. 26. 51. 74. 94. 99. 103.

105. bella cum Florentinis 12.

54. cum Venetis 74. Lucenfi-

bus faret 21. Genuam occu-

pat 22. ad Italiae imperium a-

spirat 56. Sfortiam sibi recon-

ciliat 90. cum Venetis pacem

facit 91. Bononienses vexat 97.

Aragonios in Sfortiam generum

concitat 97. cum ipso bellum

renovat 103. pacem ab eo pe-

tit 105. moritur 107.

Vitelleschius Jo. Recanati Episco-

pus 46. Florentinus Archiepi-

scopus 58. 78. occiditur 79.

Ursinus Aversus 128.

----- Joannes Paulus 80.

----- Napoleo 128.

----- Rainaldus 111. 113. 114.

a Vulpe Nicolaus 136.

Uzzanius Nicolaus 4. 20. 31. mo-

ritur 32.

## Z

Zoppa Vincentius 144.

F I N I S.